



欽定平定陝甘新疆回匪方略卷九十七 乙丑年

三月十六日 亥辛 都興阿穆圖善奏言關外勦賊

步隊不如馬隊便捷 臣等現部馬隊無多刻下

部署出關非有吉林黑龍江馬隊數千實不足

以壯軍威前經雷正綰奏調副都統蘇倫保常

星阿溫德勒克西富森保四起馬隊赴甘助勦

查楊岳斌不日抵甘擬將此項馬隊調歸 臣等

軍營庶可稍壯軍威請

旨一面飭令楊岳斌迅速來甘一面飭知劉蓉雷正綰  
於楊岳斌入陝時卽催令該副都統等並請依  
楞阿所部馬隊馳赴甯夏此時附近蘭州一帶  
賊氛未靖楊岳斌到甘必先入省藉資鎮撫所  
有甯靈北路軍情關繫匪淺擬請

旨飭催鮑超來甯俾接辦有人各營步勇得所統轄不

致漫散臣等即可整頓出關相機辦理惟甘省  
各路竄匪分投滋擾賊衆兵單實有防不勝防  
之勢二月初間據慶陽府甯州鄜州宜君中部  
等處告警當經飛咨劉蓉雷正綰分籌截勦旋  
准文煜等咨報鹽固靈臺竄匪由宜君一帶竄  
擾慶陽府合水縣之太白華池各鎮沿途焚殺  
盤踞安化縣屬之元城鎮界連定邊復有窺伺

甯條梁之意當派副都統西們克西克督帶馬  
隊馳赴甯條梁防勦又派副將趙有勝帶領大  
同等處官兵三百名馳赴定邊駐紮其花馬池  
迤南各路竄匪經總辦營務翁同書修築營壘  
分布操防極爲嚴密尙可無虞二月十二日復  
連據中衛文武各員稟報突有賊匪一萬數千  
人由靖遠及南山一帶竄擾復由河東金積堡

竄來賊匪數千將葉升等上八堡一律焚燬占  
踞小壩渠口現在附城之賊抵死固守外來之  
黨日益加增而各路股匪又復分投竄擾 臣等  
雖逐日出隊頗有斬獲奈未能痛加勦洗刻值  
河水春漲設若渠口被決甚屬可虞亟宜趁春  
水漲發之前激勵士卒圍攻城垣遂飭令提督  
黃金山等各率所部於二月十一日起連日滾

營進紮現已逼紮東門等處無如該逆連夜占踞護城河堤修築卡壘阻我進兵之路十五日該逆復抄繞我營築卡截我汲道臣穆圖善督飭黃金山所部各營猛攻賊卡該逆槍礮如雨我軍勇氣倍增攀援而上將卡內之賊剿殺殆盡其由各圩接應之賊亦經我軍分路擊退是日共殺賊三四百名奪獲槍礮器械百餘件副

將杜占魁彭文林均受礮子重傷遊擊劉才能  
都司張應奎奪卡陣亡自是之後仍復日列隊  
伍並挑挖長壕以斷賊營往來之路二十六日  
接據探報馬賊竄至金積堡抄襲大營後路臣  
等當卽督同杜嘎爾金順等分路截剿奮力追  
殺大獲全勝殲賊二百餘名獲馬一百五十餘  
匹已革副管蘇彰阿奮勇爭先擊斃逆回頭目



一名砍傷逆賊二名該副管前因不服約束經  
臣等奏叅暫行革職此次異常出力懇

恩開復原叅處分奪卡陣亡各員弁另行彙案請卹

都興阿又奏言已革安徽巡撫翁同書接自統  
直晉官軍以來籌防後路訓練行伍一切頗資  
整頓洵屬奮勉出力懋著勤勞合無仰懇

天恩格外

垂慈俾資鼓舞奏入

上命軍機大臣傳諭僧格林沁都興阿穆圖善雷正綰  
駱秉章劉蓉鮑超曰都興阿等軍進攻甯夏逐日出  
隊均有斬擒現在黃金山等已逼紮東門等處擊破  
賊卡挑挖長壕殲斃竄賊正當乘此聲勢將城賊聚  
而殲旃迅圖克復毋稍鬆勁惟鹽靈中衛賊匪分投  
竄擾皆爲甯夏賊黨外援並經都興阿等派兵防剿

尤當相機妥籌兼顧庶免賊匪得以勾連又煩兵力  
廊州宜君中部等處亦有賊匪滋擾雷正綰劉蓉當  
分籌截剿毋令蔓延甯夏肅清後都興阿等卽須振  
旅出關惟所部馬隊無多難資剿辦常星阿等各起  
馬隊前經雷正綰奏調已諭令僧格林沁酌量調撥  
著僧格林沁斟酌情形一俟軍務稍鬆卽先將此項  
馬隊迅飭赴甘改歸都興阿軍營調遣楊岳斌前已

據奏起程卽著星速前進以便與都興阿等商辦一切事宜楊岳斌入陝時常星阿等如尙未抵甘著雷正綰劉蓉催令該副都統等督帶馬隊馳赴甯夏其訥依楞阿馬隊業經劉蓉飭赴都興阿軍營著卽催令前進鮑超告假回籍此時想可抵川著駱秉章迅催該提督趕緊部署入甘已革委營總記名副都統蘇彰阿此次打仗奮勇爭先尙屬出力著開復原叅

處分以示鼓勵其奪卡陣亡各員弁著都興阿等查明請卹已革安徽巡撫翁同書在都興阿軍營統帶直晉官兵籌辦營務半載以來甚屬奮勉著賞給五品頂戴

二十日 乙卯 察哈爾都統阿克敦布副都統廉至

奏言據阿克蘇辦事大臣崇恩喀什噶爾辦事大臣常明烏什辦事大臣慶明和闐辦事大臣

聞

奎章先後咨稱該大臣等前經奏明赴伊犁參贊大臣聯捷軍營合力剿賊現已由口起程奏入報

二十四日己未恩麟奏言准雷正綰函稱固原州

城克復後撫綏駕馭極爲當務之急囑由臣遴

派文武員弁赴固視事並派標兵前往防守臣

查固原州向駐道州各一員臣已飭委揀發道  
張元熙署理平慶涇道事務令與正任知州蔣  
方直迅速繞道赴任其同城之學正吏目各缺  
現已由司委員往署又陝西提標及固原城守  
暨分駐各營汛大小將弁爲數甚衆若概由省  
派委實有不敷臣現於該標營實缺將弁內揀  
選練習行伍之員飭令赴任其餘空缺咨商雷

正緒卽於從征人員內酌量委署俾資得力至  
陝甘督標等營官兵除征調外僅存馬步二千  
七百四十名其新募宣威親兵三營現存城者  
亦僅五百四十餘名分布內外城關僅足敷用  
固原州城南經收復非厚集兵力實無以壯聲  
威第省標兵丁若調赴固原則省防益形空虛  
現在安會一帶道路仍梗卽勉湊標兵數百亦



命來甘曾經雷正綰撥給兩營兵勇又張集馨自在靜甯州防兵內挑選槍手官兵三百五十名與原帶羨卒合成一營派令已革遊擊秦國勝統帶駐紮靜甯令雷正綰奏令張集馨移駐固原辦理撫局及善後事宜所有秦國勝現帶三營兵勇約共一千四五百名似可卽由靜甯就近移

紮固原不但事屬便捷且兵將相習實於操防  
有裨奏入

上命軍機大臣傳諭都興阿穆圖善雷正綰恩麟曰固  
原州城克復後經雷正綰派令劉正高帶領精選左  
營並檄調延綏甘涼官兵六百名前往駐守以資鎮  
撫恩麟以州城新復必須厚集兵力藉壯聲威惟省  
標存兵無多難於抽撥而安會一帶道路仍梗卽湊

撥亦難剋期抵固自係實在情形秦國勝所統三營  
本隨張集馨駐紮靜甯現在張集馨已赴固原籌辦  
善後靜甯已就廓清若將秦國勝所部由靜甯就近  
移紮固原甚爲妥便著雷正綰卽飭該員帶領所統  
三營迅速前往與劉正高等協同防守恩麟卽毋庸  
由省標撥兵往防至該處善後事宜已否就緒張集  
馨應否仍留固原辦理之處並著都興阿等酌度具

奏其營汛各缺現經恩麟咨由雷正綰委員署理該  
提督當於從征人員內選擇得力可靠者酌量委署  
期於操防諸事有所裨益一切軍情仍隨時與都興  
阿壽商妥辦甯夏近日軍務若何都興阿穆圖善務  
當督飭各營將弁奮力攻取及早克復毋得曠日持  
久致誤戎機

同日明誼車林敦多布麟興奏言欽奉

諭旨現在古城危急萬分若不設法接濟安能久守等  
因查前由綏遠城解到山西等省撥解新疆各  
城餉銀十六萬兩除 臣 等截留三萬兩外下餘  
之餉均已解科布多並知照各該城將軍大臣  
派員迎提嗣於本年二月間復由綏遠城解到  
伊犁塔爾巴哈台等處餉銀六萬兩當經奏明  
暫存烏城今遵此次

諭旨復飛咨古城巴里坤哈密各大臣趕緊探明道路  
設法提取臣等徧行查詢除科布多與古城通  
衢大路之外有無與巴里坤等處可通路徑茲  
探聞察漢德爾素等處游牧與巴里坤毗連相  
距不過一二站此路若能解至巴里坤即可就  
近轉解古城哈密兩城實與軍務有裨現已派  
員前往確查路程一面咨行巴里坤領隊大臣

並札飭札薩克圖汗部落盟長酌撥駝隻安設  
臺站豫備接遞一俟該委員等查明稟覆卽行  
飭派官兵將酌撥古城巴里坤哈密等三處餉  
銀剋期起運奏入得

旨仍著探明道路將分撥餉銀設法運解務期穩慎不  
可稍涉大意

同日廣鳳奎昌奏言接札薩克親王車林喇布

坦等文稱正月初一日塔城回來變亂現據主  
事職銜巴彥圖稟稱該員行抵塔城見城門關  
閉未能進城因赴吐爾扈特王札薩克等送信  
現在一面派員偵探一面修製軍械俟內地大  
兵前來情願協同進剿等語臣查塔城道路梗  
阻文報不通究竟該城是否失守容俟探明再  
行奏



閩奏八

上命軍機大臣傳諭明誼麟興車林敦多布廣鳳奎昌  
文盛阿爾塔什達曰塔城變亂情形未據明緒奏到  
自因道途梗阻文報難通之故該城是否失守仍著  
廣鳳奎昌偵探確實具奏土爾扈特王札薩克等現  
擬調集兵丁探明塔城情形籌商進剿惟該盟兵丁  
素未習戰且軍械等項亦多缺乏若令勉強出征恐

亦有名無實不若責令就該游牧地方認真操練備  
豫不虞儻有賊蹤竄近務當同心協力共殄狂氛將  
來大兵出關亦可隨同進剿著廣鳳奎昌傳知該親  
王等遵照辦理並仍探明西路情形隨時呈報塔城  
爲新疆西北要區如果爲逆回占踞難保不逐漸東  
趨且古城一帶賊勢颯張亦恐有北竄科布多之意  
此時科城之防極爲緊要廣鳳奎昌縱不能派兵援

應古城而於本城防守責無旁貸務須先事熟籌嚴  
密布置以期有備無患烏里雅蘇台庫倫等處亦爲  
邊疆要地明誼麟興車林敦多布文盛阿爾塔什達  
均當思患豫防力圖自強之策不得以賊蹤尙遠泄  
沓成風致啟奸匪窺伺之漸哈密等處待餉孔殷烏  
科等處如有僻路可通仍著明誼廣鳳等將解到餉  
銀設法分撥總當穩慎解送毋稍疏忽

二十六日辛酉都興阿穆圖善奏言固原竄匪於

三月初五日撲犯花馬池分竄李家園等處距  
城甚近經翁同書飭令副將海綬等督率各軍  
分路進剿一面率同城中文武登陴守禦該匪  
一見我軍出隊卽紛紛回竄官兵追殺二十里  
奪獲鳥槍刀矛多件賊匪狂奔南去復追十餘  
里賊蹤已遠臣等查該逆因官軍圍攻甯郡突

來撲犯花馬池希圖分我兵力現在雖已擊退  
難保不再來攻撲仍飛檄翁同書嚴飭各營將  
弁堅壁固守以期有備無患至靖遠殘匪竄擾  
河西中衛縣廣武一帶復形危急而河東添來  
固原敗匪自靈州以南東互紅柳溝盡係賊氛  
現已咨催雷正綰迅速督軍北進節次掃蕩直  
逼靈州以便兩面夾攻

同日雷正綰奏言查會甯安定爲省東門戶驛  
站咽喉南接鞏昌由通渭洮州岷州直達河州  
狄道州北界鹽茶靖遠與興甯賊巢相接木逆  
悍黨盤踞青家驛等處時出分擾以致鞏郡疊  
次戒嚴上年九月臣派陶茂林由蓮花城鼓行  
而西援應省城節節疏通遂至安定時因急援  
金縣進解省城之圍而會甯在東未遑勦辦上

年十二月張集馨從靜甯西進疊破高家堡等處賊壘上月初一日攻克固原兵威丕震賊勢瓦解曹克忠乘勝連克穆家營右武營臣一面進規黑城子一面抽撥提督胡大貴等營由青家驛大道而進曹克忠由李俊堡進擣鹽茶並飭提督王得勝統帶六營由舊營地方分路攻擊逆衆望風膽落人無固志十六日張集馨督

隊至青家驛該逆始猶抗拒經胡大貴等奮勇  
銳進破其附近小壘二座該逆張皇失措向西  
南小徑逃竄張集馨麾軍掩殺當將青家驛攻  
克斬馘數十名奪獲牲畜軍械甚多十七日我  
軍五鼓蓐食從威戎鎮一帶追勦逆騎狂奔我  
軍分隊襲擊生擒逆回馬六十子等五名訊明  
正法二十一二十二等日由義岡川等處節節



進勦奮力窮追直至洛門地方始將此股殲除  
淨盡現在通渭甯遠隴西會甯境內均無賊蹤  
鞏郡業已解嚴 臣進勦黑城子僅有九營不敷  
布置是以咨會張集馨折回會甯合力進攻王  
得勝所統六營越舊營而西馬賊聞風狂遁步  
賊未及奔竄者百餘名登時梭斬無一漏網張  
集馨仍飭王得勝跟蹤力追直趨鹽茶陶茂林

一軍已抵會甯臣商令該提督扼紮安會相機  
控制兼顧省城現查赴省驛路自涇至蘭一律  
暢通南北賊勢劃然中斷固城就撫回民精壯  
者不過五百人臣已編列入伍帶充前敵不准  
入城其曾經從逆及平日不逞之徒均經按名  
緝捕立置重典查陝甘漏網巨逆均踞黑城子  
鹽茶靈州一帶臣與曹克忠分道進攻連日疊

有斬擒訊據獲賊供稱該逆向甯靈一帶賊巢  
求救意圖糾約大隊拚死一戰我軍自當穩慎  
進攻以收聚殲之效

雷正綰又奏言查固原以北地勢平衍一片賊  
巢至黑城子分爲三路中路之李旺堡同心城  
西路之鹽茶廳東北之平遠所下馬關均屬老  
巢其附近零星村落多爲賊踞臣擬由黑城子

聞

直擣中路兼顧東北以防環慶門戶曹克忠徑  
取鹽茶惟北路遼闊一切地利賊情須俟節節  
掃蕩隨時察看再當詳晰奏

雷正綰又奏言探聞甘省鎮原安化境內有馬  
步竄匪數千欲犯陝西邠州長武等處臣當卽  
抽帶勁旅馳回平涼飛飭提督周顯承等軍分

投攔擊並嚴飭總兵趙德正等分紮涇州北原  
正月十四日周顯承帶隊從涇州之屯子鎮迎  
勦該逆聞大軍已到由荔家堡奔越經我軍擊  
退十五日由鎮原縣蕭鎮斜趨甯州該提督且  
探且追十八日及賊於邠州白吉原跟蹤追殺  
該逆分股由長武縣之亭口西竄當被我軍截  
擊斃賊百餘名該提督於十九二十等日抽帶

馬隊追至麟遊縣崔木鎮湯灣等處二十三日  
賊由白吉原潛竄三水縣永樂堡我軍銜尾緊  
躡該逆不得喘息未暇深入陝疆仍折回安化  
鎮原等縣我軍往來追截復斃賊一百數十名  
奪獲戰馬二百五十餘匹二十七二十八等日  
餘孽零星竄回固原老巢現在涇州鎮原安化  
甯州正甯一律肅清陝防已鬆臣仍於東路各

陞環列重兵以杜旁竄兼顧陝省門戶

同日恩麟奏言據署肅州知州王子莊等稟稱  
二月二十六日聞肅州東關被口外獵戶竄入  
滋擾焚燒房屋圍困城垣本城回民亦卽變亂  
當卽差探據稱賊匪與兵民互相焚殺大肆鴟  
張護肅州鎮總兵成桂在城上擊賊失足跌傷  
骸膀署安肅道恆齡現在帶領兵勇擊勦等情

臣查肅州獵戶本係前甘肅提督索文招募專爲防堵番匪其中回民居多此次勾引城內回族乘閒滋事若不迅圖撲滅新疆進兵運糧路徑立形梗塞當經調派甘州提標及金塔寺永固二協官兵共一千五百餘名星速前往立解城圍以通大路惟涼州回案甫經平定不可無兵駐守而甘州介在涼肅之間尤應慎密防範



臣復飭令署甘涼道黎獻將甘涼二屬防務妥爲布置至甘省兵力太單查有四川派赴都興阿軍營之川北鎮鶴齡帶兵一千五百名前經臣奏明徑令出關剿匪現已飛催該總兵刻卽督隊來省逕赴肅州剿除回匪卽可順道出關其穆圖善一軍疊奉

諭旨催令勦辦回疆今肅州回匪阻遏出關之路更應

迅圖疏暢俾利軍行合無仰懇

天恩飭下四川督臣卽將鶴齡軍餉籌發足數催令馳  
赴肅州並乞

飭催穆圖善剋日整軍西指以免賊勢蔓延

恩麟又奏言甘省久乏帶兵武職大員現當西  
路軍興征調各營官兵若得妥員統帶則收功  
必更迅速烏魯木齊提督一缺蒙

恩以成祿補授該提督前在慶陽糧臺經督臣熙麟派

令督隊剿賊屢著戰功現赴烏魯木齊新任肅  
州爲必由之路可否仰邀

天恩飭下成祿馳驛來甘如肅州軍務尙未告竣卽令  
統帶各路官兵以資得力

同日玉通奏言西甯花寺回匪屢與番漢鄉勇  
尋讎械鬪疊經臣剴切開導諭令息兵回漢紳

民均已遵依具結不料正月閒西川十六莊回  
匪復與塔爾寺鄉勇構釁擾害漢民肆行焚掠  
經大通縣知縣劉肇瑞等登埤守禦該縣城小  
兵單難以固守二月初五日猝被該回撲入城  
垣居民震懼死者甚衆逆勢猖獗臣當委護西  
甯鎮總兵丹金札普前赴該處解民倒懸該鎮  
面爲允諾暗地唆使東關回目請留該護鎮防

守郡城並令紳商捐資交馬文義馳往大通賑濟難民調停漢回暫紓目前之急臣稔知馬文義妖言惑衆該回敬信如神不得已姑如所請令其挾資前往籌辦日來馬文義辦理如何因道路梗阻尙無確信茲據護北川營都司韓廷連稟稱該回竄擾河東毛家寨等處搶殺焚燒村舍爲墟臣當卽札飭該營弁嚴密防守該回

兇燄方張現將北川河橋擅行拆毀斷我餉道  
以致薪米不能進城軍民乏食行將內潰惟有

仰懇

天恩迅派知兵大員前來勦辦速殄羣醜以救生靈均

奏入

上命軍機大臣傳諭都興阿穆圖善雷正綰駱秉章楊  
岳斌玉通林之望曰雷正綰派胡大貴等軍攻克青

家驛從威戎鎮一帶追剿直至洛門地方沿途節節  
擒斬殘賊殆盡通渭甯遠隴西會甯境內均無賊蹤  
鞏郡解嚴該署提督已咨會張集馨折回會甯合力  
進攻王得勝六營追剿馬賊直趨鹽茶陶茂林已帶  
兵馳抵會甯該署提督商令陶茂林扼紮安會控制  
兼顧省城令張集馨鎮撫固原籌辦一切布置均尙  
周妥陝甘兩省漏網巨逆均踞黑城子鹽茶靈州一

帶著雷正綰與曹克忠分道進攻以期一鼓殄除仍  
應穩慎進取不可稍涉大意賊向甯靈一帶賊巢求  
救意圖糾約大隊拚死一戰著都興阿穆圖善相機  
進攻甯夏勿任竄逸如賊有分兵救援之信可於要  
路設伏邀擊該將軍等務當與雷正綰等軍聲勢聯  
絡更易得手花馬池賊匪雖經擊退難保不去而復  
來且恐該逆以驕兵之計誘我都興阿務須通飭所



部各營晝夜嚴防不可稍有疏失刻下靖遠殘匪竄擾河西中衛縣廣武一帶復形危急而河東又添固原敗逆自靈州以南東互紅柳溝盡係賊氛雷正綰必須趕緊將黑城子賊匪剿滅督軍北進節節掃蕩進規靈州方可與都興阿合軍痛殲醜類卽著相機迅進現在鞏昌情形已鬆曹克忠仍宜進攻鹽茶以分賊勢該將軍卽飭令速拔鹽茶勿稍鬆勁鶴齡一

軍疊經諭令赴哈密進援刻下肅州危急著駱秉章等卽檄赴肅州疏通道路以便順道出關肅州爲關外往來糧運要道鶴齡軍餉著寬爲籌備俾利師行穆圖善能否分兵前往援剿之處著都興阿迅速酌度調派恩麟已調兵一千五百餘名赴肅著就現有兵力認真剿洗黎獻已據恩麟派赴涼州布置甘涼防務所帶兵勇若干能否移撥兼顧肅州著恩麟酌

度辦理恩麟摺內所稱聞肅州東關被口外獵戶竄  
入滋擾焚燒房屋圍困城垣本地回民亦卽變亂等  
語究竟肅州曾否失守未據奏明殊屬含混著卽趕  
緊確探具奏如肅州有失致令關內外糧路軍情消  
息阻隔必治該護督以應得之罪懷之慎之成祿前  
經簡放烏魯木齊提督俟行抵陝甘卽由該督撫一  
面奏聞一面催令前進西甯花寺回匪變亂皆由玉

通平日議撫撤圍漫無準備以致縣城失守郡城危  
急生民塗炭該大臣一籌莫展惟知令馬文義等往  
來調停斷難恃以無恐蔣凝學一軍現已行抵何處  
著楊岳斌飛催該道督率所部徑赴西甯該處有兵  
一二千名亦卽歸該道調遣以資得力甘肅肅州西  
甯賊勢狡獪都興阿等未能兼顧楊岳斌當兼程前  
進通籌進剿機宜力維西路大局蔣凝學如離甘尙

遠或由楊岳斌先撥數營前赴西甯以免疏虞並著  
恩麟咨商陶茂林暫緩兼顧他處務當先行撥兵援  
剿此外如有可撥之兵亦應分撥肅州以顧全局西  
甯人心必須鎮定著玉通妥爲激勸固守待援毋得  
一誤再誤致干重罪階州如已克復林之望卽飭所  
部迅援肅州鮑超近日已否抵川著駱秉章飛催赴

甘

欽定平定陝甘新疆回匪方略卷九十八 乙丑年

三月二十七日

壬戌

惠慶奏言自上年十二月二

十四日逆回焚燒北門經我兵擊敗後半月之  
久未經攻撲惟在東北一帶增築礮臺七座直  
至西北角樓槍礮更番轟擊晝夜不絕官兵竭  
力嚴防雖風天雪夜不敢休息本年正月初九  
夜聞北風大作該逆潛赴城東南一帶暗立雲

梯蟻附而登該處防兵無多且苦守五十餘日  
疲倦已極一時防守偶疏致逆賊得乘其隙俄  
頃之間賊匪登城者已有百名之多分股直奔  
東南兩門馬道正白旗佐領尙阿本刑部學習  
主事錫綸各率兵丁奮力抵禦兵單賊衆勢幾  
不支幸右翼協領德壽督兵援應協力衝擊兇  
鋒頓挫我兵乘勢截殺該逆大潰紛紛墜城其

逃脫者又被東門槍礮轟斃奪獲大旗二桿刀  
矛木槩數十件長梯十三架此次逆回夤夜登  
城疏防之佐領阿坤布防禦額圖洪額驍騎校  
慶春均請交部嚴加議處接仗出力之協領德  
壽佐領尙阿本刑部學習主事錫綸應請由臣  
覈實保獎其陣亡受傷及出力兵丁查明奏請  
分別獎卹現在困守孤城糧盡援絕朝不保暮



惟有仰懇

天恩飭催關內大兵星夜兼程前來以解倒懸之厄奏

八

上命軍機大臣傳諭都興阿穆圖善成祿聯捷惠慶恩  
麟曰古城地方回匪圍攻城垣五十餘日復乘官兵  
困乏黑夜登城直奔東南兩門馬道經官兵奮力衝  
擊賊匪紛紛墜城轟斃無算所有此次疏防之佐領

阿坤布防禦額圖洪額驍騎校慶春均著交部嚴加  
議處帶兵出力之協領德壽等著准其由惠慶覈實  
保奏以昭激勸昨據恩麟奏稱肅州回匪變亂已諭  
令駱秉章等檄飭鶴齡一軍先將該處回匪剿辦著  
恩麟卽行飛札迎提催令該總兵迅赴肅州將此股  
殄除後卽行馳赴哈密會同德祥速援古城毋稍延  
緩聯捷所統各軍前已有旨令由關內行走昨復諭

令劉蓉恩麟於成祿行抵陝甘時卽飛催該提督前進此時成祿究竟行抵何處卽著該提督迅速奏報一面仍趕緊前進所有聯捷一軍並著由成祿總統聯捷卽作爲幫辦該提督等務當合力同心迅速會合帶兵出關兼程前援古城如行抵肅州時該處業已安定卽督同鶴齡所部星夜出關毋稍遷延致干咎戾穆圖善一軍能否分撥出關仍著都興阿妥爲

籌畫勿得稍分畛域

四月初一日乙丑恩麟奏言探聞二月二十六二

十七等日肅州回匪與官兵接仗回匪登城屯聚四鄉民勇俱已齊集城外因賊匪在城上亂放槍礮未能直前並探聞三月初一日高臺縣屬南鄉馬家莊等處回族勾結外匪焚燒漢民村莊經該處兵團奮力攻擊將逆匪全數殄除

撫彝廳屬黃家灣回匪亦於三月初一日起事  
現已抽撥甘州標兵二百餘名前赴黃家灣沙  
河一帶偵巡堵擊 臣查甘州肅州爲赴新疆必  
由之路且地方糧草素稱豐足目下各路大兵  
一應軍資均賴該處接濟今回匪勾通獵戶先  
將嘉峪關占踞與關外漢回聯爲一氣阻截進  
兵路徑爭我財賦之地逆謀甚狡甘省全境幾

無完區臣已飛咨陶茂林先其所急在於所部  
抽調勁勇數千名酌派得力大員統帶會同署  
甘涼道黎獻星速前往甘州相機防剿其前派  
赴肅州之金塔永固二協官兵及川北鎮鶴齡  
所帶兵丁仍卽飛催前進第逆氛四起由西漸  
東我兵此調彼虛實覺應接不暇合無仰懇

天恩飭催將軍穆圖善親督全軍兼程西指兵威早振

地方得安實甘省億萬生靈之幸奏入

上命軍機大臣傳諭都興阿穆圖善雷正綰略秉章楊岳斌劉蓉成祿聯捷恩麟曰甘省西路賊氛日熾恩麟現已飛咨陶茂林抽調勁勇進剿著陶茂林酌度軍情移緩就急如分撥數營扼紮安會卽可以資控制該提督卽酌帶所部勁旅數千馳赴肅州會合黎獻之軍先解城圍仍分兵兼顧甘州與恩麟所派甘

標官兵赴黃家灣沙河一帶偵巡堵剿都興阿穆圖  
善當激勵兵勇迅將甯夏漢城攻拔肅清餘匪卽可  
騰出兵力交穆圖善統帶由甘肅節節進剿並著雷  
正綰懷遵前旨將黑城子一帶回逆迅速殄除進規  
靈州與都興阿等聯絡聲勢穩慎進取駱秉章所派  
援甘之鶴齡一軍前經諭令該督等飭令先清肅州  
之匪再赴哈密助剿此軍曾否出關現在何處著駱



秉章飛催趨赴甘郡肅州一帶扼要截擊並著都興  
阿等迅提前進楊岳斌勇隊前據奏報陸續起程此  
時甘省軍情萬分危迫著楊岳斌迅催全軍馳赴甘  
省其蔣凝學一軍並著飛催赴援肅州一帶仍分軍  
兼顧西甯毋稍延緩前經諭令成祿總統聯捷諸軍  
由陝甘前進著聯捷探明該提督現在行抵何處飛  
速知照刻日進援聯捷接奉此旨督帶官兵星速西

行會同甘省諸軍將肅州甘郡回逆次第掃蕩卽行  
規復嘉峪關該關爲通新疆要路必須迅圖攻拔關  
內外文報始通德祥一軍已赴哈密如有別路可通  
消息卽飭德祥之軍與關內官兵會期裏外夾擊收  
復要隘並著都興阿等會籌妥辦恩麟於嘉峪關被  
匪占踞事前毫無布置殊屬有負委任仍著檄飭所  
派官兵嚴密堵剿並激勵肅州各鄉民勇奮力救援

以解該城之圍並將甘郡回衆妥爲彈壓撫輯毋任  
復行滋事其撫彝高臺等廳縣並著飭該地方文武  
就現有兵團妥籌防禦儻再有疏虞必惟恩麟是問  
懍之慎之

初四日

戊辰

都興阿穆圖善奏言據副都統西們

克西克等稟稱三月初十日探有馬步回匪數  
百距定邊縣十餘里當經督飭各營官兵進剿

我軍奮力衝壓該逆向南敗退追殺四十餘里  
斃賊甚多又據翁同書呈稱十二日探聞騎馬  
賊匪數十名竄擾距城二十里之母豬渠當卽  
派隊馳往迎剿該逆向西南遁走十三日有騎  
馬賊三百餘名在鹽場堡搶掠營總賽清阿等  
督飭馬隊奮勇向前槍箭齊施斃賊數十名生  
擒逆目三名正法刻下逆燄熾張雖經官兵擊

敗難保不乘隙復來且賊匪大股尙在紅柳溝  
東北一帶離定邊縣城僅二十里鹽場堡母猪  
渠係由定邊赴花馬池大路該逆連次撲犯意  
圖阻我糧道並探聞固原敗匪投竄金積堡唆  
令逆首馬化澂東竄難保非因攻甯緊急希冀  
撤我兵力刻下花馬池定邊防兵均屬單弱臣  
等現又飛檄翁同書務飭各營步隊嚴守城池

並令副都統西們克西克侍衛壽昌訥依楞阿  
等各起馬隊分定邊花馬池兩路常川梭巡以  
防餉道現在前敵各軍圍攻甯夏挖掘地道功  
將及半無如援賊加增並於城南添築賊壘接  
連通濟橋斷我柴草運路官軍兵力過單不敷  
調撥查雷正綰前奉

諭旨催勦靈州此時花馬池定邊一帶危急相應請

旨飭令雷正綰迅速撥派前隊卽日兼程北進救援後  
路仍親督大隊卽赴靈州庶可疏通運道兼收  
夾擊之效實於甯靈軍務大有裨益奏入

上命軍機大臣傳諭都興阿穆圖善雷正綰曰固原逆  
匪竄擾鹽場堡母猪渠等處疊經翁同書督飭馬隊  
迎剿殲擒悍逆多名該處爲由定邊赴花馬池大路  
逆匪連次撲犯意圖阻我糧道且其大股尙在紅柳

溝一帶離定邊僅二十里此次雖經擊敗難保不乘隙復來都興阿現檄各營步隊分行嚴守並令西們克西克訥依楞阿等馬隊分定邊花馬池兩路梭巡著卽嚴飭各軍實力探剿以防餉道毋使後路稍有疏失甯夏攻剿情形現在挖掘地道功將及半惟賊營日益加增並於城南增築賊壘接連通濟橋斷我柴草運路官軍兵力過單前敵後路均形喫緊不敷



調撥雷正縮現與曹克忠分勦黑城子鹽茶靈州一帶之匪諒已進兵此時花馬池定邊一路危急著該署提督迅將黑城子等處踞逆攻克節節掃蕩卽親督大隊前赴靈州期與都興阿等聯絡聲勢共收夾擊之效毋得顧此失彼如黑城子攻克尙需時日卽著先其所急酌量分撥兵隊兼程北進救援甯靈後路以期餉道無失

初六日庚午甘肅鎮迪道文麟奏言回匪圍攻古

城疊經領隊大臣惠慶督率官兵竭力堵禦二月初九日辰刻該逆暗用地雷將西北城垣轟陷乘勢入城闔城官兵及婦女等皆捨死巷戰自辰至午逆匪愈聚愈多兵民力不能支傷亡大半其餘官民人等縱火自焚者十居八九領隊大臣惠慶城陷時自焚於署中烏魯木齊左

翼協領噶魯岱保升直隸州同知甘肅候補通  
判景秀及右翼協領德壽等五員暨惠慶之一  
妻二妾二女噶魯岱之一弟一子景秀之一妻  
三子同時焚死前任古城領隊大臣保恆之子  
刑部學習主事錫綸力戰得脫錫綸之生母張  
氏妻烏蘇氏及其妹均於城陷時殉難錫綸之  
幼子齡岡查無下落現經錫綸攜各旗兵丁七

十餘名行抵奇台 臣當將受傷兵丁等留營調

養十二日探聞古城逆賊因烏魯木齊回匪被

遣勇難民擊敗前往救援已於十二日夜聞全

行西竄古城已無賊蹤 臣當令錫綸馳回古城

將殉難官員人等骸骨先行掩埋現聞濟木薩

一帶尙有逆賊二百餘名當卽揀撥壯勇八百

名派員管帶卽日前往勦辦刑部學習主事錫

綸擬請暫留營中差委俟軍務稍定再令回京  
供職臣查古城官兵不過五百員名竟能敵愾  
同儻苦守八十餘日城陷之日猶復拚死巷戰  
卒因力竭捐軀情殊可憫合無籲懇

天恩將殉難之官員兵丁婦女人等分別優卹藉慰忠  
魂

文麟又奏言烏魯木齊滿漢各營近年以來兵

餉不繼缺額未補實存兵丁不過十之二三加以綠營弁兵多係漢回每遇逆匪攻城輒爲內應烏垣滿城雖經原任都統平瑞激勵兵勇固守八十餘日卒因糧盡援絕遂致失守刻下烏屬迤東僅剩奇台鎮西二處古城旣失奇台益形危急雖有木壘營現存兵丁百餘名各處分守不能兼顧所募民勇僅只二千餘人大半未

經行陣兼之火器缺乏斷不足恃儻奇台一朝  
不守巴里坤兵單餉絀斷難支撐哈密一城豈  
能孑然孤立新疆全局不堪設想惟有仰懇

天恩飭催口內大兵迅速兼程來援以救危急

文麟又奏言 臣於正月十三日行抵奇台當卽  
籌辦防務招募民勇一千二百餘名以資堵剿  
二十六日色普詩新統帶官兵在富家莊遇賊

接仗失利逆燄愈張加以南路纏回復犯木壘  
臣督飭兵勇甫經擊退忽於二月初九日古城  
失守奇台萬分危急近日古城之賊雖已西遁  
難保不去而復來南路之賊復由穆家地山溝  
不時出沒儻一朝有事奇台腹背受敵防守殊  
難合無籲懇

天恩飭催都興阿趕緊帶兵出關並催各路官兵星夜



兼程前來乘機勦辦以殄賊氛再臣係未到任  
之員現無印信謹刊木質關防一顆已於二月  
十八日開用以昭信守

文麟又奏言二月初二日探聞南路纏頭回子

勾通逆賊直撲木壘臣當卽飭令奇台縣知縣

恆頤挑派勇目魏忠義等管帶勇丁會合木壘  
戶勇前往堵勦旋經前署哈密辦事大臣札克

當阿派回務章京達薩阿管帶民勇及纏頭回  
兵二百餘名並巴里坤綠營官兵五十名赴奇  
台援應臣當經查看並未見有回兵詢據達薩  
阿聲稱回兵行至木壘折回該章京自願帶勇  
赴東城口紮營臣卽飭令前往助剿初五初六  
等日該逆竄出齧牙溝我軍奮力衝殺賊始大  
潰斬馘甚多木壘街市之賊二百餘名仍復負

嶠抗拒我勇四面圍攻賊勢不支殲斃大半餘  
賊逃竄入山維時僅有巴里坤綠營官兵五十  
名隨同魏忠義等接仗達薩阿並不帶勇進剿  
該章京一聞古城失守卽將兵勇及木壘商戶  
等千餘人帶同東去以致奇台人心惶亂實屬  
玩誤軍務臣已咨行札克當阿查辦現在逆匪  
雖已敗逃漏網者尙有三千餘人難保不復來

滋擾 臣飭令各營兵勇在木壘一帶紮營以防  
要隘此次打仗出力勇丁仰懇

天恩俯准擇尤酌保以示鼓勵

同日廣鳳奎昌奏言 臣等遵奉

諭旨派員前赴古城偵探當因科布多無員可派飭令  
古城差來運餉之防禦達哈蘇甲兵圖塔佈前  
往偵探維時賊蹤徧地沿途梗阻該防禦等設

法繞道艱險備嘗行至奇台詢悉古城已失猶  
復親往查看情形迨知家屬全行殉難仍以差  
使爲重攜帶鎮迪道文麟摺報前來投遞並詳  
稟古城失守情形洵屬著有微勞合無仰懇

天恩將該二員分別獎敘以昭激勸

同日烏魯木齊領隊大臣德克吉訥奏言竊臣

蒙

恩補放烏魯木齊領隊大臣於本年三月初五日行抵科布多探知古城現已失守其古城迤西直至烏魯木齊均有回匪盤踞沿途節節梗阻未能前進一俟道路稍通卽當趕緊赴任均奏入

上命軍機大臣傳諭都興阿穆圖善雷正綰楊岳斌駱秉章成祿聯捷札克當阿伯錫爾恩麟陶茂林文麟曰古城旣陷奇台勢益孤危此股逆匪雖經烏魯木

齊回匪勾結西行與烏城遣勇難民相拒難保不去  
而復來古城爲奇台門戶文麟正當乘該逆西行之  
際將古城奇台濟木薩等處防剿事宜妥籌布置以  
期力持危局穆家溝一帶賊匪占踞木壘街市經文  
麟飭奇台令恆頤挑派民勇會合木壘戶勇在齧牙  
溝將賊匪擊敗並將木壘街市之賊殲斃大半餘匪  
逃竄入山所辦甚好所有出力勇丁卽著擇尤保獎

以示鼓勵仍著激勵該勇丁將穆家地山溝股匪悉  
數殲除以清後路文麟辦事尙知大體嗣後奇台及  
該處東西路一帶軍情卽著文麟隨時奏報所刻木  
質關防准其印用回務章京達薩阿經札克當阿派  
帶民勇回兵及巴里坤營兵前往奇台任聽回兵在  
木壘折回及至木壘交戰時僅有巴里坤綠營兵五  
十名該章京並不帶勇進剿一聞古城失守卽將兵



勇並木壘商戶等千餘人帶同東去以致奇台人心  
惶亂玩誤已極著札克當阿迅卽查明嚴叅重辦勿  
稍徇縱回兵因何由木壘折回亦著札克當阿會同  
伯錫爾查辦前調甘涼肅官兵二千餘名頭起已於  
正月二十日行抵哈密此時德祥是否已由哈密帶  
兵前進巴里坤木壘一帶與奇台毗連並著札克當  
阿伯錫爾德祥妥籌兼顧一面固守哈密毋稍疏虞

伯錫爾素顧大局忠惻可嘉自可協助防守俟立功  
後定當懋膺恩賞也前經疊諭都興阿等撥兵出關  
此時鹽茶廳城已克靈州一帶勢如破竹都興阿務  
當與穆圖善雷正綰妥爲商酌撥兵迅速出關援應  
陶茂林一軍卽著遵奉前諭馳赴肅州將該處匪衆  
剿滅疏通出關道路並著恩麟派兵力清肅州毋稍  
玩誤林之望如克階州卽著都興阿檄令帶勇由西

北前進與陶茂林合取肅城鶴齡一軍現已行抵何處並著略秉章恩麟飛催迎提飭令西進鮑超一軍亦著略秉章嚴催赴甘楊岳斌此時計已入陝都興阿等如已撥兵出關卽著楊岳斌督率所部與都興阿等合力攻勦甯靈成祿聯捷現在無論行抵何處著卽星夜督兵前進不准片刻停留以上所調各路之兵爲數已十餘萬不日取道出關先後雲集定可

成破竹之勢德克吉訥因古城已失未能前進此時  
如科布多需人料理卽著在該城幫同廣鳳等辦事  
如科城無需多人則奇台地方緊要卽著幫同文麟  
辦理軍務古城偵探出力之防禦達哈蘇著賞給候  
補佐領先換頂戴兵丁圖塔佈著賞給六品頂戴

上又命軍機大臣傳諭都興阿穆圖善雷正綰楊岳斌  
曰古城失守關外情形愈急自奇台以東巴里坤哈

密均有岌岌可危之勢若非大兵振旅出關分路進  
剿軍務斷無起色朝廷軫念西陲豈能聽其糜爛惟  
甯夏旣未克復都興阿穆圖善剿賊正在喫緊雷正  
綰雖有鹽茶等處之捷而靈州未拔尙不能與都興  
阿等合軍擊賊楊岳斌業已起程尙不知何日抵甘  
而肅州被圍甚急嘉峪關又被獵戶占踞關內外道  
路梗塞辦理諸形棘手是以都興阿前次有請飭穆

圖善先清甯夏再行出關之奏朝廷深悉情形立予  
允准現在新疆危急如此勢不能不速籌進兵而關  
內軍務未清兵力不能騰出空言亦屬無益於事昨  
於恩麟奏報嘉峪關被匪占踞時諭令都興阿等先  
將甯夏漢城攻拔肅清餘孽卽令穆圖善帶兵由甘  
肅甘涼一帶節節進剿原因腹地未清勢不能冒昧  
前進該將軍等均係朝廷倚重大臣自當妥爲籌畫

以紓西顧之憂固原餘匪疊犯花馬池鹽場堡等處  
都興阿等兵力尙嫌單薄雷正綰攻克黑城子賊隘  
收復鹽茶正可乘此聲勢席卷長驅俟攻克靈州後  
卽著提兵速進與都興阿等聯絡進兵將甯夏賊氛  
迅圖掃蕩一面併力西向先解肅州之圍再將嘉峪  
關踞逆殲盡庶可疏通糧運於大兵出關時不致有  
阻遏之虞楊岳斌自楚起程後行抵何處尙未據該

督奏到著懷遵疊次諭旨星速進發並嚴催蔣凝學  
一軍由豫拔營西上一面催提後路兵勇兼程趨赴  
甘肅與都興阿等和衷商摧權度緩急以期次第廓  
清又安邊圉

上諭內閣曰古城被圍日久該官兵婦女等平日同讎  
敵愾困守待援已屬深明大義茲以力竭城陷奮勇  
殺賊同時殉難情形尤爲慘烈二等侍衛古城領隊



大臣惠慶見危授命大節凜然著照副都統陣亡例  
從優賜卹以慰忠魂烏魯木齊左翼協領噶魯岱保  
升直隸州同知甘肅候補通判景秀著各按本員官  
階照陣亡例從優議卹右翼協領德壽等五員著文  
麟查明該員等姓名各按官階照陣亡例奏請優卹  
惠慶之一妻二妾二女噶魯岱之一弟一子景秀之  
一妻三子前任古城領隊大臣保恆之子錫綸之生

母張氏妻烏蘇氏及其妹以及圍城殉難之官兵婦女等著文麟一併查明分別奏請旌卹錫綸之幼子齡岡仍著文麟查明下落具奏刑部主事錫綸著准其暫留文麟軍營差遣委用至此股逆回倡亂膽敢糾集醜類攻陷城池屠毒百姓實爲罪大惡極斷難稍稽天討前已調派關內大兵十數萬剋期出關大伸撻伐卽著帶兵各員迅速分道前進殄滅逆氛廓

清邊徼用副弔民伐罪至意

欽定平定陝甘新疆回匪方略卷九十九 乙丑年

四月初九日 癸酉 雷正綰奏言准恩麟咨稱據署

肅州王子莊州同崔暘等稟報二月二十六日

口外獵戶竄入肅州東關勾引城內回民叛亂

大肆焚殺該匪紛聚城頭署安肅道恆齡在城

內與賊接仗四鄉民勇在城外圍攻因賊匪槍

礮甚多不能前進並據高臺縣知縣常祥等稟

稱回匪糾約獵戶於二月二十三日先將嘉峪  
關一帶全行蹂躪三月初一日高臺縣屬南鄉  
馬家莊回民勾結外匪串通北鄉六壩回民聚  
集變亂自殺婦女焚燒民莊該縣等帶領兵勇  
千餘協力攻勦斃賊多名餘匪竄至城東薛家  
圍復經兵勇攻擊全行撲滅又據甘州府知府  
崇福稟稱肅州回匪勾連高臺撫彝黃家灣一

帶回民意欲東竄直撲甘城隨卽集團防堵於  
初七日出城駐紮相機堵擊復據東樂縣丞錢  
寶仁稟稱甘州府城內回匪起事焚燒鋪戶經  
府縣調集民勇數千人先後進城竭力攻勦大  
獲勝仗等情臣查閱各員稟報於起事原委均  
未詳細聲敘甘州府知府崇福報明初七日出  
城駐紮而縣丞錢寶仁稟稱是日府縣帶團入

城勦賊獲勝與崇福所稟情節不符高臺縣回  
民滋事若非迫於萬不得已何致自殺婦女且  
六壩回民加以外匪諒不爲少果係叛逆凶殘  
豈千餘兵勇一日之間所能撲滅臣懸揣情形  
顯係漢民集團聚衆逞忿尋讎回民機變叵測  
與漢民勢不兩立遂致互相殘殺現在嘉峪關  
已被匪踞甘州變起非常深恐回衆報復則甘

郡必爲肅州之續而涼州亦牽連震動大局攸  
關何堪設想臣正在督兵北進遵

旨攻取靈州突聞警報不勝憂灼惟有先其所急現已

飛咨陶茂林於所部三十營內迅撥十餘營由

該提臣親督馳赴西路妥速勦辦以專責成安

會及靖遠之防由臣抽撥勁旅數營派員卽日

帶往會同堵禦靖遠一帶卽飭曹克忠暫時就



近兼顧俟續募楚勇到甘飭其分途扼紮仍將  
陶茂林留防之營檄令西進以厚兵力奏入

上命軍機大臣傳諭都興阿穆圖善雷正綰陶茂林恩  
麟曹克忠曰前據恩麟馳奏回匪撲占肅州城垣並  
勾通獵戶占踞嘉峪關等情疊經諭令都興阿等會  
籌妥辦令陶茂林酌撥數營扼紮安會卽帶勁旅赴  
肅州甘郡一帶剿賊並令成祿等星速會兵赴援疏

通關路茲據雷正綰奏回匪勾結獵戶將嘉峪關先行蹂躪旋竄入肅州東關勾結城內回民紛聚城上安肅道恆齡在城內接仗勢甚危急雷正綰現已飛咨陶茂林於所部三十營內酌撥十餘營親自督帶馳赴西路勦辦與前次寄諭適相照合卽著都興阿雷正綰等飛檄陶茂林星速移軍赴甘郡肅州一帶相機進剿迅掃狂氛該提督西行後所有靖遠之防

並由雷正綰抽撥勁旅會同陶茂林留防各營嚴爲  
堵禦其安會適中之地應否移兵扼紮並著與曹克  
忠會籌隨時兼顧俟雷正綰續募楚勇到甘飭令於  
安會及省垣一帶扼要布置卽檄遣陶茂林留防各  
軍全數西征以厚兵力都興阿穆圖善雷正綰當慎  
遵前旨迅卽規復甯夏靈州相機聯絡穩慎進取以  
次廓清河狄攻克關隘花馬池一帶爲都興阿進兵

後路關繫緊要前經諭令雷正綰分兵兼顧並著雷  
正綰酌量迅速調派蘭州省防及各軍糧路著恩麟  
妥籌布置並檄飭肅州民勇赴援迅解城圍至甘州  
府崇福所稟與東樂縣丞錢寶仁所稟各情互相歧  
異與恩麟前奏亦不相符著雷正綰恩麟等檄飭甘  
州府縣各官齊集兵團妥籌防剿並將甘州回匪變  
亂情形暨肅州城垣曾否解圍隨時偵探迅速馳奏

至所稱漢民逞忿起事回民機變叵測致令互相殘  
殺於情事甚爲切中該提督等兵威所及務在分其  
曲直持平辦理庶強橫者不能得志而良懦者不至  
含冤所以戡亂者在此所以弭亂之源者亦在此

初十日甲戌都興阿穆圖善奏言三月十六日回

逆大隊由城西洪廣營擾掠鎮北堡沿山一帶

直趨平羅臣等派委副都統杜嘎爾金順帶領

馬隊馳往勦辦該逆於十七日撲犯平境先遣  
馬賊十餘人扮作官兵詐圖入城見平邑城門  
堅閉防守整嚴遂向黃渠橋斜竄意欲撲犯寶  
豐阻我磴口糧運經駐紮寶豐之太原鎮總兵  
馬陞飭令縣丞劉廷麟齊集百姓登城防守自  
帶親軍數十名出城迎擊槍斃賊目一名賊匪  
三名該逆奔竄仍遁回黃渠橋老巢馬陞以兵

數太單未敢窮追臣等自黃河兩岸連營數十  
里直逼甯郡城下晝夜圖謀奇正兼施攻勦正  
在喫緊斷難驟撤兵力致令功虧一簣至花馬  
池後路一帶雖疊經官軍擊賊獲勝然該逆仍  
踞大水坑其勢正熾今甯郡賊黨復增屢犯平  
羅洪廣營及磴口糧路在在堪虞復據署高臺  
縣知縣常祥等稟稱肅州嘉峪關均被回匪占

踞道員恆齡接仗受傷總兵成桂受傷後經民  
勇救至南鄉現在金佛寺養傷口外玉門敦煌  
等處亦有回匪變亂之信肅東百餘里外賊勢  
猖狂焚殺漢民時有東竄之警撫彝黃家灣回  
匪數百人滋擾南山一帶甘州府城回匪亦於  
初七日變亂當經兵勇剿滅餘匪西竄又准西  
甯辦事大臣玉通咨稱回逆攻陷西甯府屬之



大通縣業將失守情形縷細入奏等語 臣等查  
甘省回氛日熾不特關外文報不通卽關內甘  
涼各處均形危急甘州南山窰沙金夫現在雖  
無蠢動情事恐將來被匪勾結貽患滋深刻下  
永昌亦有回氛似此到處糜爛亟應趕緊勦辦  
以期次第廓清但甯靈不靖則我軍前進必至  
腹背受敵動輒掣肘惟有仰懇

天恩迅催雷正綰卽日進逼靈州先撥前隊救援各營糧道庶兩岸軍聲聯絡甯靈迅就蕩平臣等現已飛催鶴齡一軍先往肅州協勦並請

飭催楊岳斌星速赴甘督飭蔣凝學馳赴西甯以顧郡城惟查鶴齡以餉乏不能拔隊尙未入甘請

旨飭下四川總督駱秉章迅速籌款先行撥解三箇月餉銀以後仍按月協濟此軍勿任缺乏

都興阿又奏言臣營餉需支絀積欠累累茲據  
慶陽糧臺解到銀一萬八千兩各營紛紛請領  
不敷支放現當攻勦喫緊之際勢難責令枵腹  
荷戈設無項可發必致鼓譟譁潰大局何堪設  
想臣所部各軍餉章不一相應請

旨飭下慶陽糧臺將新舊禮字四營東治兩營陝勇兩  
營一律仿照鄂軍章程馬陞親軍仍照慶陽舊

章西安滿兵查照定例壽昌訥依楞阿兩起馬  
隊仍照揚防章程每月約共三萬數千兩如數  
解交臣營勿得愆期缺乏並請

飭令慶陽糧臺每月另撥銀一萬兩以備軍火賞卹之  
用

都興阿又奏言陝西榆林府知府劉廷鑑人甚  
精明官聲亦好臣抵花馬池後派令採辦米石

半年之久籌辦運解均無貽誤現據該員來稟  
因叅革查辦亟應清釐經手事件並開具辦米  
數目呈覈前來 臣查該員才能幹練若令廢棄  
深爲可惜仰懇

天恩飭令陝西巡撫劉蓉嚴飭該員馳赴 臣營差遣俾  
收指臂之助實於軍務有裨

同日楊岳斌奏言疊奉

諭旨命臣星馳赴甘遵卽遄行於二月十八日馳抵襄陽擬至陝西省城與撫臣劉蓉熟商一切卽行赴甘所有勇丁檄令營弁嚴加管束隨後繼進均奏入

上命軍機大臣傳諭都興阿穆圖善雷正綰略秉章楊岳斌成祿聯捷劉蓉吳昌壽恩麟陶茂林楊能格曰靖遠固原匪黨分股北竄甯郡賊黨復增屢犯平羅

洪廣營及磴口糧路在在堪虞肅州嘉峪關旣被回  
匪占踞恆齡成桂均經受傷口外玉門敦煌亦有回  
匪變亂之信肅東百餘里外賊勢猖狂撫彝回匪滋  
擾甘州城內叛亂大道失守永昌亦有賊氛非但關  
內外音信不通而肅州一帶賊匪又復駸駸東犯甯  
夏軍事諸多掣肘若非厚集兵力分路援應則糜爛  
之勢已成西陲大局何堪設想雷正綰所部自攻克

黑城子收復鹽茶後軍威尙振昨據奏已派數營赴  
安會一帶暫調陶茂林十數營赴肅州等處進剿當  
經諭令照辦並令分兵兼顧甯夏後路一面迅克靈  
州甯夏以期疏通北路並傳諭曹克忠兼顧安會茲  
覽都興阿等所奏攻城正在喫緊而援賊麇集分擾  
平羅寶豐等處意圖牽掣是賊擾後路情形更緊卽  
著雷正綰等慎遵昨日諭旨妥速籌辦都興阿等仍



當穩慎進取妥籌防範不可爲賊所乘乞沙金夫雖  
尙無蠢動情事仍著飭令該處文武員弁妥籌防範  
以備不虞肅州被匪占踞後成桂等受傷赴鄉有無  
捏飾恆齡及在城文武員弁下落均著恩麟查明具  
奏據都興阿等奏肅東百餘里外賊勢猖狂時有東  
竄之警情形亦關緊要陶茂林帶兵西進後卽著雷  
正綰飭令派赴安會等處員弁與曹克忠督同陶茂

林留防靖遠各營嚴密扼紮截其東竄之路以免蔓  
延並著恩麟派軍隨同陶茂林進攻甘郡肅州毋稍  
延緩西甯所屬大通縣城前據玉通奏回匪變亂搶  
剝男婦衣物尙無殺害情形茲據都興阿奏接玉通  
咨業將失守情形縷細入奏想卽係前日所陳之事  
著陶茂林仍於援剿肅州外分兵妥籌兼顧其玉門  
敦煌等處變亂情形尙未據恩麟奏到卽著查明據

實迅速覆奏鶴齡一軍現在行抵何處著駱秉章查明催令前進迅赴肅州其入甘餉銀並著駱秉章籌款先解三箇月月餉以後仍當源源接濟鮑超之軍是否已有成數著催令趕緊赴甘以厚兵力甘涼肅連番告警嘉峪關又被匪踞情形危急萬分成祿聯捷均係西路大臣必須設法先清關內再圖整旅出關疊經降旨嚴催著該大臣等星夜西發不得片刻

遲延致干咎戾都興阿軍餉前據楊能格奏到由慶陽糧臺支應現在都興阿軍營需餉甚亟著楊能格查照鄂揚西安等軍章程給發另按月撥銀一萬兩以備軍火賞卹之用務須按數彙解毋得愆期缺乏其劉廷鑑一員前經劉蓉甄別降旨革職查辦現在都興阿營務乏員著劉蓉飭令該革員馳赴都興阿軍營以供差遣楊岳斌旣已行抵襄陽著卽星馳就

道並檄令員弁勇丁隨後繼進迅抵甘省與都興阿  
妥速籌商以安西陲一俟行抵陝境卽行馳奏蔣凝  
學所部仍在豫楚之交著吳昌壽催令該道隨同楊  
岳斌兼程西進以期得力

十五日己卯恩麟奏言肅州回匪自二月二十六

日起事以後逆燄愈張城內房屋多被焚燬三  
月初七日臣調派官兵前往援應行至距城十

里之沙灘廟與賊接仗因衆寡不敵我軍傷亡  
過半民勇亦登時潰亂甘郡城內回兵回民亦  
於是日舉火倡亂該處文武調集兵團併力撲  
捕殲斃逆匪千餘名敗殘之賊奪北門而逸兵  
團跟蹤追剿疊有斬擒該逆復勾結黃家灣叛  
匪在甘州城外大肆焚殺經兵團擊退遂分赴  
四鄉擾害並占踞梨園察漢俄博二營永固堡

城於十六日被獵戶攻陷洪水營回匪亦於十  
二日起事署該營遊擊王禮及把總蘇元發均  
係甘州回族同時內應先將看守火藥庫團勇  
殺傷二人並於署內放火經各路團勇圍攻復  
被王禮槍傷一人團丁奮力攻擊王禮勢不能  
支自刎身死蘇元發亦經勇丁殲斃 臣查肅州  
逆氛正熾甘郡岌岌可危勢成累卵况該匪勾

結西甯撤回欲圖大逞儻援軍日久遷延必致  
糜爛不堪現飛飭護金塔協副將葉榮趕緊調  
集兵團竭力勦捕並飛行昆都倫蒙古貝勒達  
什才楞部落調派蒙兵二三千名就近助勦肅  
州復咨商陶茂林抽撥數營逕赴甘州相機堵  
擊現聞提臣鮑超安肅道蔣凝學甘涼道李鶴  
章鞏秦階道金國琛各起援軍均已接踵西來



臣通盤籌畫擬令各軍一併取道陝西鳳翔入甘肅南路秦隴一帶毋庸繞道涇平卽以金國琛所部扼紮鞏昌洮岷等處彼時或替換陶茂林全隊悉數西行再爲酌度辦理其鮑超蔣凝學李鶴章等軍並令分顧甘涼肅三郡節節疏通俟腹地稍形平靜卽令出關進剿不致阻滯合無仰懇

天恩飭鮑超督兵兼程西指並

飭兩湖江蘇陝西各督撫轉催蔣凝學李鶴章金國琛  
各率所部迅速入甘以資分布

恩麟又奏言據河州鎮總兵曹克忠呈報三月  
初一日移營李俊堡擬會合雷正綰攻勦鹽茶  
廳踞匪初八日率隊前進中途突遇逆回六千  
餘名截我後路將官軍圍於南山上曹克忠奮

力衝擊陣斬悍賊多名潰圍而出至韭菜坪地方復遇大股逆回列陣抗拒曹克忠親督各營奮力迎戰逆匪潰敗我軍追殺數十里生擒賊目王纏頭等四十八名當卽正法受傷及落溝澗死者無數是日連戰皆捷共斃賊四百餘名奪獲馬匹槍械甚多 臣查固原一帶回匪疊經雷正綰等痛剿早已勢窮力蹙此次復經曹克

忠接仗獲勝愈足以褫賊魄而振軍心鹽茶廳  
城不難指日攻克奏入

上命軍機大臣傳諭都與阿穆圖善雷正綰駱秉章楊  
岳斌李鴻章吳昌壽恩麟陶茂林曰肅州逆勢猖獗  
經恩麟派兵接應在沙灘廟與賊接仗因衆寡不敵  
登時潰亂甘州回匪在四鄉擾害占踞梨園察漢俄  
博二營永固堡城亦被獵戶攻陷洪水營回匪又復

滋事該護督現已添調昆都倫蒙兵二三千名就近  
助勦肅州咨商陶茂林抽出數營徑赴甘州堵勦並  
咨催鮑超等軍趲程接應是肅州逆燄旣張甘郡亦  
岌岌可危况該逆勾連撒回欲圖大逞儻援軍日久  
遷延必致益形糜爛著雷正綰迅飭陶茂林督率所  
部十數營前赴肅甘等處與恩麟調派各軍會合進  
勦毋稍延緩都興阿穆圖善務當督飭相機進取攻

拔甯夏雷正綰仍遵前旨兼顧甯夏後路迅克甯靈  
疏通北路刻下甘省回氛日熾關內外信息不通亟  
應先清關內再圖進剿著楊岳斌懷遵疊次諭旨迅  
卽躡程前進毋再遷延干咎鮑超一軍諒已部署起  
程著駱秉章催令迅速赴甘以資攻剿蔣凝學一軍  
已至楚豫之交著吳昌壽飭令隨同楊岳斌大軍剋  
日西發並著楊岳斌李鴻章飛調金國琛李鶴章各

率所部援軍迅由陝西鳳翔一路馳赴甘境勿稍遲  
緩肅州等處既有陶茂林等軍足敷剿辦蒙古兵歷  
次調赴西路均不得力恩麟添調之昆都倫蒙古兵  
著毋庸調往以節糜費鹽茶廳城前經曹克忠督軍  
攻克已由雷正綰馳奏矣

十八日壬午 聯捷奏言 臣 途次疊奉

諭旨嘉峪關被逆匪占踞並古城失守奇台危急情形

跪讀之下曷勝憤懣查蘭州迤東黑城子尙有  
踞匪甯夏亦未克復西路甘郡肅州一帶回匪  
又復煽動關外古城失守奇台危急且占踞嘉  
峪關咽喉要地以致內外梗塞不通匪勢猖獗  
賊情叵測燎原之勢已成一時驟難撲滅誠如  
聖諭必須次第掃蕩穩慎進取仰見

廟算周詳曷勝欽佩 臣前因黑龍江官兵並無軍器奏



明由晉省籌撥乃疊次嚴催始據藩司王榕吉  
撥來馬槍弓箭鳥槍長矛等件計所撥軍器無  
多僅敷二百八十人之用其餘未備器械已咨  
行山西撫臣趕緊造齊撥解臣先行帶兵前進  
探赴成祿軍營與之合兵一處以期次第進剿  
奏八

上命軍機大臣傳諭沈桂芬聯捷口前因嘉峪關被匪

占踞肅州甘州回黨變亂古城失守疊經諭令都興  
阿等撥兵援應陶茂林馳赴甘州進剿並命成祿總  
統聯捷諸軍星速西行現在聯捷業由晉省起程前  
進卽著仍遵前旨探明該提督行抵何處飛速知照  
會師西進與甘省諸軍會合將肅州甘郡回氛次第  
掃蕩規復嘉峪關疏通要路以期剋日大舉毋稍延  
緩據聯捷奏稱所帶黑龍江官兵並無軍械晉省籌

撥槍箭等項僅敷二百八十名之用其餘未備器械  
已咨催晉省趕辦隨後續解等語該營兵勇起程前  
進所需軍械實屬刻不容緩著沈桂芬迅飭該省藩  
司將未備軍械趕緊造齊派員解交聯捷軍營以資  
攻剿

二十一日酉乙都興阿穆圖善奏言三月二十六

日探聞大股回逆竄至金貴堡迤北一帶截斷

糧路臣等卽派副都統杜嘎爾金順等督帶馬隊數百名馳勦跟追該逆直趨平羅寶豐及西路洪廣營等處並屯紮清水堡一帶截我追兵我軍馬隊追過金貴潘昶等堡遇賊馬數百匹列隊迎撲杜嘎爾等督飭官兵槍箭齊施分路衝殺該逆紛紛潰敗我軍奮力追殺斃賊甚多查磴口及平羅寶豐均屬糧運要區逆賊意圖

占踞阻我運道 臣穆圖善當卽抽調各營步隊  
一千六百名並督同副都統杜嘎爾等帶領馬  
隊數百名於二十八日馳抵平羅該匪正在猛  
撲縣城經平羅縣知縣長謙督飭兵勇登陴固  
守我軍兩面夾擊槍礮環施該逆敗退北竄寶  
豐維時駐紮寶豐之山西太原鎮總兵馬陞聞  
警帶領親兵數十名出城迎擊因賊衆兵單回

城堅守該逆屯踞黃渠橋等處二十九日杜嘎爾等率領馬步各隊前往迎擊槍箭齊施鏖戰多時賊始大敗我軍乘勝追殺殲賊無算陣斬僞帥馬生顏一名各軍分投兜剿將此股賊匪斬殺殆盡甯郡城內逆回聞我軍前赴平羅遂糾約馬賊潛出北門遶金貴堡趨近杜嘎爾營盤意圖乘虛攻撲當經副都統托克屯等帶隊

擊退此役官弁兵勇奮不顧身協領慶順受槍  
子傷旋卽殞命營官華勝堂接仗陣亡現飭總  
兵胡世英等仍在前敵布置守禦相機攻擊昨  
准阿拉善親王貢桑珠爾默特咨稱固原逆賊  
於三月二十日撲犯磨石口等處經協理台吉  
阿布哩接仗斃賊八名生擒五名並據翁同書  
呈報二十四日賊騎竄至距城十餘里地方副

都統西們克西克等督率所部分路兜抄該逆  
由石山子迤南奔竄官兵乘勝追殺殲賊四十  
餘名二十六日侍衛訥依楞阿等帶隊由花馬  
池赴紅柳溝進剿突遇馬步賊匪多名我軍縱  
橫盪決槍箭如雨賊衆抵禦不住向北遁走我  
軍愈戰愈勇將賊衝爲兩截委驍騎校永恰布  
等衝入賊隊刺殺僞平西王孫義保官兵一齊



前進斃賊二百餘名臣等查孫義保馬生顏等  
均係固原著名巨憝此次臨陣受誅洵足以伸  
天討而快人心其尤爲出力之員弁兵勇相應開列懇  
恩分別獎勵至阿拉善親王貢桑珠爾默特籌防堵禦  
異常出力應懇

溫旨褒獎仍請

飭令嚴防各口兼辦駝運以濟軍需奏入

上命軍機大臣傳諭都興阿穆圖善雷正綰曰固原竄  
逆直趨平羅寶豐欲斷磴口糧路雖都興阿等派隊  
迎擊追斬僞帥馬生顏殲斃餘逆甚多甯夏踞逆窺  
伺營盤亦經擊退其撲入磨石口之馬賊經阿拉善  
親王貢桑珠爾默特派協理台吉阿布哩接仗頗有  
斬獲翁同書派令侍衛訥依楞阿等帶隊由花馬池  
赴紅柳溝途遇逆匪馬步多名官軍衝殺將賊截斷

刺殺僞平西王孫義保辦理均尙得手寶豐平羅餘  
賊恐尙不少當此首逆就誅賊氣已奪不難乘勝削  
平著都興阿穆圖善派隊搜殺務將援賊掃除淨盡  
力克甯夏府城勿任再有勾結阿拉善親王貢桑珠  
爾默特守卡殺賊奮勇可嘉著都興阿先行傳旨嘉  
獎仍著飭令嚴防各口兼辦駘運以濟軍需俟甯靈  
一律肅清定當渥膺懋賞翁同書自委辦後路以來

竭力籌防相機策勦訥依楞阿肅經到防卽殲巨逆  
均屬奮勉可嘉仍著都興阿等督飭該員等認真防  
勦未可始勤終怠致誤戎機雷正綰卽懷遵前旨迅  
攻靈州力圖克復以便與都興阿等會師甯夏廓清  
北路毋稍遷延磴口糧運旣通該將軍等仍須派兵  
力顧後路軍士因飢思潰務當力爲拊循以固結其

心

上諭內閣曰甘肅固原竄逆以磴口係辦糧總匯平羅寶豐均屬糧運要區意圖占踞阻截我軍運道經副都統杜嘎爾等督率兵勇於三月二十八二十九等日分路進擊該逆馬賊膽敢分路抗拒我軍奮勇直前槍礮齊施賊始潰敗分路竄逸杜嘎爾等復由黃渠橋等處分投追殺殪賊無算尸橫徧地斬僞帥馬生顏於陣餘匪掙殺殆盡甯夏城賊乘我軍馳赴平

羅糾約馬賊潛出北門遶金貴堡猛撲官軍營盤副都統托克屯等督帶兵勇兩路夾擊殲斃多名當將該匪擊退固原逆匪於三月二十等日撲犯磨石口等處阿拉善親王貢桑珠爾默特督飭協理台吉阿布哩等防剿兼施疊有斬擒其紅柳溝一路經翁同書督同侍衛訥依楞阿等於三月二十九等日各率所部分路衝殺槍箭如雨該逆抵敵不住向北遁走

當將首逆僞平西王孫義保殲斃步賊悉數被誅勦  
辦尙爲得手所有在事尤爲出力之委驍騎校永恰  
布著以防禦儘先卽補並賞加佐領銜披甲薩木札  
普著以驍騎校儘先卽補並賞換花翎馬甲巴拜著  
賞戴藍翎其餘出力員弁兵勇著都興阿等擇尤保  
獎候旨施恩

欽定平定陝甘新疆回匪方略卷一百 乙丑年

四月二十七日 辛卯 恩麟陶茂林奏言二月十一

日我軍暫駐中灘正擬移營前進探有馬賊千

餘窺伺 臣陶茂林卽密飭各營嚴陣以待十二

日賊匪前來撲營我軍一擁而出該匪不戰自潰各營跟追十餘里斃匪多名十三日派提督張在德等分路進剿節節掃蕩當將王家集賊



巢攻克斬逆首馬元於陣並殲斃悍逆千餘名  
生擒九名當卽正法三月十七日探得張家營  
等處回匪糾集悍黨萬餘圍撲陶世貴等四營  
各營堅壁固守該匪環攻四時之久我軍槍礮  
齊施斃匪百餘名逆勢不支旋卽退竄勇丁亦  
略有傷亡臣陶茂林當派張在德等帶隊援應  
分路進攻我軍一鼓直前當將羊營寨張家營

齊家營三巢平。毀敗匪奪路狂奔。掩殺三百餘名。訊據獲賊供稱。狄河並撒拉各匪勾通。逃匿回族謀攻鞏昌府城。先由安定堵截。大兵再赴鞏郡。並約會十八日攻撲沙坡四營等語。次日果有大股馬賊由西廟山而來。直撲該處四營。臣陶茂林帶隊駐紮大岔山梁。捲旗息鼓。諭令各營假作賊匪聲息。該匪信爲夥黨。大呼速來。

助陣各勇趨近沙坡槍礮猝發撲營之匪倉皇  
失措登時大亂斃賊四五百人滾崖落澗者甚  
衆奪獲羸馬軍械不計其數餘匪仍由大寨子  
回竄臣等查該匪糾約各路逆黨潛謀竄陷鞏  
昌亟應嚴加防範此次雖痛受懲創正恐狄河  
大股逆匪傾巢而出省城卽不免動搖臣陶茂  
林仍擬滾營進紮相機堵擊臣恩麟一面將省

宸廔

防事宜再行嚴密布置以期仰紓

恩麟又奏言三月十六日總兵曹克忠由李俊  
堡移營進駐麻子溝賊匪率衆前來官兵出隊  
迎戰斬馘二百餘名該匪敗走旋據探報鹽茶  
廳踞匪將棄城遁走該總兵隨卽帶隊馳抵城  
下奮力攻擊城上槍礮如雨瓦石交加當飭親

兵人等搬運柴草堆積南門一面施放火器立將南門燒燬城內賊衆大亂曹克忠揮令各營衝煙而入逆匪由北門狂奔當將鹽茶廳城克復該總兵分派各軍在城內搜勦斃匪八九百名一面親帶馬步兵勇繞出北門跟蹤追勦沿途斬殺甚衆奪獲馬匹軍械無算敗殘之匪竄入雙墩兒堡我軍乘勢追擊又殺賊一千餘名

隨將該堡攻克生擒逆匪一百三十五名訊明  
後悉數正法我軍追至距鹽茶四十里之何家  
堡地方始行收隊刻下賊勢十分窮蹙提督雷  
正綰擬卽日會同曹克忠乘勝直逼甯靈並令  
陶茂林捍衛省城以固根本奏入

上命軍機大臣傳諭都興阿穆圖善雷正綰恩麟陶茂  
林曰甘肅鹽茶廳城早經雷正綰等奏報克復恩麟

所奏陶茂林一軍暫駐中灘將撲營之賊擊退並將  
王家集賊巢攻克其圍攻陶世貴等營之賊亦經官  
兵兩次擊退並經陶茂林督兵進攻將羊營寨張家  
營齊家營三巢平毀勦辦尙屬得手狄河並撒拉各  
匪勾通洮岷各路夥黨潛謀竄陷鞏昌且狄河大梁  
逆匪傾巢而出省城卽不免動搖所有省城防守事  
宜恩麟自當嚴密布置豫籌防範惟肅甘兩郡及嘉

崕關西甯等處一片賊氛若不早除恐勢成燎原將  
來益難收拾前經諭令雷正綰酌撥數營進紮會甯  
以便替出陶茂林之軍前赴肅甘進剿著雷正綰仍  
遵前旨辦理陶茂林俟雷正綰所撥兵勇到齊後卽  
統率所部由狄河一帶以次進剿前赴肅甘至西甯  
一帶情形近日未據玉通奏報仍著恩麟探明隨時  
具奏並著分派兵勇前往援應不得專顧蘭州置省



外州縣於不問鹽茶廳回匪經曹克忠勦敗竄遁都  
與阿穆圖善當飭令該總兵迅速進援靈州以期合  
兵勦平甯夏毋稍遲延

五月初一日乙未烏魯木齊提督成祿奏言臣於

三月十一日行抵李旺堡軍營面晤雷正綰具  
悉嘉峪關失守肅州糜爛甘涼二郡岌岌可危  
此時若不厚集兵力先扼甘涼則河西逆氛日

熾且關外現無進兵之路必須節節掃蕩方能  
振旅出關雷正綰與曹克忠連拔李旺堡等處  
巨巢辦理正在得手兵力本無可分因念西事  
孔棘大局攸關古城久困望援尤切聯捷一軍  
尙無來甘信息鶴齡所帶川兵亦尙未赴西路  
不得不力籌兼顧先其最急現於所部各營內  
抽撥六營交臣帶往並籌給勇餉俾利遄行臣

一面飛檄鶴齡趕緊馳往肅州並派員赴蘭州  
一帶添募新勇以厚軍勢仍剋日帶隊赴省與  
恩麟商辦防剿事宜現在河西告警中外隔絕  
必須隨剿隨進方能赴援關外臣惟有趕緊部  
署一經就緒星速督隊西行惟關外需用糧餉  
全恃內地接濟自應先事豫籌免滋貽誤相應

請

旨飭下護理陝甘總督恩麟將 臣營餉需專設糧臺派

得力大員總司其事至各營官兵應領糧餉甘

省現按楚軍章程辦理應仍照章覈辦用歸畫

一

成祿又奏言查西路回逆專恃馬隊馳騁 臣所

帶均係步卒深恐不足制敵查穆圖善一軍疊

次奉

旨出關遲滯至今尙未西行其所部馬隊似應撥交臣

就近管帶庶出關進剿足壯軍聲相應請

旨飭下穆圖善將副都統金順高福所統吉林黑龍江

馬隊各一起並酌撥步隊數營星速取道涼州

赴臣軍營差遣俾資得力奏入

上命軍機大臣傳諭都興阿穆圖善雷正綰略秉章成

祿聯捷恩麟陶茂林曰嘉峪關失守肅州糜爛甘涼

二郡岌岌可危雷正綰現於所部各營內抽撥六營  
並籌給軍械馬匹銀兩等項交成祿統帶卽著如數  
籌撥俾資攻勦成祿派員先赴蘭州一帶添募新勇  
並剋日督隊進省所有募勇章程及進勦事宜卽著  
與恩麟會商妥辦惟甘省回民性情狡詐良莠難分  
該提督新募勇丁務須精加選擇不准夾雜回勇以  
杜後患並著成祿趕緊添練勇丁星速督隊西行陶

茂林一軍諒已馳抵西路卽著與成祿之軍聯絡進  
剿節節掃蕩並著恩麟嚴飭地方文武及在防各軍  
合力兜剿聯捷前次奏報已由晉省起程前進刻下  
想已行近甘境卽著探明成祿軍營星速前往會合  
進剿聯捷所帶馬隊五百名前已諭令統歸成祿統  
帶足資調撥穆圖善所部攻剿甯夏正在得手未便  
分兵西進成祿所請飭調金順等起馬隊之處著毋

庸議鶴齡統帶川軍尙未馳赴西路仍著駱秉章飭  
令剋期飛速前進毋再遲延致干重咎鶴齡到甘後  
卽著成祿妥爲調派成祿俟聯捷等軍到齊務當激  
勵將士將關內肅甘等處賊匪迅速剿滅早日帶兵  
出關肅清邊境至甯夏軍情近日未據都興阿等奏  
報著都興阿穆圖善雷正綰分飭各軍迅速攻拔甯  
靈剋日出關大張撻伐以紓朝廷西顧之憂該將軍



等責任綦重必能迅奏膚功速行葺事也

初二日

丙申

雷正綰奏言陝省餘匪及各路援賊

經我軍痛勦後四散奔逃黑城子迤北溝塹深峻逆巢林立東西兩山路徑險巇敗逆竄伏其中負固不出並堅踞李旺堡扼守中路

臣

於三

月二十七八等日督飭各軍分投勦捕提督胡大貴由東山之乾溝口進攻提督譚玉龍從西

山之韓家店進攻兩軍步步爲營聲勢聯絡共  
破賊壘十餘處斃賊數百名臣自督馬步親兵  
由韓伏灣節節掃蕩張集馨在後策應爲三路  
聲援將中路賊巢全行踏毀二十九日官橋堡  
大股逆匪突來撲犯曹克忠飭提督王德勝等  
分路迎勦擒斬甚多四月初六七等日由海灣  
進勦平毀賊巢多處遂移營進攻官橋堡該逆

負嶠死守以槍礮抵拒提督王德勝身受重傷  
裹傷力戰官軍四面合圍奮力攻擊逆匪從東  
門奔出各軍乘勢截剿殲賊無算當將官橋堡  
老巢攻克十一日臣進剿李旺堡逆首木棍糾  
集死黨踞險抗拒當飭胡大貴等督率隊伍將  
兩山竄逆層層剿洗斷其往來援救一面督隊  
圍攻更番迭戰逆匪防備甚密槍礮如雨我軍

衝煙直入縱橫盪決賊屍枕藉生擒首逆木棍  
等四十餘名卽在陣前正法當將李旺堡老巢  
攻拔斃匪甚多奪獲牛馬軍械不計其數連日  
乘勢將附近石峽口等處賊巢踏毀直薄預望  
城曹克忠亦已進兵同心城刻下軍威旣振勢  
難鬆勁預望同心兩城諒易得手此次在事出  
力員弁請俟兩城攻克再行彙案請獎惟糧運

告匱幸連克堅巢因糧於敵兵勇暫得一飽但  
慮不能持久 臣惟有趕緊攻勦規復靈州仰副  
聖主軫念西陲之至意

雷正綰又奏言烏魯木齊提督成祿奉

命赴援關外於四月十一日行抵 臣營當將總兵趙德  
正等所統三營交其帶往再與續撥三營隨後  
繼進鶴齡所帶川兵已抵秦州 臣檄催星夜趨

程取道安定由該提督一併督同前往以厚兵力

同日恩麟奏言准陶茂林來咨所部親兵因索取積年欠餉攜帶軍器號衣紛紛潰逃者約數千餘人臣當卽移行各路軍營一體截擊並飛咨陶茂林彈壓現存勇丁嚴防賊匪竄突旋據安定縣知縣胡國棟詳稱四月初四五等日陶

茂林所部勇丁與賊接仗失利初七日逆匪直  
撲安定縣城臣查陶茂林一軍銳氣已挫驟難  
振作省垣現已震動附近地方無兵可調因查  
曹克忠自克復鹽茶廳後移營未遠臣已飛咨  
雷正綰轉飭曹克忠率領全軍前來接應請  
旨飭下雷正綰檄調曹克忠迅速赴援大局幸甚

恩麟又奏言據總兵曹克忠呈稱自克復鹽茶

廳後分軍駐紮何家堡一帶三月二十九日突  
有馬步賊匪數千人直撲營盤該總兵督飭各  
營分路迎戰逆衆拚死抗拒鏖戰一時之久賊  
始不支紛紛奔潰官軍追殺十餘里擒斬數百  
名落澗跌斃及受傷者不計其數並奪獲馬匹  
槍械甚多臣查曹克忠帶兵入甘後每遇攻取  
城堡勦擊逆匪率皆身先士卒謀勇兼施故能



摧堅制勝所向披靡此次逆匪分股撲營該總  
兵從容布置分路迎勦無異拉朽摧枯實爲將  
領中不可多得之員仰懇

聖諭嘉獎俾令益加奮勉至隨同打仗出力各將弁請  
由雷正綰查明保獎以勵軍心

恩麟又奏言陶茂林於四月初二日在安定縣  
營次聞訃丁父憂茲據該提督懇請回籍奔喪

臣查現在甘省軍務緊急接替無人可否將甘肅提督開缺並

簡派大員接統兵勇俾陶茂林回籍守制之處恭候聖裁均奏入

上命軍機大臣傳諭都與阿穆圖善雷正綰劉蓉成祿陶茂林恩麟曰甘省回逆踰伏黑城子迤北東西兩山並堅踞李旺堡扼守中路經雷正綰分軍三路進

勦疊將沿途各賊巢一律平毀乘勝攻拔官橋堡李  
旺堡老巢生擒逆首木棍等四十餘名正法官軍直  
薄預望城老巢曹克忠已進兵同心城勦辦諒易得  
手惟陶茂林所部勇丁因索取積年欠餉攜帶軍器  
號衣紛紛潰逃者約數千餘人省垣現已震動逆匪  
復乘虛直撲安定縣城陶茂林所餘十數營退紮該  
縣城內外兵力較單恩麟現已飛咨雷正綰轉調曹

克忠之軍星速馳援該總兵所部現逼同心城老巢  
攻勦正當喫緊刻下能否抽赴安定一帶勦賊或另  
有勁旅可以調派前往著都興阿穆圖善雷正綰迅  
籌妥辦陶茂林現在丁憂本日已有旨改爲署任賞  
銀三百兩治喪其營內潰勇竄逃何處難保不爲逆  
回誘煽勾結著陶茂林恩麟設法招集並飛檄各路  
軍營及沿途州縣一體遏截勿任滋擾陶茂林現存

各營務當妥籌鎮壓鞏固軍心力守安定待援毋再  
稍涉疏懈成祿抵甘後經雷正綰撥給六營鶴齡亦  
已行抵秦州目前省防喫重安定危急著成祿迅帶  
所統六營督同鶴齡所帶川兵迅卽取道安定先解  
該城之圍兼顧省城防務聯捷管帶黑龍江官兵前  
已據報由晉起程並著成祿飛咨該大臣星速赴甘  
會師前進不准稍涉延緩俟將安定等處逆匪掃蕩

卽移師進勦肅州甘郡回逆以期次第廓清雷正綰  
一軍進攻預望正在得手距靈州僅三百餘里著卽  
乘勝進勦與曹克忠所部迅拔預望同心兩城規復  
靈州卽可與都興阿等軍聯絡進取都興阿等仍當  
慎遵疊次諭旨迅籌攻拔甯夏以牽賊勢雷正綰各  
營糧運匱乏著劉蓉將該軍所需糧石等項按月如  
數籌解源源運濟以期士馬飽騰毋許稍涉延玩致

令停兵待餉坐失事機此次雷正綰所部出力員弁  
兵勇及曹克忠營接仗獲勝各員均著雷正綰存記  
俟攻克同心城等處彙案請獎曹克忠帶兵入甘屢  
克城堡近復將撲營賊匪擊敗斬馘甚多洵屬異常  
出力著雷正綰恩麟傳旨嘉獎諭令始終奮勉以蕲  
全功

上諭內閣曰甘肅提督陶茂林現丁父憂著賞銀三百

兩經理喪事由甘肅藩庫給發甘肅軍務現在喫緊  
陶茂林著仍留軍營改爲署理甘肅提督俟軍務完  
竣再行回籍守制

初四日 戊戌 聯捷奏言 臣 所帶黑龍江官兵需用

軍器前經奏明由晉省代造昨准該撫咨稱製  
造尙需時日 臣 現在行抵西安晤商巡撫劉蓉  
擬暫假陝省軍器應用俟晉省軍器解到再行



歸還陝省庶不致久滯師行但黑龍江官兵素  
習弓箭西安所存弓箭無多現經劉蓉飭司趕  
辦一俟咨送來營臣卽統兵前進斷不敢稍事  
遲延

聯捷又奏言甘肅提督陶茂林所部勇丁潰散  
沿途裹脅焚掠擾及陝省寶雞迤東現由該撫  
派員前往招撫惟此隊潰勇膽敢結隊橫行並

張貼告示強索民間財物糧食其勢洶洶日漸  
東犯現已竄及省西蓋屋境內臣帶兵行抵陝

省曷敢稍存畛域刻已整隊以待儻該潰勇侵  
犯省垣臣卽會同地方官協力勦辦奏入

上命軍機大臣傳諭官文楊岳斌德興阿劉蓉沈桂芬  
聯捷曰聯捷所帶之黑龍江官兵旣乏軍器自難責  
其徒手禦敵聯捷請由陝省酌撥應用之處係爲因

時變通起見尙屬可行卽著咨商劉蓉先於陝省軍器內酌量撥用以利師行前據恩麟奏陶茂林部勇潰散數營當經諭令陶茂林等飛檄各路軍營沿途州縣一體遏截茲據聯捷奏陶茂林營中潰勇擾及陝省寶雞迤東復竄至蓋屋境內各等語此起潰散兵勇數日之間已至陝境且沿途張貼告示強索財物糧食斷非言語所能招集劉蓉現已派隊迎截卽

著督飭派出員弁實力截扼聯捷擬整隊以待儻潰  
卒侵犯省垣卽行帶兵協剿著照所請相機會辦不  
可徒託空言聯捷帶兵無多現在潰勇已及蓋屋其  
勢漸熾且蓋屋逼近南山萬一縱令入險則剿辦又  
形棘手劉蓉身任陝撫責無旁貸著卽遴派得力兵  
勇扼要嚴防毋令潰卒出境貽慮鄰封尤不得令其  
竄入南山致滋延蔓省城防守事宜德興阿務當會

同劉蓉熟籌妥辦毋稍疏虞湖北山西距秦甚近官  
文沈桂芬亦當一體嚴防勿令闖入如此股潰卒不  
能堵截縱令出省又如宋憬詩故事惟劉蓉德興阿  
是問楊岳斌前奏有取道荆紫關之語現在遙計師  
行定距入關不遠著卽偵探潰勇蹤迹攔頭截擊毋  
令竄近鄂境至該督所部新勇倉猝成軍心志未必  
能齊楊岳斌當嚴飭帶兵各員申明紀律約束拊循

毋得稍涉大意

同日都興阿穆圖善奏言四月初三日侍衛壽昌帶兵進剿紅柳溝距該鎮里許突遇馬步賊匪四五百名列隊迎拒該侍衛督兵截殺槍斃悍賊多名官軍乘勝追襲將鎮內餘賊揆殺罄盡旋據提督黃金山稟稱甯郡回首遞稟投誠臣等當飭黃金山責令該逆如能卽日獻城撤

三國書畫圖卷二  
三

圩納款輸糧始准投誠一面通飭各營嚴密防  
範勿墮奸計嗣據該提督面稟查明回衆確係  
眞降請予以限期俾得率衆來歸臣限以五日  
令將附城各圩一律騰出往南退紮十里然後  
限繳銀米若干交地方官賑撫難民必須於限  
內遵諭辦理方能議撫現在限期已滿該逆仍  
復詭詞乞緩難保非隱蓄奸謀惰我軍心況刻

下鹽茶餘匪有圖窺中衛之信更須慎益加慎  
臣等現已嚴飭黃金山並通諭各營不准再議  
受降一面激勵兵勇相機攻勦以期迅拔堅城  
都興阿穆圖善又奏言 臣穆圖善前委陳東霖  
招募楚勇兩營現在該員業已由楚招募成軍  
管帶起程不日抵甘該兩營應需月餉前經奏  
定由晉省撥解應請



飭下山西巡撫將此項勇餉仍由晉省按照楚軍章程  
籌撥俾資接濟

都興阿又奏言欽奉

諭旨垂詢穆圖善一軍能否分撥出關臣查甘省賊氛

徧地涇固一帶雖經雷正綰勦洗肅清而甯靈  
中衛正在喫緊西甯各屬仍有逆匪占踞鞏昌  
洮岷安定等城時虞竄撲現又肅州失事甘涼

危急撫彝黃家灣等處一片賊氛西北省防亦  
關至要是以 臣 疊請

飭催楊岳斌迅赴本任俾於省垣重地居中調度於全  
局大有裨益刻下雷正綰一軍已克鹽茶該處  
距靈州不過三站惟其閒道路阻滯尙須節節  
疏通至肅州踞匪 臣 現已檄催鶴齡迅速帶兵  
前往協剿但伏羌甯遠昨又飛稟告急曹克忠

一軍仍宜移扼鞏昌暫制南路目前甘省兵力  
不敷分布穆圖善一軍尙難分撥出關臣惟有  
督飭將弁迅克甯城俟楊岳斌各軍到甘或俟  
雷正綰抵靈州後再行斟酌機宜分兵勦辦方  
不致顧此失彼奏入

上命軍機大臣傳諭都興阿穆圖善雷正綰沈桂芬陶  
茂林恩麟曰甘省紅柳溝等處賊匪爲官軍擊敗甯

郡回首僞行乞撫都興阿限以時日令其交械獻城  
撤耳輪糧該逆仍復詭詞乞緩是其詭詐情形已可  
概見現在受降旣無把握自應鼓勵將士力行進攻  
不准仍許投誠懈惰軍情致墮詭計鹽茶廳餘匪有  
圖竄中衛之信都興阿當派兵要路遏截毋令任意  
奔突甯夏攻圍日久尙未克復深恐師老疲敝都興  
阿穆圖善等當設法迅行攻拔不可再事遷延雷正

三國書畫之要 二十三

縮一軍現已攻克鹽茶進圖靈州陶茂林一軍本可直取甘肅因所部勇丁潰散數營安定一帶賊勢較重尙復阻於西進曹克忠所部能否兼顧鞏昌移援安定著雷正縮妥籌商辦恩麟亦當添籌兵勇與陶茂林等互相聯絡力顧省垣俟蘭州附近地方肅清後卽當鼓行而西掃除肅甘並嘉峪關逆氛以通關外之路並著恩麟寬籌餉銀以濟軍食鶴齡一軍前

已有旨令駱秉章催令赴甘仍著恩麟陶茂林飛速  
迎提飭令迅赴肅州成祿所撥雷正綰六營亦可由  
省城次第進取西路以助聲威至甘省回匪到處皆  
有都興阿等俟甯夏克復後當與恩麟陶茂林等會  
商先擇最要處所力行勦洗其餘自可迎刃而解穆  
圖善亦可於彼時酌量帶兵出關楊岳斌俟抵甘後  
兵力厚集更可分路進勦陳東霖所募楚勇兩營月

餉仍著沈桂芬按照楚軍章程籌撥務須顧全大局  
不准再事推諉致渙軍心

初五日己亥楊岳斌奏言臣於四月十三日自襄

陽率領親兵先行就道至二十日抵陝西省垣

連日與撫臣劉蓉籌商一切據涇州知州林發

深稟稱安化元城子一帶賊蹤徧地東路喫緊  
復據雷正綰咨稱陶茂林所部勇丁潰散後又

復敗衄現在退守安定而逃勇游勇復團聚山  
南羣謀作亂刻下安定會甯固屬戒嚴省垣亦  
不免震動各等情查涇州安會爲赴甘必由之  
路該處旣逼近賊氛臣必須豫備一切以便沿  
途迎勦現催後路隊伍及糧餉軍裝等項迅速  
前來約計數日內可以到齊卽當整隊西行馳  
赴蘭州抵省後體察情形先於賊情緊急之處



調兵援剿蔣凝學一軍疊經遵

旨飛札嚴催計此時諒已統軍西發矣

同日劉蓉奏言甘肅提督陶茂林營勇潰散後  
在通渭縣屬攻寨搶掠現已竄近寶雞縣境分  
股竄至盩厔縣屬之啞柏鎮一帶並有由鳳翔  
城外零星東竄者該潰勇聚衆至六七千人共  
推副將高選清爲統領蔓延滋擾毫無忌憚臣

查寶雞盩厔一帶逼近南山若令該匪闖入貽  
患匪輕當派遊擊王守基等帶兵馳往勦辦並  
解散脅從以靖地方均奏入

上命軍機大臣傳諭楊岳斌劉蓉曰陶茂林營勇潰散  
沿途搶掠若不及早撲滅必致蔓延爲患劉蓉已派  
遊擊王守基等軍馳赴寶雞盩厔等處相機籌辦著  
卽督飭各軍實力堵扼勦撫兼施將脅從之人分別

遣散南山一帶最易藏奸若令該匪竄入勦辦又形棘手劉蓉務當添派兵勇擇要扼截勿令賊蹤闖入楊岳斌旣抵陝省卽著督率親軍先將此股潰勇迎頭截擊並催齊後起之勇到陝分路布置妥籌勦辦聯捷所帶之馬隊亦可由該督商同調派總須將此起潰勇趕緊就地殲除斷不可令其竄入鄰疆釀成大患其蔣凝學一軍現在行抵何處如已行近陝境

卽由該督飭令隨同征剿以厚兵力

五經通義  
卷之四  
二十一

欽定平定陝甘新疆回匪方略卷一百一乙

五  
年  
庚  
子  
秋  
八  
月  
庚  
子  
日  
學  
院  
藏  
書

五月初九日

癸卯

官文奏言遵

館  
藏  
書

旨籌議按月提款協濟甘餉臣查現在鄂省捐輸業已  
辦竣藩糧兩庫僅能撥供京餉而軍餉一切專  
以鹽課釐稅爲大宗每月勻支不敷尙鉅雷正  
縮請將原解多隆阿軍營月餉三萬五千兩改  
解該營濟用前因糧臺支絀未能照辦今甘肅

軍務正當喫緊關外逆氛猖獗實爲大局所關  
凡在臣工何敢稍分畛域當飭省局司道於無  
可籌撥之中竭力設措每月除撥還蔣凝學一  
軍舊欠銀二萬兩外按月再籌銀三萬五千兩  
解至甘省交楊岳斌軍營分撥接濟以期士飽  
馬騰嗣後楚省協撥甘省軍裝軍火等項亦一  
併解交楊岳斌轉撥各營以免歧誤而歸畫一

至現在議定之五萬五千兩總令按月如數撥解不至徒託空言奏入

上命軍機大臣傳諭官文曰現在甘肅軍務正當喫緊楊岳斌一軍人數較多需款尤鉅自應寬爲撥解以濟要需卽著照所議每月除撥還蔣凝學一軍舊欠二萬兩外按月再籌銀三萬五千兩派員解至甘省交楊岳斌軍營分撥接濟並著將協濟甘省軍裝軍



火等項一併解交楊岳斌轉撥各營以歸畫一經此  
次議定章程之後該督務當督飭局員按月源源籌  
解不准稍有蒂欠致干重咎

同日楊能格奏言臣查都興阿雷正綰兩軍暨  
慶陽環縣各營人數衆多每月所需餉銀非二  
十餘萬的款不敷分撥都興阿進攻甯夏正在  
喫緊雷正綰攻克黑城鹽茶後會同曹克忠等

軍進攻預望城下馬關埽蕩各處回莊當此軍  
威大振更應寬籌餉項庶冀一鼓成功乃四川  
河南山東山西等省協餉解到寥寥即使各該  
省如數解齊亦只有四五萬兩不敷甚鉅臣前  
在江蘇藩司任內稔知兩淮鹽課向來協濟甘  
餉每歲部撥六七十萬至四五十萬兩不等江  
海關稅課亦有協甘之款嗣因南省軍務緊要

早經停解上年克復金陵後兩淮引票暢銷鹽課大有起色江海關稅課收數亦旺似可以東南之有餘補西北之不足刻下肅州失陷甘涼被圍糜爛之勢已成亟宜設法補救仰懇

天恩俯念西陲情形萬緊大局攸關

飭下兩江總督江蘇巡撫於兩淮鹽課江海關稅課項下查照從前協甘之數各籌銀數十萬兩並於

五六月閒先籌銀二十萬兩分作兩批迅解慶陽糧臺俾臣得以酌量緩急按月勻濟以拯飢軍而維大局奏入

上命軍機大臣傳諭曾國藩李鴻章劉鄩膏曰甘省兵數日增餉源日竭雖經諭令四川河南山東山西等省按月撥解仍屬不敷支放都興阿一軍現在進攻甯夏雷正綰等軍於攻克黑城鹽茶後進攻預望勦

三國志卷之四十一  
四  
辦正在喫緊必須士飽馬騰方能迅速歲事著曾國藩李鴻章劉鄩膏於兩淮鹽課江海關稅課項下查照從前協撥甘餉之數各籌銀數十萬兩趕緊陸續撥解並於五六月間先籌銀二十萬兩分作兩批迅解慶陽糧臺以應急需毋稍延緩

楊能格又奏言前因鹽茶黑城各處敗匪勾結土匪及陝西悍回麇聚靈環鹽茶交界約二萬

餘人四出搶掠窺伺紅德城一帶意圖東竄臣  
恐官兵單弱飭令環縣知縣翁健調民團五千  
餘人協同嚴防一面飭提督魏添應統率各營  
實力堵禦四月初三初四等日該逆大股三四  
千人攻撲五箇掌營盤逼近紅德城我軍出隊  
迎擊時有檢斬嗣准雷正綰咨商會攻預望城  
臣復飭魏添應相機進剿該提督於四月十七

日拔營進紮山城等處突遇馬步賊三五千  
人蜂擁而來我軍分路截殺陣斬悍賊二百餘名  
奪獲馬匹槍礮多件現已進紮巴母堡等處惟  
查慶環各屬要隘路徑紛歧且靈州鹽茶所屬  
與定邊保安等縣小路處處可通該逆被勦窮  
迫難保不翻山越嶺豕突狼奔臣已檄飭定邊  
各營及陝甘鄰境州縣一體嚴防奏入報

聞

十五日酉己札克當阿伯錫爾奏言古城被陷奇

台存兵無多且乏火器勢難支持巴里坤哈密  
二城防務更形喫緊巴里坤滿漢官兵一千餘  
員名糧餉久缺該城領隊大臣印務係協領伊  
勒屯署理綠營總兵官係遊擊何瑄代辦現值  
人心驚惶竊恐難資駕馭哈密僅有本營官兵



五百餘員名並安西協屬派來官兵二百餘員  
名不敷分布查前准西安將軍都興阿咨稱穆  
圖善現在規復甯夏未能兼顧先派川北鎮總  
兵鶴齡帶兵一千五百名由川北取道出關並  
催肅州鎮屬官兵迅赴哈密堵禦等語迄今尙  
無回口確信賊勢猖獗實難久待仰懇

天恩飭催穆圖善統帶所部勁旅迅速出口進剿以解

倒懸再前次運存科布多餉銀八萬兩 臣等已  
飭弁由北路會提俟此項銀兩解到酌量分撥  
以濟軍需

札克當阿伯錫爾又奏言前准護理肅州鎮總  
兵德祥咨稱統兵出口正擬定期起程適護理  
督 臣 恩麟改委參將成桂護理肅州鎮篆等候  
交卸未能起行現經改派署遊擊尤光祖管帶

出關以資策應等語查去歲奏調此項官兵原  
期駐紮哈密以資防堵今古城失守軍務萬分  
喫緊而該遊擊尙未出口實屬貽誤戎機已飛  
咨成桂嚴飭尤光祖刻卽管帶援兵兼程前來  
儻再仍前玩延惟有據實奏叅以肅戎政

同日伊勒屯奏言准鎮迪道文麟咨開署領隊  
大臣色普詩新帶領兵勇赴古城救援行抵富

家莊地方遇賊騎千餘當率兵勇奮擊斃賊甚  
多次日賊大股來犯重重圍裹力戰兩時之久  
因衆寡不敵該大臣暨佐領惠斌協領功誦布  
守備高吉安力竭被害並陣亡兵勇四百餘名  
請催東路援兵等語臣已飛咨科布多參贊大  
臣廣鳳奎昌迅派蒙古官兵前往奇台一帶救  
援但目下烏魯木齊吐魯番古城先後失守緣

營兵丁星散僅有巴里坤滿漢官兵千餘名鄰境又無可調之兵軍務萬分緊急仰懇

天恩迅催都興阿統兵出關以解倒懸並請

飭下陝甘督臣速撥糧餉以濟兵糈均奏入

上命軍機大臣傳諭都興阿穆圖善廣鳳奎昌札克當阿伯錫爾伊勒屯恩麟曰古城失守奇台危急疊經諭令都興阿等派撥德祥鶴齡等軍出關援剿旋據

報德祥之軍已抵哈密本日札克當阿等二月二十三日摺報內稱恩麟改委參將成桂護理肅州鎮德祥因等候交卸未卽起程改派署遊擊尤光祖帶兵出關是否發報日期在德祥未到以前德祥及尤光祖所帶援師現在曾否行抵哈密著札克當阿伯錫爾飛速迎提並著恩麟懍遵前旨迅催赴援毋稍遲緩鶴齡一軍久已行抵秦州前經諭令成祿同該總

兵所部取道安定進剿肅甘踞匪卽乘勢規復嘉峪  
關相機出關督剿著都興阿穆圖善迅卽飛咨成祿  
嚴飭鶴齡一軍設法赴援成祿亦卽統帶所部相繼  
前進妥籌援剿現在哈密巴里坤兩城防務均形喫  
緊著札克當阿伯錫爾伊勒屯等各就存城兵勇慎  
密防範以待援軍並檄飭文麟激勵兵團固守奇台  
待援毋稍疏懈該二城需餉甚急前次運存科布多

餉銀八萬兩現經札克當阿等會派員弁赴科迎提  
著廣鳳奎昌卽將此項餉銀提交該二城派來員弁  
仍添弁兵沿途護解前赴哈密一俟解到卽由札克  
當阿等酌量分撥以濟軍餉奇台兵力單薄並著廣  
鳳奎昌於科屬蒙古官兵內酌撥勁旅往援其新疆  
南北各城現在情形並著廣鳳札克當阿等設法偵  
探迅速馳奏都興阿穆圖善仍遵前旨迅拔甯夏卽



統帶重兵出關剿賊並著恩麟將所需糧餉迅速寬  
爲籌撥以利軍行

十八日壬子楊岳斌德興阿劉蓉奏言陶茂林所

部勇丁潰逃入陝沿途搶掠臣劉蓉當派副將

彭體道前往曉諭茲據該副將稟稱潰勇馬隊

頭目張起德蘇興隆二員經反復開導尙知悔

悟其步隊頭目高選清卽高文義桀驁難馴輒

敢擁衆由寶雞拔隊直趨郿縣蓋屋鄠縣臣劉

蓉會商臣楊岳斌臣德興阿調派馬步各隊前

往攔截一面飭令彭基品王守基各率所部從

鄠縣後路躡追以杜回竄適伊犁參贊大臣聯

捷帶馬隊抵陝亦偕往助剿時該潰勇等竄踞

長安縣屬之梁家橋義井寨各堡見官軍出隊

高文義輒敢率衆抗拒彭體道麾軍鼓勇向前

張起德亦反戈相向殲斃潰勇二三百名餘衆遁入堡內堅閉不出各軍四面環逼復將抗拒之匪悉數斬馘蘇興隆卽將高文義縛獻衆始懼怯相率投誠約計三千餘人經臣等勒繳馬匹器械派員分起押解省城其在白家寨芙蓉村各堡盤踞者一律按清均各繳械就撫當卽分飭各營查點管押一面造具名冊分別資遣

回籍臣等查高文義由勇丁保至參將不思奮  
勇勦賊輒藉糧餉不繼率衆潰逃沿途滋事實  
屬悖逆不法現已就地正法梟首示衆張起德  
首先就撫隨同勦捕蘇興隆縛獻巨逆尙知愧  
奮均請從寬免議至竄赴甘肅兩當縣境內及  
百花川潰勇均已繳械乞撫通渭等處尙有另  
股潰勇南趨徽縣由小道竄向略陽近聞被前

途團勇攔阻仍復折回該潰勇如改道回川勢  
將由鳳縣直趨棧道臣等已飛飭劉縉嚴加堵  
截並咨四川督臣駱秉章飭屬一體防範惟聞  
後起潰勇一千餘名陸續入陝前隊已過鳳翔  
現飭劉縉帶隊攔截勿任分竄奏入

上命軍機大臣傳諭駱秉章楊岳斌劉蓉曰陶茂林所  
部勇丁潰逃入陝沿途搶掠經劉蓉會商楊岳斌德

興阿調派馬步各隊分投攔擊逆勇多就殲除其餘  
呈繳馬匹器械給資分遣辦理尙爲妥速高選清卽  
高文義業經劉蓉等訊明正法梟示張起德首先就  
撫隨同勦捕蘇興隆縛獻首逆尙知愧奮均著從寬  
免議至竄赴甘肅兩當境內及百花川潰勇均已分  
別繳械就撫而通渭等處尙有另股潰勇竄向略陽  
復被前途攔阻折回又有後起潰勇一千餘名陸續

入陝前隊已過鳳翔著劉蓉卽督飭劉縉等分股剿辦勿任分竄其有欲由棧道入川者並著駱秉章飭屬一體防範勿稍大意甘肅軍情緊急都興阿在甯夏久未得手恩麟一籌莫展連失嘉峪關肅州而甘州又復告急省城有坐困之勢楊岳斌若不趕緊西行恐局勢日非將來愈難著手著於接奉此旨後剋日整隊赴甘肅省城接印任事都興阿穆圖善等軍

俟楊岳斌抵甘後卽可酌量令其出關是楊岳斌只須駐紮甘省督辦軍務毋庸出關而於關外軍務亦有裨益務將軍營惡習地方積弊認真挽回補救煥然一新並將交查事件秉公辦理以副委任

劉蓉又奏言陶茂林六七千之衆同時潰散事屬罕聞今高文義等旣經擒獲自應推究潰散之由爲將來整頓之計當經督飭西安府知府



呂儁孫將高文義研訊據供陶茂林所統二十餘營每營勇丁實止三百餘名陶茂林曾由鳳翔隨帶回女並眷屬赴甘其弟陶生林陶兆熊陶萬成亦均攜有婦女陶生林性情尤爲苛刻陶茂林每遇紮營拆毀民房搜搶婦女騷擾民間無所不至自同治二年十二月發過餉銀後僅於三年七月及四年三月發給二次營官又

多剋扣是以每勇僅得一兩三四錢不等口糧  
麩斤亦止發過十餘次不敷餬口陶茂林令各  
營兵勇下鄉搶擄麥糧自行磨食仍於月餉內  
扣除麩價銀兩因此軍心解體怨恨滋深自入  
甘境疊次與回逆打仗馬步不敵每仗不過傷  
斃數賊通計前後殺賊不滿百名等語訊之張  
起德蘇興隆亦稱上年領餉一次後於十一月

發過步勇每名餉銀六錢本年三月又發過步  
勇每名餉銀七錢馬隊每名亦祇發過銀一兩  
九錢現逾一年之久並無口糧可領以致兵勇  
潰散並稱曾經謁見護理陝甘總督恩麟面諭  
曾發餉銀十六萬兩又每勇賞犒銀二兩該兵  
勇等均未領過等語復傳陳熙祿劉廷獻郝金  
城陳占魁等質訊衆口一詞臣竊惟方今時局

艱難回氛猖獗全賴統兵大員與軍士同其甘  
苦方足以資鼓舞而奏膚功陶茂林官至提督  
統領萬餘之衆非惟不加體恤並且任意剋扣  
實屬有負委任至高文義等所供陶茂林貪淫  
刻薄缺短勇額縱擄民糧捏報戰事各情雖係  
一面之詞難以憑信惟聞該提督前在鳳翔收  
納回女致將領紛紛效尤其營官多派兄弟親

屬充當以專其利勇數實不足額又因製造旗  
幟號衣各項扣除各勇月餉軍中早已嘖有煩  
言是該弁勇等所供各情未必盡屬無因臣與  
陶茂林同籍湖南向會相識若竟瞻徇不言竊  
慮積弊相承軍心益渙於甘省大局關繫非淺  
請

旨飭下陝甘總督楊岳斌澈底查明覈實辦理以伸軍

律

劉蓉又奏言甘省自逆回搆禍以來我

皇上宵旰憂勤籌兵籌餉日期底定西陲又安黎庶各

路統兵大員月有捷報似乎指顧可就蕩平然

弊竇日滋賊勢卒無大損臣每接見由甘來陝

員弁詳加查詢則所報攻克斬馘多屬空言每

出隊攻剿輒虛數面聽其走逸是以此剿彼竄

三國志卷之三十一  
二  
殄除之數無多而蹂躪之地轉甚

皇上覽其奏報以爲克城破壘勦勞卓著安知其流弊之至此哉回黨雖多其大隊逆酋不過數股使就渠魁所踞之地環攻而聚殲之勦一股卽了  
一股而各統將不肯出此者蓋慮合圍鏖戰勝敗難期不如擊之使走捷報頻聞可爲倖功邀賞之地此弊之在於冒功者也雷正綰所部二

十九營今增至四十餘營陶茂林所部十七營  
今增至三十營曹克忠所部十四營今增至二  
十餘營營數日益而勇數並不見多蓋向章五  
百人爲一營今則每營實數不過三百餘人且  
聞各軍赴鄂赴豫招募勇丁多收遊勇撿匪以  
充數其所立營官百長多非其人以故沿途滋  
擾毫無紀律此弊之在於冒餉者也軍營保舉



優厚所以鼓勵戎行今則被叅之劣員隔省之  
牧令往往獻金納贄投拜門牆以邀殊賞

皇上因甘省行軍較苦凡有所請無不允准於是軍營  
遂成結納夤緣之捷徑流品猥雜賄賂公行此  
弊之藉軍功以納賄者也甘省地瘠民貧本鮮  
儲蓄近值兵燹連年耕種尤少乃各營捐派糧  
石至再至三甚至懾以兵威肆意搜掠民間蓄

怨旣深遂亦集團相抗强者幸獲苟免弱者死  
於非辜竊維

朝廷命將出師本以救民爲事今統兵者疾視窮  
黎重加荼毒故近來甘省之患不在賊而在勇  
此弊之藉行軍以肆虐者也凡此數弊實爲大  
局之憂方冀督臣楊岳斌迅速赴甘力圖挽救  
不謂逆氛北犯局勢驟更環顧甘省任事諸臣

無能膺茲鉅任者恩麟之昏庸陶茂林之貪劣  
固屬壞事有餘雷正綰向著勇略近聞嗜好已  
深恐亦難期振作都與阿明達而懦穆圖善忠  
厚寡謀他如玉通成祿聯捷諸人尤難委任且  
以甘省一隅之地而統兵大員專摺言事者已  
至八員之多意見紛歧不相統屬楊岳斌每與

臣熟籌深慮未嘗不歎整頓之無術該督臣近

奉

諭旨移師赴直東交界力固畿疆刻下整頓東行如釋

重負獨臣旦夕憂慮竊恐事機之壞日積日深

不言則負

君恩言之則招衆怨顧念甘事壞則陝必不支爲此籲  
懇

天恩俯念西陲大局

特簡重臣總司兵柄督辦防剿庶大局尙可支持奏入  
上命軍機大臣傳諭楊岳斌曰陶茂林所部勇丁潰逃  
入陝經楊岳斌等調派兵勇迎剿將勇目高選清等  
拏獲訊其潰散緣由僉供由於陶茂林貪淫刻薄短  
缺勇額縱擄民糧捏報戰事所致雖係一面之詞惟  
劉蓉前已訪聞該提督前在鳳翔收納回女所部將  
領紛紛效尤其所設營官多派兄弟親屬充當以專

其利勇數實不足額又於製造旗幟號衣各項均將  
各勇月餉銀兩扣除是高選清等所供各情必非無  
因著楊岳斌於行抵甘省時將劉蓉所奏陶茂林貪  
汙不法各重情逐一密查據實叅辦毋稍徇隱至甘  
省吏治軍務日久總無起色據劉蓉奏稱其弊實由  
於地方大吏督兵大員冒功冒餉藉軍功以納賄藉  
行軍以肆虐等語所奏不爲無見並著楊岳斌破除

情面認真整頓挽救務將從前積弊盡力湔除如該  
省官吏仍敢故態復萌不知振作楊岳斌卽當隨時  
嚴叅懲辦不准稍事姑容致負委任

同日恩麟奏言據王子莊州同崔鳴稟稱接准  
臺站遞送臣衙門公文封面係肅州知州陳鏞  
銜名而蓋用安肅道關防因事屬可疑恐有詐  
冒隨卽折閱內係陳鏞稟稱肅州現已安靜毋

庸調兵進剿等語續又接據該州同稟稱探聞  
陳鏞在各鄉逼令漢民降賊並調漢團入城豫  
備抵抗官兵等情臣接閱之餘不勝詫異惟陳  
鏞因何從逆總未得其確耗茲據護肅州鎮總  
兵成桂稟稱口外青頭山回教獵戶先於二月  
二十一日糾衆來肅聲稱向前護肅州鎮總兵  
德祥索取舊欠口糧鹽菜銀兩旋經署安肅道



恆齡等開導出城至二十五日該獵戶突然聚  
衆擁入嘉峪關內戕官踞城肅州知州陳鏞恐  
本地回民藉端生事前往彈壓不意被匪拘執  
是晚嘉峪關獵戶已潛入肅州東關頃刻之間  
人聲鼎沸城內回弁馬天材劈開東門回匪獵  
戶一齊擁進城內登時火起恆齡率兵勇迎擊  
成桂登城拒戰因回官回兵反戈相向致受重

傷墜落城壕吏目劉秀挹亦跌落城外幸民勇  
護救擡至南鄉民莊調治請兵援救等語 臣竊  
維肅州失守逆燄益張後路援兵行程遲滯旣  
不能剋日而來陶茂林一軍當敗潰之餘又勢  
難振作惟涼州現尙安靜堪以移緩就急隨飛  
飭署甘涼道黎獻帶領兵勇一千七百名並添  
派守備劉裕升統帶川勇一營於四月十七日

自涼州拔隊節節控捕前進又抽調提標官兵  
及張掖縣民團以資助勦並查前調昆都倫達  
什才楞部落蒙古官兵尙未據報起程復飛飭  
遊擊楊天興等派弁迎催聞川北鎮鶴齡一軍  
已抵鞏昌臣仍飛催該鎮星速前進令其專顧  
肅州至成桂所稟各節有無捏飾殊難憑信自  
應查明叅辦惟聞肅州鄉團俱欲勦賊復仇統

聞

帶須人現仍令其設法號召並督率各起兵勇  
併力殲勦以期早拔堅城毋任久踞至陳鏞因  
彈壓被執其輕入賊巢已屬躁率至逼民降賊  
尤爲法所不容但回情詭譎難保非假冒地方  
官銜名煽惑人心俟查訪確情另行覈辦至署  
安肅道恆齡及各武職員弁下落容俟查明奏

恩麟又奏言上年秋冬靈州股匪竄擾中衛及廣武棗園等處均經署甯夏鎮總兵梁生嶽撥兵擊退並由都興阿營中派來知州王贊襄會同防勦該員在各鄉抽練勇丁二千五百餘名會合梁生嶽官兵一千五百餘名分布防守本年正月至三月該匪屢出馬步大隊分路竄擾梁生嶽王贊襄督率所部隨時兜勦共斃賊一

千數百名奪獲器械旗幟牲畜無算其甯夏踞  
匪因大軍連日攻擊十分窮蹙亦欲爭中衛一  
路西竄甘涼梁生嶽密飭廣武棗園防營加意  
防範四月初九初十等日有大股賊匪攜帶眷  
屬由五唐等處漸逼廣武官軍開礮環擊斃賊  
百餘名傷斃賊馬數十匹該逆向西奔竄徑擾  
棗園梁生嶽聞報派都司魯剛秦帶官兵三百

名王贊襄亦派勇五百名兩路包抄該逆登時  
潰亂陣斬八九百名復跟追十餘里沿途疊有  
斬殺惟甯郡官兵已將賊匪三面圍困該匪鋌  
而走險圖竄中衛勢所必然廣武棗園爲赴中  
衛要隘雖經兵勇擊退難絕其覬覦之心查梁  
生嶽所部暨王贊襄練勇僅四千餘名若該匪  
大股西犯勢難抵敵雷正綰一軍已由鹽茶北

趨臣飛咨該提督抽撥數營駐守該縣力遏敗  
匪西竄一面咨商都興阿設法兼顧臣仍嚴飭  
梁生嶽等妥爲防禦毋稍懈弛奏入

上命軍機大臣傳諭都興阿穆圖善雷正綰恩麟曰甘  
省肅州逆回勾結獵戶踞嘉峪關後糾衆攻撲州城  
肅州知州陳鏞出城彈壓被匪拘執該逆潛入東關  
復勾結城內回弁馬天材劈開東門一擁進城護總



兵成桂拒戰受傷落壕經民勇救護在南鄉民莊調治是否聞警先逃捏詞具報暨拒戰跌落城外之署吏目劉秀搨有無捏飾具稟情事均著恩麟確切查明據實叅辦署安肅道恆齡是否被戕暨各武職員弁下落著一併查明具奏至署肅州知州陳鏞被匪拘執輒用安肅道關防印發稟函捏稱肅州現已安靜毋庸調兵進剿並逼令各鄉漢民降賊抗拒官兵

甘心從逆實爲法所不容抑係該逆假冒地方官銜  
名思逞狡謀著恩麟一併確查覈辦肅州回氛甚熾  
恩麟所派黎獻等軍由甘州節次撥剿前進並抽調  
官兵及張掖民團協助卽著檄飭該道等聯絡進攻  
並飭成桂會同劉秀搃激勵鄉團併力殲剿以期克  
拔堅城毋任逆匪久踞靈州竄匪疊撲中衛縣城及  
廣武棗園等處甯郡踞匪因被剿窮蹙亦糾衆力爭

中衛一路冀圖西竄甘涼雖經官軍節次堵擊敗走  
惟梁生嶽所部數祇一千五百餘名合之都興阿所  
派王贊襄練勇亦僅四千餘人兵力較形單薄如該  
匪大股西趨勢難抵禦雷正綰一軍已由鹽茶北進  
著卽酌度軍情抽拔數營徑赴中衛駐守力遏敗匪  
西竄都興阿穆圖善當懷遵前旨乘甯夏賊勢已蹙  
迅圖攻拔卽分兵兼顧中衛等防鶴齡一軍已抵鞏

昌並著都興阿穆圖善雷正綰恩麟催令迅援肅州  
與諸軍協力進剿俟肅州克復仍令星速出關恩麟  
請調之昆都倫等部落蒙兵著仍遵前旨毋庸調往  
以節糜費

恩麟又奏言川北鎮鶴齡一軍已於四月初一  
日行抵秦州專差齎稟備述兵艱待餉行止兩  
難情形適西路賊氛正熾東路安定縣城被圍

未解盼望援師急如星火 臣隨卽飛飭秦州知  
州張徵先措銀一千五百兩又將隴西縣庫所  
存河南解甘餉銀二千兩一併撥歸該鎮收用  
催令卽日拔隊疾趨安定會同陶茂林力解城  
圍再行赴省其短欠兵餉俟到省後仍由 臣設  
法接濟冀收飽騰之效奏入報

聞

欽定平定陝甘新疆回匪方略卷一百二 乙丑年

五月二十一日 乙卯 成祿奏言前經奏明由雷正

綰派撥六營交 臣 管帶西征當卽先率數騎馳

抵靜甯函催該營星速前來並分咨聯捷鶴齡

各領所部迅來會合剋期進發因途次聞河西

賊氛日熾陶茂林部勇潰敗逆回糾合河狄之

衆圍逼安定陶茂林駐紮城中僅只四營合之

分紮金縣靖遠者不足十營之數且軍心潰散  
之餘其勢斷不能支更恐賊以另股牽掣安定  
阻遏我軍而以全力直撲省垣根本重地何堪  
設想奈聯捷鶴齡各軍遲遲未到雷正綰允撥  
六營歸臣調遣亦僅有趙德正馬天祥二營前  
來亟欲親率進援深慮衆寡不敵正在爲難之  
際適雷正綰飭提督劉正高統帶馬步七營馳

赴會甯來解安定之圍臣卽飭趙德正馬天祥

兩營併力相助仍飛調鶴齡一軍迅速前進廓

清東路庶聯捷之軍踵至得以振隊西行卽楊

岳斌所統大軍亦可長驅直進惟臣軍祇此二

營旣無糧臺又無的餉日來暫紮靜甯賴署知

州李光興竭力支應及通渭縣運濟麩斤藉免

枵腹以後聯捷等軍齊集更難爲繼昨經通飭



附近各屬力籌接濟迄無一應雖由用兵日久  
官民交困或亦地方官不知緩急玩誤軍情嗣  
後各州縣如能力籌軍糈應由臣奏請獎勵其  
意存推諉者分別叅處以示懲勸仰懇

飭下護理總督恩麟嚴飭經過各屬一體供應以免譁

潰臣昨晤雷正綰言及上年所解烏魯木齊餉

銀二萬兩因道路梗塞收存慶陽糧臺當經臣

派員守提准臬司楊能格咨復業經撥用相應  
請

旨飭催楊能格迅將前項銀兩如數籌還解赴臣營以

充軍實

同日都興阿穆圖善奏言甘省賊氛徧地官軍  
分布難周勦辦極爲棘手該逆疊次乞降並無  
獻城撤圩之意僅以就撫爲名爲緩兵之計暗

於各處挑壕築壘從上游各渠放水希圖淹斷  
營路逞其叵測經 臣等嚴飭各統將不准受降  
並親歷各營踏勘地形相機宣洩一面催趲糧  
米固結軍心無如邊外沙磧轉運維艱陶茂林  
等營因糧缺潰散該逆乘虛攻破七營我軍退  
守安定各路援甯之賊勾結甯郡踞逆堅壁死  
守又分股撲犯廣武及石空寺堡勝金關等處

窺伺中衛該處地方文武稟報防勦情形互有  
歧異當派甯夏道三壽卽日起程由阿拉善草  
地繞赴中衛接篆任事就現有兵團實力捍禦  
惟陶茂林一軍退守安定省垣尤爲可慮前據  
楊岳斌函稱三月下旬已過樊城計日早抵西  
安應迅由南路進省以資鎮攝臣等已疊次函  
催至刻下甯郡情形惟有暫時休息審度水勢

趨向修築堤堰換隊移營設計攻取其花馬池  
定邊縣後路逆匪據翁同書報稱三月十七日  
經侍衛壽昌會同副將段登雲等三面兜擊斬  
獲甚多餘逆向羊圈山一帶奔竄又准統領慶  
防兵勇提督魏添應報稱四月二十一日勦賊  
獲勝生擒逆匪訊悉該逆聚於下馬關韋州甜  
水堡半箇城並靈州大水坑金積堡等處意圖

合股竄回陝西等語查此股賊匪雖屢經懲創  
無如勾結日衆仍形猖獗請

旨飭催雷正綰迅卽督軍由東路前進直取靈州兼顧  
慶防與後路各軍聯絡聲勢扼制東竄以收兩  
面夾擊之效均奏入

上命軍機大臣傳諭都興阿穆圖善雷正綰楊岳斌成  
祿聯捷恩麟楊能格曰甘省河西賊匪甚熾逆回復

糾合河狄之衆圍逼安定陶茂林駐紮城中僅只四  
營合之分紮金縣靖遠之軍不足十營之數儼該匪  
牽掣安定各軍分撲省垣勦辦更形棘手雷正綰現  
已分撥趙德正等二營歸成祿調遣並飭劉正高等  
七營馳赴會甯以解安定之圍卽著雷正綰嚴飭劉  
正高等統帶馬步七營奮力進勦迅解城圍並著成  
祿激勵趙德正等會合助勦廓清東路並飛調鶴齡

等軍星速西行以厚兵力前因陶茂林潰勇逼近陝西省城諭令聯捷俟將潰勇辦理完竣卽速西行嗣據楊岳斌奏稱業已分別勦撫刻下成祿所部僅止二營不足以資攻勦聯捷於接奉此旨後卽著統帶所部迅速西進與成祿會兵一處迅解安定之圍毋得遲延干咎前已諭令楊岳斌剋日由陝赴甘卽著懍遵前旨星速帶兵前往將各路回匪相機勦辦並



分兵會剿安定之匪毋任滋蔓都興阿穆圖善雷正  
綰迅卽攻拔甯靈以便督軍馳赴西路將安定一帶  
並肅甘等處回匪悉數殲除肅清關內以靖疆圉其  
蘭州省城防務卽著恩麟督飭防兵嚴密防範勿稍  
疏虞成祿所部各軍應用糧草各項恩麟督飭沿途  
各該地方官妥爲接濟儻該地方官不知緩急玩誤  
軍糈卽由成祿知照恩麟查明懲辦慶陽糧臺前存

應解烏魯木齊餉銀二萬兩前據文煜奏稱已撥解  
涇州糧臺接濟雷正綰營餉俟各省協餉解到提還  
歸款現在成祿軍營需餉甚急卽著楊能格迅速妥  
爲籌畫將前項應解銀二萬兩派員解交成祿軍營  
俾充軍實正在寄諭閒據都興阿穆圖善奏逆回以  
就撫佯緩我師並未獻城撤圩暗於各處挑壕築壘  
從上游各渠放水希圖淹斷營路情殊叵測經都興

阿嚴拒受降並踏勘地形相機宣洩一面催趲糧米  
固結軍心辦理尙屬周妥惟援甯竄匪勾結甯郡踞  
匪堅壁死守分股撲犯廣武及石空寺堡勝金關等  
處窺伺中衛甚緊該將軍等札派甯夏道三壽前往  
駐守卽著嚴飭該道員督率兵團實力捍禦毋稍鬆  
勁刻下賊情狡詐尤須加意嚴防都興阿等惟當蓄  
養銳氣修築隄堰換隊移營設計穩慎攻取其花馬

池定邊縣後路賊匪雖經翁同書等擊退向羊圈山一帶奔竄靈州大水坑等匪亦將合股竄回陝西是後路及東竄各匪均關緊要卽著雷正綰迅卽督軍由東路前進直取靈州兼顧慶防與後路各軍聯絡聲勢扼截東竄以收夾擊之效安定一帶情形喫緊省垣尤爲可慮楊岳斌卽迅由南路進省以資鎮攝並分兵援剿各路勿稍延玩

同日

上命軍機大臣傳諭都興阿楊岳斌曰前因甘肅布政使恩麟辦理回務狃和殃民疊經被人叅奏並據甘省生員胡第甲等聯名呈控先後交熙麟多隆阿查辦上年五月閒復令都興阿秉公確查據實具奏甘省回氛徧地日益蔓延若地方大吏能於初起之時妥爲籌辦何至釀成巨患不可收拾恩麟被叅各節

必須迅查嚴辦方足懲養癰貽患之咎都與阿現在  
進攻甯夏未能赴省卽著毋庸查辦楊岳斌昨已命  
其馳赴蘭州著該督於到省後將恩麟被叅各款一  
併詳查具奏不准稍有徇隱

二十六日庚申楊岳斌奏言聞拾匪意圖北竄直

東一帶防勦緊要臣遵卽料理軍裝定於二十

六日起程徑赴直隸會同督臣劉長佑商酌勦

辦力固畿疆近日甘省情形預望城旣已克復  
雷正綰等軍卽可會攻甯夏東北一路尙爲得  
手惟西路肅州甘州一帶賊勢日熾南路階州  
未復安定被圍狄河匪黨又時在省南數十里  
飄忽往來大有窺伺省垣之意該省兵糈奇絀  
民情困苦撫綏籌畫在在需人臣督師赴直往  
返需時雖護理有人究未便懸缺久待致誤全

局仰懇

天恩准 臣 開缺專辦勦賊事宜另

簡大員前往鎮撫於西事更有裨益奏入

上命軍機大臣傳諭楊岳斌曰前因直東兵力漸厚諭  
令楊岳斌剋日整隊仍赴甘肅省城該督此奏自係  
尙未接奉前旨甘省賊氛甚熾省城尤岌岌堪虞亟  
須知兵大員前往勦辦以支危局著楊岳斌懍遵五



月十八日以後疊次寄諭星速統帶所部馳赴甘肅  
省城接印任事務將該省軍營惡習地方積弊次第  
整頓力挽頽風以副委任該督所部兵勇惟當選擇  
精銳統帶赴甘如有心志不齊戰守均未能得力者  
卽著隨時裁汰無須帶往以免別滋事端所請開缺  
另簡大員以專責成現在甘肅事機孔棘前諭該督  
赴直勦匪一俟蕝事仍須前赴陝甘總督之任俾資

鎮撫乃楊岳斌接奉馳赴直隸之旨率請開缺專辦  
勦匪事宜未免意存趨避有負朝廷委任所請著不  
准行

二十八日壬戌文麟奏言上年六月閒逆回變亂

攻破各處城池以濟木薩爲屯糧之地有悍賊  
看守臣派濟木薩縣丞陶珮帶勇八百名相機  
規復並飭署昌吉縣知縣恩錦帶勇五百餘名

及恆頤所募練勇三百餘名隨後接應三月初  
六日夜間該員等先約濟城戶民內應出其不  
意一齊攻入該逆棄糧逃竄卽將城池收復獲  
雜糧一萬數千石有零現在城西三台一帶尙  
有馬賊窺伺臣復札飭該員等擇要紮營嚴密  
防堵所得糧石封存守護藉資兵食惟此項勇  
丁初經戰陣不諳紀律必須有官兵二三千名

前來協助方可設法進剿前聞肅州頭起官兵  
於正月間已抵哈密至今杳無音信若援兵不  
至恐賊復東犯勢必不支仰懇

天恩飭下各路帶兵大員迅速進剿以顧大局

文麟又奏言恩錦等在滋泥泉地方拏獲奸細  
多名解送來營訊據供稱逆回索煥章由吐魯  
番庫車調出纏頭逆回同到迪化會合迪化逆

回前往瑪納斯堵兵並分撥纏頭逆回分紮至  
阜康吐魯番迪化等語臣查滋泥泉距濟木薩  
僅一百八十里阜康距滋泥泉僅九十里難保  
該逆不復東犯卽飭恩錦等挑選練勇進紮三  
台嚴密堵禦並派主事錫綸速赴濟木薩與鈺  
成等扼紮柳樹河聯絡聲勢設法籌勦奏入

上命軍機大臣傳諭都興阿穆圖善雷正綰楊岳斌劉

蓉成祿聯捷廣鳳奎昌札克當阿伯錫爾恩麟文麟  
曰濟木薩城爲回匪屯糧之地文麟派令恩錦陶珙  
等各帶練勇相機前進出其不意將濟木薩城池收  
復得獲雜糧一萬數千石有奇惟城西三台一帶尙  
有馬賊窺伺且文麟拏獲漢奸訊有逆回索煥章糾  
合黨衆前往瑪納斯堵兵並有分紮阜康吐魯番迪  
化等情是該逆現雖棄糧逃走難保不仍圖東竄文

麟務當督飭在事員弁嚴扼三台等處要隘實力堵  
剿毋稍疏虞東路防守事宜札克當阿伯錫爾仍須  
嚴密布置並知照伊勒屯何瑄一體嚴防不可稍有  
疏失前據札克當阿等奏德祥等俟交卸鎮篆改派  
署遊擊尤光祖帶兵出關迄未起程等語本日復據  
文麟奏前聞肅州頭起官兵已抵哈密至今並無音  
信是德祥之軍行抵哈密一節尙係傳聞之詞萬一

賊蹤東犯大局將不可問著恩麟懷遵前旨迅催德祥尤光祖等由嘉峪關等處埽蕩而前剋日出關所需餉銀並著恩麟源源籌濟鶴齡一軍前已行抵秦州著成祿調到該總兵所部取道安定進剿肅州踞匪出關勦賊西路賊氛甚熾成祿部衆無多卽合之趙德正馬天祥二營及鶴齡之軍亦恐不敷調遣雷正綰續派之提督劉正高等七營若於安定解圍後



由成祿統帶西行兵力自可足用著該提督咨商雷  
正綰妥籌調派聯捷所帶馬隊五百名並著迅帶赴  
甘與成祿合兵一處相機前進不准再事逗留自干  
咎戾昨已有旨令楊岳斌挑帶精銳兵勇馳赴甘省  
接印任事著該督恪遵疊次諭旨剋日赴甘不得稍  
有遲誤甯夏郡城久攻未下著都興阿穆圖善督飭  
各軍勇猛圍攻迅圖克復以期次第戡定該將軍督

撫等務當仰體朝廷西顧之懷奮勉圖功毋得稍涉  
因循致負委任巴里坤等城餉銀業據明誼等分撥  
銀兩由僻路解往接濟其科布多所存餉銀著廣鳳  
奎昌探明道路設法籌解毋令缺乏塔爾巴哈台前  
據廣鳳等奏有回匪變亂之信數月以來伊犁亦杳  
無奏報近日情形究竟若何並著廣鳳等隨時偵探  
確情據實具奏

同日雷正綰楊能格奏言曹克忠自收復半角  
城後於四月二十日拔隊進紮修立營壘逆衆  
馬步五千餘人突來攻撲我軍四路齊出連斃  
三十餘名賊卽返奔遺棄軍械甚多我軍且追  
且戰斃賊三百餘名逆勢窮蹙竄至距半角城  
三十餘里之楊家井兒老驢斷頭二處我軍跟  
躡奮追當將逆巢焚燬復斃賊五百餘名生擒

逆黨馬生萬等五十七名奪獲戰馬二百餘匹

二十八日臣正縮督率各營進紮黃花塘該處

窮谷荒山水草枯竭距預望城八里中隔深溝

一道橫互縣長該逆恃其險阻據溝力抗臣正

縮激勵將士誓在必克本月初二日提督譚玉

龍胡大貴等環溝列陣開放槍礮該逆亦用大

礮還擊總兵陳義等各選精銳挖礮道該逆

礮石齊下我軍受傷多名譚玉龍等軍鼓勇先  
登各軍相繼而進守隘之賊棄械狂奔悉被我  
軍斬馘時巢內援賊千餘名飛馳來拒經總兵  
劉效忠等督率馬隊縱橫截殺殲賊三四百名  
我軍步隊全數踰溝知府雷聲遠首先帶隊登  
城總兵雷恆等接踵而登將守陴之賊擊退胡  
大貴麾軍從東門攻入譚玉龍各營從南門攻

入逆猶死拒我軍力戰三時之久又殲賊二千  
餘名生擒悍逆馬從升等一百餘名奪獲礮械  
二千餘件羸馬三千餘頭當將預望城老巢攻  
克胡大貴等各督馬步盡力窮追初四日追至  
下馬關該逆傾巢夜遁立將下馬關收復臣正  
綰現由韋州一帶直擣靈州與曹克忠分道並  
進我軍現已超出環縣之北慶陽防務已鬆臣

能格飛咨魏添應由東北之甜水井截剿遏賊  
東竄至各軍將士迭克巨巢不無微勞足錄容  
俟查明與前次克復官橋堡李旺堡出力人員  
及疊次傷亡員弁兵勇再行奏請獎卹

雷正綰又奏言近日糧餉奇絀涇州各屬羅掘  
已盡恩麟指撥辦運各屬亦有踴躍急公之員  
節經臣擇優請獎立荷

恩施無如地土枯瘠籌辦維艱兼之移軍北進距後路  
日遠駝運無資難於周轉平固州縣員缺虛懸  
疊催恩麟委員接署數月之久仍無來者以致  
沿途轉運乏員經理前請

飭派陝西藩司林壽圖派員督辦糧運迄今未准咨復  
猶幸士卒用命疊破堅巢搜獲盜糧又有就撫  
各回送糧協濟得以楮持三月之久今鹽茶以



北一帶回村疊經大兵掃蕩既無回戶饋糧又  
無州縣辦運嗷嗷士卒撫馭爲難現與恩麟楊  
能格咨商由慶陽各屬就近籌運是否能資接  
濟尙未可知

雷正綰又奏言曹克忠所部十九營每日需用  
麩斤二萬有餘前經恩麟指撥隆德靜甯等處  
辦運該州縣本未能按日供支今成祿劉正高

等十有餘營進援安定該州縣之糧自必改供  
援軍曹克忠營中軍食愈無所資至協餉一項  
向賴陝省接濟每次解銀八千兩現在新募八  
營陸續到甘營數增於曩日餉項萬不敷用該  
省並未能按月解到至各營帳房亦久未更換  
轉瞬大雨時行兵勇無所棲止除咨商恩麟楊  
能格將該營糧運妥速籌辦外查陶茂林所部

二十餘營一應餉需軍火向由陝省供支今該  
提督部衆潰散所存無多所有陝省解供餉項  
軍火請

旨飭下陝西撫臣劉蓉改解曹克忠軍營並趕解帳房  
數百架以濟要需奏入

上命軍機大臣傳諭都興阿穆圖善雷正綰楊岳斌駱  
秉章劉蓉恩麟楊能格曰半角城預望城下馬關等

處久爲回逆巢窟經雷正綰督飭各軍奮勇進攻疊克堅巢勦辦甚爲得手卽著該提督與曹克忠各軍分路並進直搗靈州肅清北路此次在事出力陣亡員弁著准由雷正綰查明與前次克復官橋堡等處之案一併奏請獎卹都興阿穆圖善督兵圍攻甯夏郡城日久未下殊屬延玩著卽激勵兵勇奮力圍攻迅圖蕝事不得再事遷延致干重咎昨因成祿兵力

太單諭令雷正綰將派赴安定之劉正高等七營於  
解圍後由成祿酌帶西行第雷正綰先後派撥十二  
營駐防安定一帶現在雷正綰乘勝進規靈州兵力  
未厚若由川省酌撥數營進駐安定一帶則雷正綰  
先後派出各營仍可酌量調回策應著駱秉章斟酌  
情形妥籌調撥雷正綰移軍北進轉運益艱必應寬  
籌糧運方能源源接濟不至枵腹荷戈著恩麟楊能

格飭屬就近籌運糧草毋令缺乏前因雷正綰營中糧運緊要諭令劉蓉飭林壽圖派員督辦何以尙未辦理著劉蓉督令林壽圖實心區畫妥籌接濟不得稍存畛域之見致誤事機陶茂林部衆潰散所存無多現在曹克忠一軍營數日增糧餉兩絀該總兵打仗向稱勇往若令飢軍無食譁潰堪虞著劉蓉卽將陝省按月解供陶茂林餉項軍火改解曹克忠軍營

並製造帳房數百架一併解往以濟要需毋稍遲誤  
雷正綰又奏言疊奉

諭旨令臣酌量分撥隊伍赴定邊花馬池一帶爲都興

阿後路聲援等因查臣營距花馬池較遠賊氛中梗

各營除撥赴安定及各路堵剿外僅賸十六營

前剿後防兵力無可再撥現在慶環防務旣鬆

臣已咨商楊能格飛飭魏添應迅統防兵卽日

聞

進勦仍嚴防東路以資兼顧並咨明撫臣劉蓉  
嚴飭防營一體堵禦奏入報

閏五月初六日己巳楊岳斌奏言臣於本月初一

初二等日督率所部起西行取道涇州平涼  
直趨安定體察賊勢再行進省惟甘省賊蹤徧  
地臣職任兼圻自應節節掃蕩而所部僅五千



之衆警報頻聞萬萬不敷分布卽以各路營頭  
計之陶茂林餘賸之勇不足十營近聞駐防靖  
遠調援安定之四營又復中途潰散都興阿穆  
圖善各軍久攻甯夏正在喫緊勢難兼顧東路  
雷正綰曹克忠兵數頗多然或策應甯靈或分  
隸成祿或調赴會甯已覺顧此失彼應接不暇  
其堪供抽撥者甚屬寥寥查蔣凝學一軍前經

奉

旨飭令赴直現在潘鼎新劉銘傳各軍均已行抵直東  
境界布置嚴密仰懇

天恩仍飭蔣凝學赴臣營調遣至軍營惡習地方積弊  
臣接任後謹當力圖挽回奉

旨交查事件亦必留心細訪秉公覈辦再查南路道里  
紆迴現擬仍由東路進省以免耽延

楊岳斌又奏言招募勇丁之弊患在挑選不慎  
尤患在約束不嚴 臣自楚入秦據各州縣稟報  
棗陽則陳東霖之勇攔路劫殺商南則余福象  
之勇半途潰散扶風則劉車龍之勇扒城滋擾  
所在居民一聞勇過紛紛遠逃幾與避寇無異  
細詢其故或以納賄爲營官或以徇情爲哨長  
於是無賴之徒濫登尺籍已逐之勇復入營伍

糜餉擾民莫此爲甚請

旨飭下甘省各統兵大員暫停招募以節餉糈而免擾  
害

楊岳斌又奏言查 臣所部俱係步隊而臨陣馳  
擊必資馬隊提督鮑超前派副將蕭以德等赴  
張家口古北口一帶採買戰馬八百匹此時計  
已購備而鮑超現在由江入閩該處山路崎嶇

似可無庸馬隊擬將此項馬匹暫撥 臣營俟鮑  
超出關時再行交付請

旨飭下直隸山西各督撫查明該副將等行抵何處卽  
將所購馬匹解赴蘭州軍營以資利用

楊岳斌又奏言 臣於湖北設立後路糧臺前經

奏委前江西藩司李桓辦理茲該藩司因病請  
開差使查近來各省釐金未能按成分撥餉事

較簡後路糧臺卽不必另設以節糜費所有督  
餉事宜請

旨飭下湖廣督臣官文轉飭湖北臬司唐際盛兼司其

事該員老成練達辦事認真可期得力至由楚  
入秦樊城荆子關等處均已派員接催惟入陝  
境以後道阻且長轉運不易必須總理有人方  
免延誤查陝西藩司林壽圖有爲有守任事實

心堪以總理 臣已與撫 臣劉蓉面商檄令照辦  
奏八

上命軍機大臣傳諭楊岳斌曰楊岳斌於本月初一初  
二等日督率所部西行擬由東路進省接印視事到  
省後當懷遵疊次諭旨將防勦事宜交查案件妥速  
籌辦以副委任蔣凝學一軍已疊次諭令赴豫歸吳  
昌壽調遣著俟河南肅清再令該道赴甘楊岳斌此

時惟當就現有兵力力圖自振以期壁壘一新階州  
現已攻克林之望等軍尙能得力該督抵甘後卽可  
就近檄調各營勇丁紛紛滋事自應暫停招募著該  
督卽行飛咨都興阿雷正綰等營一體照辦以節糜  
費而免滋擾鮑超所買戰馬前准會國藩調赴軍營  
本日已諭知理藩院將蒙古捐輸馬匹於距甘較近  
處所挑選一千匹撥赴楊岳斌軍營著俟解到後認



真訓練以資得力李桓舊病未痊鄂省後路糧臺亦  
可不必另設著照所請派唐際盛兼綜其事該督卽  
咨行官文飭該司妥辦可也

初七日

庚午

恩麟奏言據前甯夏鎮總兵定安等

稟稱五月初六日突有大股賊匪撲犯中衛縣  
城兵勇接仗失利傷亡過半該匪分爲兩股一  
撲梁生嶽營盤一在附近村莊焚殺勢甚危急

請兵援救等語 臣查中衛與省城西甯甘涼等郡處處相通萬一該縣不守各處均爲震動兵糧無從籌辦軍火無路轉輸大局不堪設想現聞甯夏回匪有投誠之信而雷正綰全部將抵靈州距中衛較近仰懇

天恩飭下雷正綰抽撥勁旅馳援中衛以保危城而遏竄匪俟成祿鶴齡等救援安定之軍騰出兵力

再行體察事勢緩急令赴中衛更替至梁生嶽  
營盤有無失事容 臣 查明另行奏報所有此次  
陣亡之署高臺營都司魯剛泰署高總營千總  
李韞肅州鎮標左營把總雷國珍肅州鎮標中  
營外委鐵清泰金塔營額外外委喬應魁仰懇  
天恩飭部從優議卹

恩麟又奏言四月十七日署甘涼道黎獻督隊

西進十九日師次永昌縣飭署知縣李廷輔調  
集獵勇隨同剿賊二十一日由高古城進攻新  
城堡登時將賊擊退殲斃甚多衆賊由馬營墩  
狂奔山丹縣而去是日復有本地及外城回民  
串通大馬營千總回弁馬國慶潛往助逆該道  
於二十四日由峽口移營范家營整軍直進賊  
衆死力抗拒該道飭守備陳桂章首先陷陣立



枕藉割取首級二十餘顆奪獲馬匹器械甚多  
惟該道兵力單薄恐有挫失臣現飭其步步爲  
營穩慎進取復飛飭署甘肅提標中軍參將張  
敬抽撥官軍並令山丹張掖等縣添調民團會  
合黎獻兵勇將黎園永固等處賊匪次第蕩掃  
至大馬營千總馬國慶甘心從逆已檄黎獻設  
法捕拏盡法懲治

恩麟又奏言據護永昌協副將穆克登布稟稱  
此次高古城新城堡回匪相繼起事署高古城  
千總祁延林及其眷屬均被裹脅查無下落等  
語該署千總祁延林是否果被裹脅抑係有心  
從逆現飭黎獻訪查確情再行覈辦

恩麟又奏言據署西甯府知府達昌等稟稱大  
通縣漢回不洽讎殺相尋二月初四日向陽莊

賀家莊等處鄉團與回民接仗該回匪旋即勾  
結縣城回族將城關當舖客商焚殺搶掠初十  
日又有大股回族一擁入城聲稱被鄉勇逼迫  
特來避難復將漢民資財衣物牲畜席捲一空  
衙署倉庫監獄一併被劫殺傷人命甚多十一  
日署知縣劉肇瑞將回匪設法驅遣出城十二  
日回目馬壽等攜帶錢布來縣安撫並帶同三



關頭日捕拏滋事首匪自稱悔罪投誠等語 臣

查甘省回匪起事類多藉口於民團起釁其陰謀詭計不過欲各鄉盡撤團練得以肆其鴟張此次大通城關蹂躪殆徧慘不可言若非大饒兵威恐狼子野心斷難懾服惟現在各路用兵勢難兼顧西甯現有兵力又不敷分布 臣再四思維惟有暫准投誠勒令捆獻首惡交出劫放

監犯仍密飭西甯各屬固結團練毋得輕議裁  
撤亦不得無端肇釁致該回引爲口實一俟兵  
力稍充或外省援師到甘再行相機勦辦

恩麟又奏言雷正綰一軍現已移紮固原所屬  
之下馬關距涇州千里不能再由該處運供口  
食目下賊氛萃於甯靈慶陽防務已鬆所有該  
營日需口糧麥麩三萬餘斤卽由慶陽所屬一

州四縣設法勸辦地勢毗連轉輸較易請

旨飭下督辦慶陽糧臺楊能格督飭各該州縣實力辦理並於適中之地設臺轉運源源接濟至該營月餉甘庫勢難兼顧惟疊准雷正綰函稱餉需迫切不可終日臣已於捐借各款內勉湊銀四千兩發交署平涼府知府葛以簡帶解前往暫濟眉急仍請

飭下楊能格飛催各路協餉隨時撥解俾免譁潰奏入  
上命軍機大臣傳諭都興阿穆圖善雷正綰楊岳斌玉  
通恩麟楊能格曰中衛縣城與省城西甯甘涼等郡  
處處相通爲兵糧轉輸要地現在北路回匪分股圍  
撲該縣城池並撲犯梁生嶽營盤勢甚猖獗萬一中  
衛有失其患不可勝言雷正綰全部現已進規靈州  
相距中衛較近著該提督斟酌軍情抽撥勁旅數營

迅往援剿以保危城成祿及鶴齡等軍疊經有旨諭  
令進解安定之圍再行西征著楊岳斌恩麟催令前  
進毋稍遲誤如安定業經解圍卽著雷正綰將派赴  
安定之軍調回數營前赴中衛接替藉資得力楊岳  
斌抵省後並著分撥勁兵前往援剿至梁生嶽營盤  
有無失事情形並著楊岳斌恩麟查明具奏力戰捐  
驅之署高臺營都司魯剛泰署高臺營千總李韞肅

州鎮標左營把總雷國珍肅州鎮標中營經制外委  
鐵清泰金塔營額外外委喬應魁均著交部從優議  
卹以慰忠魂黎獻帶兵二千進剿肅甘等處賊匪沿  
途節節獲勝勦辦尙合機宜惟兵力太單必應步步  
爲營穩慎圖功方無挫失之患並著楊岳斌恩麟飭  
令黎獻激勵兵團將黎園永固等處賊匪次第殲除  
再行酌度軍情妥籌進取大馬營千總馬國慶甘心

從逆實出情理之外並著檄令黎獻設法捕拏訊明  
實情盡法懲治高古城回匪經官軍攻克後搜戮無  
遺新城堡亦卽克復辦理尙屬迅速其署古城千總  
郝廷林是否被賊裹脅抑係有心從逆並著飭令黎  
獻訪查詳確據實叅奏西路回民藉口漢團未散突  
入大通縣城大肆搶掠倉庫監獄一併被劫被傷人  
命甚多雖據回目馬壽等悔罪投誠呈交贓物而監

犯及首惡並未捆獻斷難憑信該回民詭詐多端總欲撤去漢團得以肆行無忌萬不可墮其術中恩麟現因兵力不敷勦辦暫准投誠卽著嚴飭達昌責令該回目等將起事首惡及劫放監犯卽交出不准藉詞宕延致墮詭計各鄉團練仍應聯絡整備不可輕議裁撤如果該回衆等尙知悔罪息事亦不得無端肇釁著玉通恩麟隨時飭令該地方官先事豫防



妥籌辦理西甯一帶防守事宜並著玉通認真妥辦  
毋稍大意所有大通縣城被擾情形仍著恩麟確查  
具奏雷正綰一軍需用口糧麥麩向由涇州所屬勸  
辦現在該提督移營北路轉運維艱慶陽防務現已  
稍鬆所有雷正綰一軍日需口糧麥麩三萬餘斤卽  
著恩麟飭令慶陽所屬一州四縣設法勸辦運供楊  
能格卽就近督同慶陽府知府嚴飭所屬實力勸辦

源源運送毋令缺乏雷正綰所需月餉支絀異常並  
著楊能格飛飭各路協餉隨時撥解毋稍延緩恩麟  
仍當設法接濟以應要需前據楊岳斌奏稱甘肅派  
往各省募勇沿途滋擾著都興阿雷正綰查明約束  
不嚴各員據實叅奏現在甘省兵勇已不爲少足敷  
勦辦所有派往各省募勇之處卽著暫行停止



欽定平定陝甘新疆回匪方略卷一百三十一

乙未年

閏五月初九日

壬申

聯捷奏言

臣

軍次西安原擬

俟軍器造齊卽日整隊西征適值陶茂林潰勇滋事撲犯省垣接奉

諭旨令

臣

暫駐陝省會同勦辦

臣

當與德興阿分帶馬

隊會同楊岳斌赴省西四十里瑤頭地方適副將彭體道將叛將高文義縛至軍前餘勇亦俱

就撫目下西安一帶業已平靖 臣營所需軍器  
不日亦可造齊擬卽分起星馳赴甘相機進剿  
聯捷又奏言 臣軍所需薪水馬乾等項極力撙  
節每月需銀八千餘兩前由察哈爾撥解一萬  
五千兩山西撥解一萬五千兩僅敷五六月之  
用此後軍行漸遠半經兵燹蹂躪籌餉尤難且  
甘省徧地賊蹤勢須分兵攻剿 臣與成祿一軍

卽使歸併亦不能常川合隊所有動用錢糧自  
應各清各款庶免輻輳仰懇

天恩飭下山西撫臣每月撥銀八千五百兩解交臣營  
毋使飢乏奏入

上命軍機大臣傳諭沈桂芬聯捷曰竄陝陶營潰勇業  
已辦竣聯捷自當迅赴甘肅會合成祿所部剋日西  
征該大臣現已分隊起程著卽督率馬隊步勇馳赴

安定一帶會同成祿及雷正綰所派各軍盡力勦辦  
一俟安定肅清卽與成祿由肅甘等處節節進剿爲  
出關之舉不得以在陝坐待軍器稍事遷延該大臣  
月餉每月需銀八千餘兩此後軍行漸遠甘省蹂躪  
之區籌畫非易著沈桂芬按月撥實銀八千五百兩  
解交聯捷軍營務使源源接濟毋使停兵待餉致誤

要需

同日楊能格奏言據提督雷正綰咨稱現在進  
剿靈州去慶陽糧臺將及千里令在環縣添設  
分局多儲糧石轉運前敵大營等語

臣

查雷正

綰前敵大營去慶陽日遠將來大雨時行山水  
漲發糧運維艱亟應乘此晴霽趨運環縣存儲  
惟慶陽五屬山多地瘠平日產糧無多連年又  
爲回匪蹂躪十室九空值此雨澤愆期秋禾未



種糧價騰長採買爲難伏查倉儲之設原所以  
備緩急陝甘唇齒相依何分畛域現在陝西各  
縣尙有常平倉及義倉糧石臣擬咨商該省巡  
撫迅飭鄰近甘省州縣無論米麥雜糧各動撥  
一二千石湊成二萬石之數飛解慶陽糧臺轉  
運環縣分局存儲以備供支其運腳擬令作正  
開銷以免遲誤請

旨飭下陝西巡撫轉飭各州縣一體遵行再查雷正綰  
現經委員前赴陝西北山各州縣勸捐米麥並  
請

飭下該巡撫迅飭各該州縣會同委員妥爲勸辦以裕  
軍食刻下雷正綰所部會合曹克忠魏添應各  
軍指日可達靈州軍糧一切更宜寬爲籌備以  
期迅奏膚公奏入

上命軍機大臣傳諭劉蓉楊能格曰雷正綰所部會合  
曹克忠魏添應各軍指日可達靈州所需軍糧一切  
亟應寬爲籌備著劉蓉迅飭鄰近甘省各州縣於常  
平義倉存儲內無論米麥雜糧每屬各撥解一二千  
石共作爲二萬石之數飛速解交涇州慶陽糧臺轉  
運至環縣分局收存備支此項運腳均准其作正開  
銷其鄰近北山州縣並著劉蓉轉飭各該地方官會

同雷正緒委員妥籌勸捐實在米麥解交糧臺以濟  
要需楊能格於陝省糧臺解到時卽酌覈各營所需  
源源轉運

十四日丑丁都興阿穆圖善奏言自固原克復後

陝回大股北竄甯夏逆黨增多蔓延河東西前  
後數百里不時窺伺運道且連接警報中衛被  
圍萬分緊急該邑爲八省衝衢西接涼郡臣等

急擬設法抽兵由阿拉善草地繞越往勦惟兵  
少不敷分布多則糧運更難當卽一面催趨營  
中糧米一面派員馳往阿拉善會同該旗委員  
妥籌運解乃據已革甯夏副都統常陞函稱甯  
夏將軍慶昫於十三日偶感時疫遽於二十一  
日出缺所有甯夏將軍印務權行護理請卽撥  
兵疏通糧路臣等聞信曷勝焦灼滿城孤立日

久慶昫籌食籌防諸臻妥協茲因病出缺深恐

人心惶懼

臣

都興阿穆圖善杜嘎爾於二十六

日踏看西路水勢就便繞赴滿城會晤常陞據

稱回匪連日附城竄擾業已移營阻絕糧道似

欲乘隙窺伺圖逞奸謀

臣

等體察情形雖尙鎮

靜而城內糧缺外匪日漸覬覦不得不迅籌兼  
顧擬卽先其所急調營繞赴滿城疏通糧路然

後進取中衛惟中邑情形危迫未能兼顧或恐  
有誤機宜請

旨飭令雷正綰分撥一軍就近由南路取道先行進援  
以期妥速仍懇

恩迅簡大員赴甯夏將軍本任以重職守而裨軍務

都興阿穆圖善又奏言連據翁同書報稱後路  
回匪四出焚掠雖疊經官軍截擊仍在紅柳溝

木瓜溝南山一帶出沒初九日駐東蔡家圈之副將段登雲探有馬賊距營十餘里立即出隊迎勦殲擒數名十一日駐定邊之侍衛壽昌副將趙有勝各帶隊馳至木瓜溝該逆列隊抗拒壽昌首先突陣營總貴陞等與趙有勝督隊殺賊該匪向南奔竄壽昌趙有勝合隊追至紅柳溝餘匪逃竄入山因即收隊十二日副將段登



雲督隊前赴安邊會同羅承勳進剿該逆竄至  
附近一帶距定邑僅十餘里壽昌趙有勝聞信  
立即帶隊出城分投抄擊斃賊數十名十七日  
探報西南二十餘里之黃蒿溝紅山子及左家  
溝等處均有回匪殺掠十八日副都統西們克  
西克督帶馬隊向西南進剿回逆大股馬步千  
餘由東北毋豬渠逸東竄出邊牆肆行焚掠翁

同書因餉道要地山西軍火將到恐有疏虞卽  
派各營均出五成隊伍及綠營騎兵令參將溫  
積桂統帶往剿又據準噶爾貝子札那濟爾迪  
呈報該部駐防邊牆章京麒明探知賊至立卽  
派兵堵禦將近梅關地方突出馬步賊匪千餘  
官兵迎截斃賊七十餘名該匪徐退入邊正遇  
溫積桂帶隊前進遂竭力南奔是日西們克西

克向西南進勦賊已遁走聞毋豬渠有警飛馬  
折回適見賊匪向南敗竄呼隊衝殺賊衆披靡  
紛紛潰散河東逆匪白花馬池以南直抵預望  
城賊巢林立時常出沒乘隙擄掠窺伺運道我  
軍後路兵單地勢寬廣當飛檄翁同書嚴飭各  
營扼要堵截慎保城池疏通餉運以待撥兵會

勦

都興阿又奏言據青海蒙古王公並阿嘉呼圖  
克圖章嘉呼圖克圖差遞稟詞及西甯紳耆團  
總番僧難民呈詞十五紙被難清冊三本臣詳  
加披閱詢據該蒙官番僧等均以西甯狃於撫  
和大受荼毒刻下各城盡爲逆回把持箝制府  
城危殆該處情形曾經奉

旨飭令蔣凝學前往辦理茲該蒙官番僧等籲請撥兵

自係萬分危急非有重兵勁旅勦辦不能得力  
第<sub>臣</sub>等刻下斷難兼顧楊岳斌於四月已抵西  
安計日諒可赴任應請

飭下楊岳斌就近分撥一軍嚴飭蔣凝學馳赴西甯相  
機辦理

同日常陞奏言將軍慶昫到任以來軍書旁午  
激勵兵團擘畫糧餉均井井有條人心愛戴精

神未衰而心力俱瘁竟於五月二十一日因病  
出缺甯夏滿營積困太深現在逆回阻塞糧路  
不通以致米價日昂兵民交困前蒙

恩撥餉二十萬兩一載有餘止到七萬杯水車薪無濟  
於事仰懇

天恩飭催河南山東山西等省迅爲續撥俾得源源相  
濟其將軍印務一切由臣暫爲護理並懇

飭令簡放之員迅速赴任以重城防

常陞又奏言慶昫出缺後逆賊揚言聚眾攻城  
並有紮營圍困之說二十三日由賊巢分路前  
來距滿城三五里紮營六處廣樹旗幟四出滋  
擾較上年更爲艱險當卽差員乘夜突圍馳赴  
大營求救臣惟有慎益加慎激勵兵團嚴加防  
守以待援兵均奏入

上命軍機大臣傳諭都興阿穆圖善雷正綰楊岳斌常  
陞曰中衛爲入省要衝西接涼郡現被逆匪圍攻萬  
分喫緊都興阿等擬抽兵由阿拉善草地繞越進剿  
及派員會同該旗籌運糧米卽著迅籌妥辦雷正綰  
所部進規靈州距中衛較近著懷遵前旨迅抽勁旅  
數營由南路赴中衛援剿如成祿及鶴齡等軍進援  
安定業已解圍並著雷正綰將派赴安定之軍調回



數營前往助剿以厚兵力甯夏回逆因慶昫病故圍  
撲滿城勢甚兇狡本日已將穆圖善調補甯夏將軍  
著都興阿穆圖善先其所急抽撥得力數營繞赴滿  
城將賊擊退疏通糧路卽由中衛進取會合雷正綰  
援軍節次掃蕩都興阿等營後路時有回逆在紅柳  
溝等處四出滋擾窺伺運道蓄謀甚譎雖經官軍連  
日剿獲勝仍恐該逆乘隙肆擾餉道堪虞著嚴檄

各軍扼要堵截慎固定邊之防疏通餉運以待援師  
毋稍鬆懈揚岳斌前據奏報於閏五月初一日起程  
赴甘著俟到省後酌撥數營迅赴中衛助剿青海蒙  
古王公及阿嘉呼圖克圖等所遞稟詞均以西甯狂  
於議撫玉通等爲逆回箝制府城情形危殆請撥重  
兵往辦除蔣凝學一軍前已有旨令赴河南防剿外  
著楊岳斌就近派委明幹大員酌帶勁兵馳赴西甯

三  
三  
相機妥辦。西甯現在回匪情形及梁生嶽營盤有無失陷均著該督查明速奏。甯夏滿城防務仍著常陞激勵兵團嚴密布置。與都興阿、穆圖善之軍聯絡聲勢固守待援。勿得稍涉大意。阿嘉呼圖克圖稟詞一件著鈔給楊岳斌閱看。

上諭內閣曰：甯夏將軍員缺著穆圖善調補。

上又諭內閣曰：甯夏將軍慶昫自簡任以來正值回匪

擾亂籌兵籌餉固守滿城兩載有餘勤勞備至方資  
倚畀遽以積勞病故披覽遺章殊深軫惜慶昫著照  
將軍軍營病故例賜卹准其入城治喪任內一切處  
分悉予開復應得卹典該衙門察例具奏並著該旗  
查明該將軍之子於百日孝滿後帶領引見候旨施  
恩以示篤念耆臣至意

都興阿又奏言臣維行軍之要首重糧餉臣入

甘後惟原帶馬隊月餉一萬五千兩由晉省按月撥解其餘各營餉銀盡屬有名無實上年文煜在慶陽稍爲籌撥雖杯水車薪不敷接濟而各營月餉不足仍自行向慶臺找領並未統歸軍營支放是以協餉到營儘可查看情形隨時墊借其卹賞雜款亦可酌量動支惟糧米一節價值昂貴購買維艱沙磧路遠運腳尤費遂併

山西解到之餉隨到隨墊買糧雇運以致馬隊  
月餉欠放甚多 臣知經費支絀雖萬分棘手亦  
惟竭蹶維持第刻下兵勇增多新募楚勇六營  
將到勦辦喫緊設有因飢譁潰貽患大局何堪  
設想三月閒楊能格祇撥餉銀一萬三千兩遂  
稱向在慶臺領餉馬步十營卽歸 臣營自行支  
放慶陽係糧臺總匯有專司勾稽統籌支應之

責今僅管收銀轉撥總臺竟同虛設臣前經奏  
請將各營月需餉銀三萬兩雜款銀一萬兩明  
定數目統歸慶臺按月撥解並將英字選鋒東  
治四營餉需一萬三千兩歸山西河東道協甘  
項下按月劃解由營委員支放將來統歸慶臺  
覈銷聞慶臺所收各省協餉河東道較有成數  
其餘各省報解無定現值臣軍望餉若渴若待

委員分路守提稽延時日緩不濟急必須指撥  
有著之款按月如數解到方能獲益今擬改將  
臣部各營除原有定餉者毋庸更議並新操營  
勇六營仍照原奏令湖北按月撥解外其揚州  
新到兩起馬隊並英字選鋒兩營東治兩營禮  
字中左前後四營陝勇兩營西安官兵一營太  
原鎮總兵馬陞所部一營統計十四營月需銀



四萬三千兩請改由河東道於協甘餉下按月  
劃留二萬三千兩徑解 臣營其餘仍解慶臺又  
江蘇奏定協甘餉銀三萬兩江北糧臺內有兩  
淮鹽課銀二萬兩擬請卽由兩淮運使將此項  
銀二萬兩按月徑解 臣營毋庸轉撥以歸簡便  
其江蘇應解協餉卽扣除二萬兩前請籌備卹  
賞採辦等項雜款一萬兩仍由慶陽總臺按月

籌解似此變通辦理徑解徑放慶臺免受追呼  
臣軍亦得實在轉移兩獲其益此外山西直  
隸四川河南江蘇河東等處協餉均歸慶臺在  
慶臺專司理餉易於催提不比戎馬倥傯未能  
兼顧且每月僅籌臣軍銀一萬兩爲數無多亦  
不難於撥解臣因情形危急不得不瀝情冒瀆  
如蒙

俞允請

旨飭湖北督撫按月撥銀二萬兩山西河東道按月撥銀二萬三千兩兩淮鹽運使按月撥銀二萬兩慶陽糧臺按月撥銀一萬兩並懇

恩嚴飭如數徑解臣軍萬勿推諉稽延致滋貽誤惟款項繁多須有大員總司稽覈查有已革葉爾羌參贊大臣景廉頗爲得力嗣後糧臺事務卽交

景廉總理所有督催轉運稽察收放一切統歸  
經理仍彙總據實詳報慶陽總臺覈銷以昭畫  
一奏入得

旨戶部速議具奏

十六日己卯文麟奏言臣自抵奇台居中策應屢

以大義開導鄉民令團練防堵以保地方賊匪  
自二月初七日大敗以來逃竄山谷者三千餘

衆時常出沒窺伺我軍現派防禦達哈蘇等各帶民勇滿兵在白楊河一碗泉地方紮營奇台以西各勇在古城濟木薩柳樹河三台等處分防要隘據呼圖壁署都司千總馮吉敖等會稟四月初七十九二十二十一等日該員等帶勇在安濟海烏蘭烏蘇台各處四次獲勝殺賊數百名旋於五月十四日接恩錦稟稱糧員錫喇

春等帶勇四次打仗至二十四日賊調大股八千有餘民勇不及四千少不敵衆又乏火藥以致敗潰錫喇春被賊衝散仍在西路招集潰勇惟署都司千總馮吉敖佐領薩琳泰戍員文英收集潰勇五百餘人東行繞至三台臣詢悉情形與恩錦所稟無異伊犁亦因回匪叛亂不暇

分兵臣令潰勇在三台紮營仍著該員管帶以

助防勦伏思收復濟城以後賊匪不暇復來者  
賴該員爲之牽掣今民勇潰散賊匪大股盤踞  
阜康賊蹤已逼滋泥泉三台更爲喫緊拒戰之  
勇不足四千鄉民烏合委難足恃仰懇

天恩飭下陝甘總督將軍速派大兵應援以全大局

文麟又奏言正發摺間接三台委員阿弼善錫  
綸等來稟本月十六日賊匪馬隊二千餘衆距

三台五六里接仗官弁民勇槍礮齊發斃賊二  
百數十名十七日復糾大股蜂擁而來我勇抵  
死力戰傷亡殆盡濟木薩得而復失奇台萬分  
危急奇台一失則巴里坤哈密危矣 臣受

恩深重才力不及貽誤之咎實所難辭奏入

上命軍機大臣傳諭都興阿穆圖善楊岳斌成祿聯捷  
恩麟文麟曰濟木薩收復以後文麟派勇分防三台



等處疊次接仗旋以寡不敵眾紛紛潰散大股賊匪  
現在阜康盤踞勢將東犯奇台情形甚爲危急非得  
接應之兵迅速前往大局何堪設想德祥尤光祖等  
軍疊次催令赴援現在究抵何處何以杳無音信著  
楊岳斌恩麟查明飛催前進不得任意遲延成祿此  
時當已行抵安定聯捷亦已督隊赴甘著卽催提鶴  
齡一軍將安定一帶道路疏通會合西行由甘肅出

關勦賊毋稍觀望致誤事機黎獻一軍進勦甘州回  
匪兵力尙單著楊岳斌恩麟檄令林之望卽移得勝  
之師迅赴肅甘合力進擊將該處回匪撲滅庶出關  
之軍不致梗阻都與阿穆圖善速將甯夏等處賊匪  
奮力勦除以便抽兵出關該將軍等總當力顧大局  
迅籌辦理以紓朝廷西顧之憂援兵未到以前文麟  
仍當激勵民勇固守奇台濟木薩等處毋稍疏失巴

里坤哈密等城並著文麟隨時知照該城大臣等嚴  
密籌防以備不虞

文麟又奏言前次奏撥古城軍餉銀八萬兩以  
備支發兵勇鹽菜之需嗣據科布多參贊大臣  
廣鳳等咨稱該處餘存庫銀五萬兩於三月十  
九日飭令防禦達哈蘇葉普懇等承領並派科  
布多官兵護解當派勇役前往接護旋於四月

二十八日將前項軍餉護解到奇卽飭奇台縣知縣恆頤如數收存縣庫防禦達哈蘇葉普懇等均已留營効力查上年十一月濟木薩古城漢城相繼失守奇台一帶軍民商賈逃亡殆盡臣於本年正月十三日行抵奇台維時市井蕭條人民稀少卽經出示招撫自古城滿城失守之後逆回西竄仍復不時窺伺東路之賊出沒

無常大兵未到惟有招集民勇以資防剿西路  
濟木薩之三台柳樹河並古城奇台之東路木  
壘一帶僅有民戶各勇六千數百名分隘紮營  
究嫌單薄各勇日領口糧麩一斤半僅免枵腹  
應領鹽菜無款可籌惟每名月給賞銀三四錢  
不等激勵衆心皆由恆頤籌畫墊辦以及槍礮  
火藥該縣開鑪設局日夜籌維已屬不遺餘力

天氣炎熱各勇尙被冬衣情形可憫至古城逃  
出官兵及解餉之達哈蘇等共一百數十員名  
並招徠烏魯木齊滿兵五十餘名暨古城救出  
大小男女四十餘名以及隨營差遣文武員弁  
除日領麪斤之外別無領項尤爲困苦刻下軍  
務未能計日告竣防勦兵勇日漸雲集解到之  
餉仍屬杯水車薪當此軍情喫緊需人用命不

能不月給鹽菜各項稍資津貼一應支發餉糈  
奈無成案可查惟當覈實撙節請

旨飭下戶部頒發則例俾得遵行奏入得

旨所有軍需則例著戶部迅速頒發

十九日

壬午

恩麟奏言安定縣自提督陶茂林部

勇潰散後賊卽於四月初七日圍城愈聚愈多

陶茂林在城內督率兵勇屢遇兇鋒城圍未解

雷正綰因臣催援甚急先派記名提督劉正高  
六營又酌撥四營移交烏魯木齊提督成祿統  
帶並催調川北鎮鶴齡一軍取道會甯合力援  
勦旋聞安定縣東之西鞏驛堡於五月初五日  
被安定踞匪分股攻陷臣復飛催成祿劉正高  
等趕緊迎擊劉正高率勇於初三日行抵會甯  
初五日出隊至三十里鋪適賊匪攻撲夏家營



堡寨勢甚危急劉正高率隊追剿該匪倉皇逃遁我軍乘勢掩殺移營前進當將西鞏驛堡收復敗匪退至驛西五里之王公橋恃險抗拒十四日逆匪馬步萬餘列陣橋西另出馬賊三百餘名直撲我軍營壘旋經槍礮擊退十五日賊分三路越嶺而至劉正高分派武威營扼其左提標新右營控其右親兵營制其中另飭副新

右營提標新中營雄字右營精選左營爲三營  
接應自卯至未賊勢兇悍異常提標新右營營  
官鄭天順武威營哨官李洪春均受槍傷適後  
路接應齊至又雷正綰撥給成祿之遊擊劉雲  
山一營同時趕到始將賊匪壓下紛紛潰亂斃  
賊三百餘名生擒八名奪獲戰馬五匹訊據生  
擒回逆供稱圍攻安定縣城是馬阿渾爲首河

州陝西及蓮花城三處賊黨均在其內並勾結  
陶茂林潰勇入夥訊明後悉數正法十六日劉  
正高料該匪必復撲營密飭各營分路埋伏以  
提標新中營茂字副前營爲接應布置甫定馬  
步逆賊萬餘半已上山盤踞半在平川蜂擁而  
來直越王公橋之東面劉正高令捲息旗鼓鎮  
靜以待該匪以我軍並無準備搶拔木城伏兵

並起逆勢不支踞匪下山援應劉正高揮兵抵  
敵鏖戰多時又斃賊匪三百餘名受傷者尤多  
生擒五十名餘匪西竄溝深山險未能窮追我  
軍亦卽收隊又據署安定縣知縣胡國棟詳稱  
自五月初九日以後圍城之賊半赴東路邀截  
援軍守巢者勢漸窮蹙陶茂林親督紳勇乘機  
出勦殲斃甚多並毀張家灣賊巢十九日忽有

大股由東路敗竄經陶茂林親督將士出城分途勦捕二十日大獲勝仗餘匪奔竄西路之關門口沙河坡大寨子老巢城圍立解查安定縣城被圍四十餘日之久茲幸雷正綰派撥援師先後踵至軍聲一振逆膽卽寒而陶茂林固守於前又隨機擊退於後卒保孤城地方生靈未遭塗炭至關門口沙河坡大寨子等處本爲逆

匪巢穴自應迅圖殲滅以防復肆鴟張現在成  
祿鶴齡等軍均已行抵會甯又由雷正綰添派  
總兵劉車龍領新到楚軍海字六營臣已咨令  
會合劉正高先將王公橋踞匪掃淨相機進取  
關門口一帶仍咨商陶茂林妥爲防範免致該  
匪回竄此次接仗詳細情形並出力員弁俟陶  
茂林咨報到日再行彙保奏入得

旨安定業已解圍著飭諸軍乘勝將關門口等處老巢  
次第掃蕩毋留餘孽

恩麟又奏言署甘涼道黎獻統帶兵勇將永昌  
縣屬新城高古城等處賊匪勦捕並解大馬營  
堡之圍五月初二日由花寨子拔營進駐黑城  
子一面催調甘肅提標中軍參將張敬官兵五  
百名張掖縣民勇一千名州同鄧榮恩練勇二

百六十名擬由紅水進勦忽報賊衆數千羣踞馬營墩分途來撲初四日黎獻親督各營飛馳迎擊馬賊千餘上前直撲都司吳占鰲揮隊從西進熊占魁從東進黎獻自率小隊後旗臨洮各營弁兵從中進吏目張世基嚴陣由東北殿後該匪兩路抄來我軍四面抵敵又有步賊占踞高岸礮石如雨黎獻督小隊並臨洮營兵直



衝而前吳占鰲熊占魁張世基等亦奮力包抄  
把總王仲科武舉劉元得田如岡團勇四百名  
隨後吶喊助陣將賊悉數逼入馬營墩堡內守  
備王廷勝率衆先登立斬守堡悍賊二名賊矛  
刺傷王廷勝右顙經王廷勝親兵砍斃數人賊  
遂驚潰我軍蟻附而登與賊巷戰又斃百餘人  
餘匪向東南狂奔將馬營墩克復黎獻指揮各

隊乘勝追擊沿途斬馘極多統計斃賊四百餘人內有賊首一名收隊折回中途又遇由永固竄回之賊復經兵勇殺斃十六名餘皆逃竄奪獲黎園營都司關防一顆大馬營左哨經制外委黎園營經制外委黎園營把總黑城營經制外委木質鈐記各一顆都司吳占鰲遊擊陳桂章守備王廷勝俱身受重傷陣亡勇丁五名受

傷五十五名是日酉刻參將張敬州同鄧榮恩  
團總李太和各勇先後趕到正擬進剿紅水俄  
博等營旋據探報自扁都口至俄博營六十餘  
里俱無賊蹤詢據漢民回稱該逆自懲創後退  
竄大通勢頗單弱一時不敢復出黎獻分飭地  
方文武將扁都口並白石岸口西水關等處要  
隘派兵扼堵以杜賊匪偷竄擬於十二日自黑

城起隊取道甘郡進勦肅州該道黎獻帶隊西  
征節節清掃以少勝多大有破竹之勢實屬奮  
勇正宜乘此聲威立取肅州並嚴飭甘涼各屬  
文武扼守要隘防賊東竄出力員弁及陣亡兵  
勇另行查明奏請

獎卹

恩麟又奏言接據山丹縣知縣熊常鑿詳報黎

獻自攻克馬營墩後原擬進剿肅州因俄博營  
一帶餘匪未靖後路可憂分派各營由永固馳  
往俄博徧加搜捕隨將永固俄博兩城收復並  
尋獲署黑城營把總彭杰屍首餘匪盡數入山  
竄往永安大通等處山丹屬境一律肅清黎獻  
卽於五月十六日拔營赴肅奏入均報

欽定平定陝甘新疆回匪方略卷一百四 乙丑年

閏五月二十日癸未聯捷奏言 臣現帶黑龍江官

兵內有患病者三十一名又記名副都統花尙  
阿前在軍營受傷過重現在舉發未能赴甘暫  
留陝省花尙阿出師多年受傷七十餘處前在  
廬州腹被矛傷腸出寸許雖經醫治獲痊一經  
勞動仍卽舉發從征萬里誠恐精力難支該員

勇敢性成年力正富日前隨同出隊見其調度  
有方每與論兵頗知機要爲旗僕中尙堪作養  
之材擬暫令該員回旗調養將來病痊尙可爲  
國宣力所有病兵三十一名卽令該員管帶回旗  
臣查得黑龍江齊齊哈爾卽補協領扒子布特  
哈佐領薩呢布曾隸多隆阿部下打仗奮勇該  
二員早經回旗仰懇

天恩俯念帶隊需員

飭下黑龍江將軍選派精壯馬隊二三百名責令管帶  
來營以補缺額奏入

上命軍機大臣傳諭特普欽聯捷曰黑龍江官兵隨同  
聯捷赴甘內有患病者三十一名並傷病舉發之記  
名副都統副管花尙阿未能隨營西進聯捷現擬將  
此項官兵遣撤令花尙阿管帶回旗著照所請辦理



該營現在帶兵需人請將齊齊哈爾協領扒子布特  
哈佐領薩呢布調赴西路著特普欽卽飭該二員迅  
赴聯捷軍營聽候調遣現在黑龍江官兵調赴神機  
營及直隸軍營者爲數已多聯捷所請調撥黑龍江  
馬隊二三百名之處著俟直東軍務完竣時再行酌  
撥

聯捷又奏言吉林黑龍江官兵出征向有備帶

馬匹近因治裝銀兩不能支放每兵僅有本身  
騎馬此次黑龍江馬隊自原營至此歷途七千  
餘里不無勞乏 臣逐加點驗疲瘦者多閒有跛  
劣不堪驅策因而倒斃者今出關勦賊長驅萬  
里誠恐馬力不及不能不先事豫籌 臣前請赴  
直東防勦摺內聲明於經過州縣調撥驛馬更  
換陝省驛站馬匹不足難以調撥仰懇

天恩飭下察哈爾都統在牧羣內挑選臚壯馬四百匹  
由該都統派員護解來營以備長途更換之用  
奏入

上命軍機大臣傳諭阿克敦布廉至曰聯捷統師出關  
剿賊必須精壯馬匹長途更換此次黑龍江馬隊到  
營歷七千餘里之遙馬匹疲瘦長驅萬里設中途馬  
力不及深恐貽誤陝省驛站馬匹復不足額難以調

撥所奏自係實情著阿克敦布廉至迅速在牧羣內  
挑選臚壯馬四百匹派員護解聯捷軍營以備更換  
聯捷又奏言臣前由張家口改道從內地進兵  
欽奉

諭旨沈桂芬於該官兵到晉時妥爲供應一面知照陝  
甘各督撫飭沿途籌辦行糧毋令缺乏查軍需則例  
內載每兵給騎馬一匹仍按每兵六名給行李

車一輛又載各省滿兵乘騎本身官馬如遇疲  
乏每兵二名連跟役給車一輛此次黑龍江官  
兵由直隸行抵山西太原沿途供送均無貽誤  
嗣因缺少軍器經 臣 奏明在晉籌辦守候期內  
官兵等應支口糧均經該藩司轉飭籌備迨由  
晉入陝值陶營潰勇滋事奉

旨令 臣 幫同辦理駐兵省垣咸長兩縣僅支應一日口

糧設非山西餉銀已到該官兵等幾至絕糧昨  
辦理潰勇事竣臣與楊岳斌商明先後起程緣  
地方車馬不敷周轉初三日兩縣來營面稟車  
馬缺少改期起程比至臨期咸甯縣知縣托克  
紳託病不出遣役持山東新章來營搪塞檢查  
成章因勇丁例不給車議定每勇五百名給大  
車二十輛非指旗兵而言該縣有心牽混黑龍

江官兵萬里遠征沿途地方均遵

旨豫備口糧供應車輛卽陝西之潼關華陰渭南臨潼  
等處兵燹之餘情形凋敝亦皆照例應付未誤  
軍行今咸長兩縣藉口支吾當經撫臣面諭該  
縣趕辦車輛臣先帶官兵百數十名於初八日  
起程習慶明等在省督催後隊陸續前進時值  
溽暑兵丁因車輛旣少且半係牛驢恐難拉運

僅將軍器裝載行李捆載馬上兵丁牽馬而行  
蹀躞奔馳情形苦累而後起兵丁因車輛不敷  
刻尙杳無信息旗兵世僕效命疆場固其本分  
若因地方官剋扣車輛疲於道路設有意外臣  
身爲將領問心實有難安且西路大臣例有應  
支驛馬臣昨由西安起程該兩縣僅備驛馬一  
匹餘皆羸頭驛政之廢弛可想若不立予嚴叅



何以警效尤而懲怠玩應請

旨將咸甯縣知縣托克紳長安縣知縣馬綸篤交部從  
嚴議處以爲玩視軍務者戒奏入

上諭內閣曰陝西咸甯縣知縣托克紳長安縣知縣馬  
綸篤於聯捷統兵起程時並不將口糧車輛如數發  
給實屬有心玩誤托克紳馬綸篤均著交部嚴加議  
處

聯捷又奏言臣前次奏明在陝省借撥軍器俟  
晉省解到卽行歸還現經陝省軍需局製就已  
由營務處如數點收又臣前請添調大名舊部  
練軍奉

旨允准經臣派弁催調茲已全數來營惟臣舊製槍礮  
均經直隸地方官扣留爲目下防河之用各勇  
僅帶隨身短刃因又商之撫臣劉蓉在陝省軍

需局添撥檣槍四十桿檣礮二尊並因馬步兵  
勇均乏帳房復商撥帳房四十五架尙多不敷  
由臣飭令糧臺委員趕緊添製奏入報

聞

同日戶部奏言本年四月閒欽奉

諭旨都興阿糧餉著劉長佑駱秉章吳昌壽閻敬銘沈  
桂芬劉蓉各將協撥數目自行酌定按月徑解都興

阿軍營至都興阿原帶馬隊及隨員鹽折月餉一萬  
五千兩仍由山西撥解等因茲據署陝甘總督都興  
阿奏稱軍餉不繼擬請變通辦理查甯夏攻剿  
喫緊需餉甚殷慶陽糧臺旣未能如數供支若  
令各省自行酌定數目籌解仍恐虛懸無著自  
應指撥專餉以資接濟臣等公同酌覈應如該  
署督所請所有甯夏馬步各營除原有定餉者

仍照舊撥解外新募楚勇六營仍由湖北按月撥銀二萬兩揚州新到兩起馬隊及英字選鋒等營統計十四營月餉需銀四萬三千兩兩淮鹽課項下月撥銀二萬兩山西河東道本有月協甘餉卽由該道按月劃出二萬三千兩解交都興阿軍營其餘仍解慶陽糧臺至都興阿前請每月籌備賞卹雜費等銀一萬兩仍由慶陽

糧臺按月籌解應請

旨飭下兩江湖廣各總督山西江蘇湖北各巡撫督辦  
慶陽糧臺候補按察使楊能柎將指撥都興阿  
所部各營月餉按月如數解交甯夏軍營毋稍  
推延致滋貽誤其所撥兩淮鹽課銀二萬兩卽  
令兩淮鹽運使徑解甯夏毋庸解赴江北轉撥  
並令山西江蘇巡撫於應解協甘餉銀內將此

次所撥銀兩照數劃除以清款目奏入

上命軍機大臣傳諭官文會國藩都興阿李鴻章鄭敦  
謹沈桂芬劉鄩膏揚能格曰都興阿一軍攻勦甯夏  
喫緊需餉甚殷慶陽糧臺未能如數供支前曾諭令  
各省自行酌定數目籌解仍恐虛懸無著自應指撥  
專餉以資接濟著照戶部所議所有甯夏馬步各營  
除原有定餉者仍照舊撥解外新募楚勇六營仍由

官文鄭敦謹按月撥銀二萬兩揚州新到兩起馬隊  
及英字選鋒等營統計十四營月餉共需四萬三千  
兩兩淮鹽課項下月撥協甘餉銀二萬兩著曾國藩  
李鴻章劉卹膏飭令兩淮運使卽將此項銀兩徑解  
甯夏軍營毋庸解赴江北轉撥山西河東道本有月  
協甘餉著沈桂芬飭令該道按月劃出二萬三千兩  
徑解都興阿軍營其餘仍解慶陽糧臺江蘇山西應



解協甘餉銀卽可將此次所撥銀兩照數劃除以清  
款目都興阿前請每月籌備賞卹雜費等銀一萬兩  
著楊能格仍由慶陽糧臺按月籌解經此次指撥之  
後按月如數解交甯夏軍營毋稍推延貽誤所有督  
催轉運及支發動用一切事宜卽著都興阿責成景  
廉實力稽查仍飭彙總詳報慶陽糧臺覈銷以昭畫

二十一日甲申楊岳斌奏言臣於閏月初一二等

日分隊由西安起程初七日准陝西撫臣劉蓉

恭錄寄

諭著楊岳斌劉蓉選派兵勇扼要駐紮等因初十日又  
奉

上諭此時蕭慶高等軍已克階州自可調回等因臣伏  
念潼關當秦晉之交自應分兵防守以備不虞

惟臣行至中途始奉

諭旨距潼關業經數百餘里隊伍先驅計程愈遠似未

便紆道折回且聞安定雖已解圍該逆仍踰伏

於三十里內外時出窺伺臣整頓西行亦須稍

厚兵力陝省防兵尙可就近撥赴潼關而蕭慶

高等軍亦可遵

旨調回藉資抵禦臣是以仍領全軍馳赴蘭州至該省

民情賊勢軍政吏治及各營餉項一切 臣沿途  
留心查察俟抵省時詳細縷陳奏入

上命軍機大臣傳諭楊岳斌劉蓉曰前諭楊岳斌於帶  
赴甘肅之勇隊內酌留數營扼守潼關現在該督業  
已由涇州進發隊伍先驅計程愈遠自未便紆道折  
回階州現已克復蕭慶高一軍能否調赴東路著劉  
蓉慎遵前旨酌量辦理安定雖已解圍而甘省逆氛

徧地尙肆鴟張著楊岳斌統率所部迅赴蘭州省城  
妥籌勦辦以副委任

二十三日

丙戌

德勒克多爾濟桂成奏言 臣等前

因貝子札那格爾第呈報竄匪擾邊拏獲奸細  
訊有圖竄包頭歸化城等語因兩盟蒙兵駐守  
逼近賊蹤當卽一面札飭沿河官兵於緊要口  
岸嚴密分布相機堵遏一面派佐領德博克諾

敏等分路前往花馬池黃渠橋一帶遠探如有  
回匪窺擾卽令飛報以便撥兵堵截五月十八  
日突有回匪千餘擾及邊牆經札齊魯克齊齊  
默克督兵進剿斃匪七十餘名陣亡官兵二十  
一員名受傷六名臣等仍飭該貝子札那格爾  
第等督率防兵確探賊蹤加意巡防勿令竄越  
此次傷亡官兵查明旗佐再行請卹惟蒙兵因

口糧不敷日用兼之春夏雨澤稀少米糧昂貴  
臣等令各該旗札薩克王公等量力捐輸出力  
者酌覈請獎該官兵等由山西撫臣照防守本  
境章程每兵每月改放津貼銀九錢臣等復經  
咨商將防兵馬匹津貼乾銀飭歸綏道趕緊籌  
給俾資接濟奏入

上命軍機大臣傳諭德勒克多爾濟桂成沈桂芬曰甘

肅回匪糾黨千餘擾及花馬池定邊一帶經在防蒙  
兵督隊迎勦將賊擊退殺斃回匪七十餘名此股賊  
匪雖被蒙古官兵擊退猶在附邊一帶肆擾該處邊  
防遼闊設被越出東竄蒙古地方蔓延愈廣更難收  
拾仍著德勒克多爾濟等嚴飭在防蒙兵勤加偵探  
嚴密扼守遇賊卽擊毋令匪蹤偷越並咨明都興阿  
兼嚴後路之防方爲妥善陣亡各旗兵丁著該將軍



等查明請卹此項蒙兵因所領口糧短絀情形甚爲拮据雖經各該旗札薩克王公等量力捐輸尙恐緩急難恃沈桂芬照依本境防兵章程改放津貼不敷人馬日用該官兵等防勦正在喫緊豈能枵腹荷戈著該撫於該官兵等應領口糧外酌量加增飭催歸綏道趕緊籌給俾資接濟

二十八日

辛卯

都興阿穆圖善奏言本月初四日

由歸綏解到糧米六百餘石當卽分散各營計  
敷數日之需適湖北所招新勇亦於是日到營  
因思滿城兵單餉絀該逆四面築壘晝夜圍撲  
若僅撥數營援剿恐難得力臣等會商意見相  
同遂酌撥兵勇三千餘名於初五日親自督帶  
起程又飭杜嘎爾酌帶馬隊官兵三四百名護  
運軍裝其老營暫留副都統金順記名副都統

托克屯記名總兵胡世英頭等侍衛沙克都林  
札布照料 臣等督軍前進是日巳刻卽抵滿城  
見城東北一帶約有逆壘十餘座離城不足半  
里南面稍遠有賊圩五座旌旗林立形勢聯絡  
當晤副都統常陞察詢賊情該逆圍城三面兇  
燄甚張我兵新到亟宜乘此銳氣相機勦辦提  
督黃金山劉定邦副將彭文林叅將李得勝等

俱告奮勇先攻東北最近之壘當撥杜嘎爾督  
飭侍衛色楞額常順額爾登布率營總伊能額  
等督帶馬隊截勦南路援賊副都統善山保本  
福率營總常福蘇彰阿截勦北路援賊相機接  
應黃金山等各帶所部鼓譟前進已革提督銜  
叅將李曙堂記名總兵陳天佑各帶所部圍攻  
稍東賊圩該逆人衆壘堅毫不驚亂環施槍礮

死力抗拒我軍間有傷亡勇氣倍增跳越壕溝  
三道直薄壘牆矢石交下密如雨注黃金山奮  
勇先登劉定邦等分投爭上副將杜上魁叅將  
李得勝俱受槍傷副將彭文林左眼受石傷猶  
奮勇力戰維時已革副將陳東霖副將馬洪勝  
王培森李佑清袁復清總兵張紹武已革都司  
劉清益等帶勇分攻各壘四面蟻附登時攻拔

逆壘五處將賊衆全行誅殺無一漏網奪獲槍  
礮刀矛牲畜甚多其後七壘踞賊見我軍銳不  
可當料難抗拒出壘狂奔復經杜嘎爾善山保  
色楞額常順等分投追剿屍橫徧野追至漢城  
西門橋斬殺殆盡滿城迤東各壘一律平毀是  
役斃賊二千餘名我軍傷亡五十餘名西南賊  
壘亦於是夕宵遁次日黎明突有馬賊二三百

名由北路沿山而來臣都興阿以營牆未修親帶戈什哈出營察看飛飭杜嘎爾帶隊包抄該逆係由平羅北山一帶擄掠而歸遂先飭參領卓明阿率委驍騎校忠祿等帶戈什哈十餘名由南過河抄截協領勝福同花翎圖他布數名由北追奪牛馬該逆猝不及防不知人數多寡分投四竄卓明阿等盡力追殺該逆人多互相

接應卓明阿及藍翎甲兵格蘇特依俱受矛傷  
幸不甚重杜嘎爾帶隊馳至該逆向西南竄逸  
我軍追殺二十餘里斃賊四十餘名該逆閉城  
不出臣等帶隊直赴城西詳察地勢西門橋有  
老巢三處土木壘砌堅高異常該逆復有南路  
納家開一帶集來援賊在橋北添立二壘尙未  
築成臣等商擬乘此聲威併力進取一面令副



都統金順副都統托克屯總兵胡世英等進取  
城東各壘以牽賊勢卽於初十日臣都興阿督  
隊由南路進攻西門橋臣穆圖善督隊由北路  
橫抄進攻迤北二壘該逆傾巢並出鏖戰逾時  
賊勢不支紛奔回壘我軍乘勝追抵壕邊該逆  
方欲閉柵拒守黃金山劉定邦等帶領勇丁已  
攀越而進短兵格鬪痛加誅戮當將新舊五壘

全行攻拔臣等親督馬步追殺直至城南吳家  
湖地方該逆赴水逃命我軍亦梟水尾追勦殺  
無算卽令總兵陳天佑督帶所部兩營分紮西  
門橋賊壘遊擊劉宏發帶禮字中營分紮西南  
堤是役斃賊千數百名我軍傷亡數十名查此  
次馳援馬步四千餘名裹糧而進幸賴

皇上天威將士用命攻拔逆壘多處立解城圍並奪取

附城老巢三處似覺得手亟應乘此聲勢相機  
辦理惟餉糈萬分缺乏繞赴滿城更難接濟

臣

等現在飛催設法轉運如兵食無缺卽當督兵  
由城西進取兩路夾攻至固原竄逆圍擾中衛  
臣等前請

飭下雷正綰先由南路援勦並擬俟滿城解圍撥兵前  
往惟是天氣亢旱山磧水草到處缺乏而內地

玉泉廣武等處又無進兵之路甯武踞逆現聞  
我軍進攻招集南路黨羽來援中衛之圍似可  
稍鬆而固原竄逆大股麤至惟盼雷正綰迅撥  
勁旅赴中衛援剿以收夾擊之效

同日楊能格奏言慶環西面回巢雖經官軍分  
路掃蕩而東北定邊大水坑紅柳溝狼兒溝鐵  
角城等處均爲陝回竄踞四出焚掠定邊爲甯

夏通衢有礙都興阿軍營餉道當卽分咨各路  
防軍曾攻一面飛飭魏添應移營北路相機進  
剿五月二十六七八等日狼兒溝踞逆二千餘  
人竄擾該營列陣轟擊賊亦排隊迎拒相持數  
日未退臣飛調前派員弁督率驍捷親軍馳往  
援應由閒道繞出賊後賊卽撤隊回巢鎮威精  
選兩營追擊十餘里沿途斃賊百餘名閏五月

初三日回匪馬步二千餘人由大水坑竄至紀  
家原之大山頭魏添應約派往各員督隊伏於  
溝內自率親兵小隊陝勇全隊至對面山頭嚴  
陣以待該逆下山越溝來撲魏添應乘其半渡  
督馬隊由山左下步隊由山右下溝內伏勇聞  
礮突出該逆驚慌奔逸我軍三面環攻斃匪二  
百餘名奪馬數十匹匪衆自相踐踏墮巖落澗

者無算魏添應以鐵角城踞逆亟須剿除方免  
牽掣是日約會各員率驍捷親軍由大路抄襲  
挑選精銳募土人引導於是夜由山後僻徑掩  
襲四更後至鐵角城縱火焚燒賊衆驚亂我軍  
乘勢殺入斃賊千餘名餘孽揆捕殆盡當將該  
城克復據擒獲各犯供稱陝回二萬餘人自鹽  
茶固原克復後逃至定邊縣靈州大水坑紅柳

溝鐵角城羊圈山狼兒溝一帶盤踞現因預望  
城蒙城等處皆破逆首戴三分爲十餘股每股  
馬步數千人四出打糧意圖東竄又據駐紮石  
劉家城精選左營智字中營稟報五月二十九  
日賊由狼兒溝二十餘里南浦溝門竄出蔓延  
十餘里翻山竄擾邢家河一帶該營兵單不敷  
堵剿臣調回親軍添派員弁調集民團一由溝



門下截剿一由溝門上迎戰民團由山後翻山  
助勢該逆整隊抗拒且拒且走見各山民團聲  
震巖谷前隊驚擾狂奔步隊披靡被槍石擊斃  
及溺死者數百人屍填山谷陣斬賊目哈伏威  
一名生擒回目吳成周馬實和等十八名正法  
陣亡親兵一名受傷七名並據探報紅溝大水  
坑等處回逆萬餘閏五月初四五等日向東紛

竄保安縣吳慶鎮一帶並窺伺安化縣元城鎮  
自雷正綰魏添應攻克預望城等處後環縣西  
南防務稍鬆而陝回屬聚定邊縣大水坑狼兒  
溝保安縣吳慶鎮一帶蔓延數百里屢擾安化  
縣境攻撲防營是慶陽西南防務雖鬆東北防  
務轉緊且東北兩面山徑叢雜每一隘口卽爲  
數路通衢分防則不能兼顧合紮則慮被紛乘

陝回慄悍詭譎忽東忽西難保不牽掣我師暗  
爲靈甯犄角現抽調西南各哨分防要隘並飭  
魏添應相度機宜兼顧後路將各要隘布置扼  
禦以期防勦並用無誤事機惟此外通陝之處  
甚多均應一體嚴防以杜竄越應請

飭下陝西撫臣添撥兵勇馳赴延安鄜州安邊保安等  
處扼要堵勦俾免疏虞至慶防弁兵此次分路

進剿攻克鐵角城回巢擒斬逆酋哈伏威等實屬異常出力在事文武員弁籲懇

天恩俯准獎勵其陣亡勇丁一併奏請

賞卹以昭激勸均奏入

上命軍機大臣傳諭都興阿穆圖善雷正綰劉蓉楊能格曰逆回糾黨築壘圍撲甯夏滿城經都興阿等親督官軍前往援剿攻拔賊壘多處斃賊二千餘名城

圍立解緊靠郡城之西門橋各賊壘復經官軍奮勇  
攻勦一律平毀逼城而營卽著都興阿穆圖善乘此  
聲勢激勵兵勇迅將甯夏郡城剋日攻拔不得再有  
耽延楊能格當設法籌款將甯夏軍糧源源轉運毋  
令缺乏固原竄逆圍擾中衛此股不除於甯夏一軍  
終形掣肘著雷正綰懍遵前旨督飭援軍迅解中衛  
之圍埽蕩逆氛以收夾擊之效慶防官軍分路勦賊

攻克鐵角城擒獲逆會哈伏威等尙屬奮勉所有歷  
次尤爲出力員弁准由楊能格彙案保奏不准稍有  
冒濫回逆詭譎異常現在東竄保安縣境並圖窺伺  
安化縣元城鎮難保不牽綴我師暗爲甯靈犄角著  
楊能格督飭魏添應等相度機宜實力防剿並著劉  
蓉添撥兵勇馳赴延安鄜州安邊保安等處扼要堵  
截前據德勒克多爾濟等奏稱回匪千餘擾及花馬

池定邊一帶邊牆希圖竄越經該處蒙古防兵擊退  
該逆仍在花馬池定邊一帶分股盤踞當經諭令德  
勒克多爾濟等咨明都興阿兼嚴後路之防此時甯  
夏官軍進紮西門正在得手之際該將軍當分撥兵  
勇將花馬池定邊一帶回匪先行剿除肅清後路毋  
任甯夏大營兵勢爲所牽掣

都興阿又奏言頃據五品頂戴已革安徽巡撫

翁同書呈稱本月初一日靈州逆首馬德帶領  
回匪三千餘人直撲花定一帶意圖擄掠糧石  
經侍衛壽昌副將趙有勝段登雲探實該逆均  
在紅莊大巨灘繆家小掌等處遂於初二日各  
帶所部前往行近紅莊見有馬步賊七八百名  
當卽分隊進剿壽昌率營總貴陞馬隊迎擊趙  
有勝段登雲分兩路包抄斃賊百餘名賊始望



西奔竄我軍追殺二十餘里將近紅柳溝因山  
勢險峻未便窮追撤隊回城共斃賊二百餘名  
生擒三十二名初三日該逆復竄花馬池所屬  
之史家莊大股屯聚田家掌一帶經翁同書飭  
派參將春福帶隊堵剿副都統西們克西克帶  
馬隊由邊牆繞衝賊後馳至吳山堡遇馬賊二  
三百名該副都統督隊衝剿斃賊三十餘名生

擒二名直追至聶家梁迤東與步軍合隊回城  
初四日馬步逆匪又至田家掌一帶肆擾春福  
領直晉馬步官軍行抵王家莊見有馬賊槍斃  
數名賊卽遁走追至邊家窪地方援賊數百名  
排列抗拒我軍施放連環槍斃賊十數名賊  
猶不退西們克西克馬隊繼至賊始驚潰我軍  
乘勝斬獲甚多伏查固原竄匪盤踞花定以西

時出滋擾雖屢經官軍擊退而紅柳溝大水坑  
一帶老巢林立出沒靡常實欲阻我糧運牽掣  
官軍已飭翁同書嚴飭各營加意防範相機剿  
辦奏入得

旨著督飭翁同書及帶兵各員認真防剿毋稍鬆懈

欽定平定陝甘新疆回匪方略卷一百五 乙丑年

六月初四日丁酉恩麟陶茂林奏言查自本年四

月初七日甘肅回逆勾結撒拉回匪陸續竄踞

安定東西南三路各隘口層層阻截欲爲久困

之計臣陶茂林隨時派隊雕剿每次斃賊二

三名四五十名不等弁勇亦閒有傷亡十二日

三面踞匪並撲關外營盤臣激勵將士待該逆

通近營壘我軍槍礮刀矛更番迭進繼以城上  
然礮共斃馬步賊匪二百餘名窺該逆情狀必  
欲得縣城而甘心幸我軍以少勝多當將大股  
壓退嗣後該逆仍在各處環伺十四日以後逃  
出難民僉稱該逆偵知東路援兵西來已分股  
前往迎拒臣密飭各營整隊乘機抄襲適接雷  
正綰派援安定提督劉正高函稱安定縣東青

嵐山竄匪甚夥勢將抗我援兵約將近城賊壘  
乘隙進攻以收夾擊之效臣卽派員會同在籍  
紳士楊昇並在城文武分帶民團內守城垣外  
備策應並派副將方占奎參將李春海扼紮北  
川總兵余化龍副將張明亮傅天錫堵遏南川  
總兵仇有道帶領招集潰勇誘敵於西川十九  
日天甫黎明臣自率親兵馬隊當先遙見東山

賊匪飛奔而來陣式不整料知東路被劉正高  
一軍擊敗卽催調各部分途衝突維時總兵余  
化龍等已將南川賊穴焚燬賊勢大窘由張家  
灣斜奔西川我軍亦由張家灣掃蕩而進仇有  
道正在西川與賊接戰賊見後路官軍齊至歸  
營固守我軍槍礮火彈轟擲賊勢不支棄壘狂  
竄東山北川之賊亦同時逃遁二十日大雨如

注臣冒雨跟追泥淖之中奔走二十餘里斃賊多名偵探敗賊竄歸關門口沙坡大寨子老巢我軍收隊先後殺賊一千餘名立解城圍逐日分途搜捕聞有賊騎在南鄉內官營窺伺隨時邀截疊有斬擒臣恩麟正在派軍追擊旋接提督劉正高函稱各營由王公橋節節進剿十八日至青嵐山賊匪馬隊二千餘人星馳而至當



筋精選左營迎擊劉正高帶親兵馬隊接應斃  
賊三四十名賊衆敗走我軍追殺三四里次日  
傳令各營出七成隊伍追勦突有馬步賊八九  
千人分三路抵敵劉正高令各營分左右兩路  
前進自率親兵從中路挑戰賊匪業經挫敗心  
膽已寒交鋒未久隨卽潰竄我軍斬殺二百餘  
名生擒十四名訊明正法二十日大雨步隊難

行二十二日拔營直抵安定城下又准成祿函  
開劉正高由王公橋移營青嵐山之後旋有敗  
騎暗出劉正高後路欲斷我軍聲援成祿於十  
八日親帶川兵及趙德正馬天祥督率五營分  
三路繼進一出盤龍灣一出葛家岔繞赴安定  
一截賊後使之腹背受敵守卡之賊無心戀戰  
狼奔豕突逃避不遑成祿督隊由中路西鞏驛

直至王公橋北岸當將賊匪悉數逼歸西路臣  
等查此股圍攻安定賊匪共有數萬周圍環布  
幾於無隙可乘仰賴

廟謨廣運援師接踵而來岌岌孤城幸免疏失此次安

定解圍臣陶茂林因時取勝而攻堅挫銳皆賴

劉正高所部各營連戰皆捷先禡賊魄又有成  
祿一軍互相援應解圍之役劉正高之力爲多

現在鶴齡及雷正綰續派總兵劉車龍等軍均  
接踵進紮安定成祿於閏五月初四日率隊到  
省臣陶茂林亦將所部移紮金縣清水驛暫行  
休息再與成祿會籌進剿記名提督劉正高奉  
派應援衝鋒陷陣首著勤勞可否以提督卽行

簡放其尤爲出力之署安定縣知縣胡國棟等並請分

別給獎出自

聖主逾格鴻施至先後突圍接仗陣亡之副將胡海萬  
等懇

恩飭部從優議卹以慰忠魂其次出力及陣亡員弁紳  
勇容俟查明再行奏請

恩施奏入

上諭內閣曰甘肅回匪勾結撒拉回逆竄撲安定縣城  
經陶茂林設伏迎擊斃賊數百名四月十八九等日

雷正綰所派提督劉正高一軍由王公橋青嵐山將賊擊敗成祿督率五營截賊匪之後腹背夾攻賊大敗潰陶茂林催調各部將南川賊巢一律焚燬復由張家灣掃蕩而前該逆棄壘狂奔逐北二十餘里先後斃賊一千餘名安定縣城圍立解著恩麟等督飭在事各軍將關門口等處老巢實力掃蕩毋留餘孽此次尤爲出力之記名提督劉正高著以提督遇缺

題奏署安定縣知縣胡國棟著俟補缺後以直隸州  
知州升用並賞戴花翎教諭藍毓青著賞加同知銜  
署典史闕冠英著俟補缺後以縣丞升用並賞給六  
品銜署守備秦兆祥著開復處分以都司升用並賞  
戴花翎江西候補道楊昇著開復處分仍以道員歸  
於原省候補並賞加按察使銜陣亡之總兵銜副將  
胡海萬副將銜參將王茂盛遊擊黃金聲都司梁有

興李玉金江慶餘千總劉明勝林文理把總周得勝  
明天榜柯長貴均著交部從優議卹

成祿恩麟奏言 臣成祿進抵安定聞北路賊匪

竄撲中衛逼近皋蘭省城根本重地必須趕緊

保護接 臣恩麟來信亦催令赴省隨囑劉正高

暫駐安定揆捕潛匪 臣卽統率原營暨鶴齡三

營兼程前進閏五月初三日馳抵省城始知賊



匪聞有大兵先已遠竄惟近省北鄉紅圈等處  
回民因平番古浪漢圍堵禦竄匪傳言紅圈回  
民容留外賊前往追捕該回等聚衆相抗互有  
殺傷 臣恩麟派員馳往彈壓漢圍稍卻該回藉  
詞焚殺擾及皋蘭縣屬村莊以致人心疑懼紅  
圈等處地方距省甚近且爲產糧之區恐其勾  
結外匪蔓延爲害則省城震動糧路耗竭所關

匪細省城兵勇無多難以派兵遠出商派鶴齡

三營官兵卽日拔隊前往授以機宜令其分別

彈壓臣成祿卽將趙德正等勇丁在省城東門

外紮營以壯犄角之勢復與臣恩麟周應各

查看堆撥防勇均尙整備省城人心鎮定現時

東北兩路雖有雷正綰都興阿諸軍連敗賊匪

攻克地方然潰匪出沒無常鞭長莫及近省一

帶狄河二州尙未克復東北兩路游匪亦不時  
竄逼金皋等縣臣恩麟屢咨雷正綰速派曹克  
忠一軍來省商勦附近賊匪而雷正綰進勦喫  
緊至今數月未能分撥陶茂林一軍在安定  
散所餘不足十營辦理諸多掣肘臣成祿

旨馳往口外勦匪亟思集兵前進現與臣恩麟籌商  
刻下所帶五營加聯捷馬隊不過三千人新疆

賊勢已張何能深入況此時肅州爲賊所踞必  
須先行勦除卽西路肅清大兵出關數千里一  
片沙漠若不籌辦糧餉安設臺站官兵亦難枋  
腹前進從前口外用兵全恃蘭州後路接濟餉  
械若不俟內地稍定次第籌勦深恐徒勞無益  
再四籌議惟有先保省城一面催調兵餉就緒  
再行節節進勦臣等受

恩深重亦願早靖疆場紓

聖主西顧之憂第此時兵力不足協餉久缺米糧匱乏

臣

成祿在固原起程雷正綰議撥六營嗣到靜

甯祇有兩營其餘四營至今尙無信息不但出

口不敷卽在口內攻勦大股賊匪亦尙單薄總

督楊岳斌提督鮑超所部已不下三萬人似足

敷用惟楊岳斌等來甘尙無定期 臣等擬請

飭下楊岳斌先派十營來甘由臣成祿統帶聯捷行抵  
西安置辦軍械亦請

飭令趕緊來甘以便商酌勦辦總督楊岳斌前經奏請  
將南省釐金分撥三成以濟甘省軍糈今先撥  
十營來甘此項釐金卽應趕緊催解以免匱乏  
應請

飭部查明酌定每月起解若干源源運解用供支放

成祿又奏言竊維用兵勦賊要在將領得人方能上下協和隨心應手 臣 此次奉

命西來本無隨帶將弁其雷正綰撥來二營係總兵趙德正副將馬天祥二員管帶川兵三營係總兵鶴齡管帶五營止有將官三人而 臣 營仍無差委之員且此起川兵雖尙壯健然其性輕率驕悍與外省兵勇合營驟難融洽全在駕馭得法

方能合力勦賊察看鶴齡人尙老成惟約束弁  
兵未免過寬聞其路過秦州兵丁卽恃強生事

迨至會甯與臣隨帶兩營會合前進該營弁兵

屢與勇丁口角現經臣申明紀律嚴行約束派

赴省城北鄉一帶進勦雖尙能安靜奮勇終恐

日久另生枝節臣查有現在雷正綰軍營之提

督譚玉龍謀勇兼備自同治元年隨臣在陝西



勦賊相處數年深悉其精細勇敢善撫士卒實  
爲結實可靠之員擬請

旨飭下雷正綰速飭譚玉龍管帶前撥四營勇丁兼程  
來營以資進剿設因北路喫緊或酌派一二營  
或竟令譚玉龍帶領所部親兵百餘人飛速前  
來庶臣得收指臂之助再臣察看川兵尙可得  
力惟幫辦營務處陳慶有一員暨親兵六十餘

人最爲狡猾餘兵均受嗾使留之誠恐無益並  
請

旨飭四川總督駱秉章卽行文將陳慶有等弁兵調回  
歸伍則其餘弁兵自易訓練

恩麟又奏言狄河回逆兇悍狡詐與各路賊黨  
互相勾結不特爲蘭州之患並爲全省之憂河  
回以受撫爲名陽奉陰違可暫而不可久聞安

定解圍之日河州著名逆首衆賊呼爲四阿渾  
被我軍用礮轟斃餘匪退踞關門口一帶臣體  
察情形及此早圖可期得手惟隘口甚多非厚  
集兵力恐豕突狼奔難以控制陶茂林所部十  
餘營合之劉正高劉車龍等軍亦祇二十餘營  
而陶茂林久困之師尙須整飭劉車龍所部新  
募來甘勢難獨當一面至督標兵力及宣威軍

勇自應仍顧省城以資鎮壓總督楊岳斌於四月二十日到陝迄今一月尙無西來的信蘭州屢次震動本由狄河股匪竄突靡常現在安定解圍該匪震懼軍威踰伏不動然兵來則退兵退則來若各軍西去該匪復肆鴟張恐燎原之勢撲滅更難當此機有可乘不宜稍涉遲緩臣擬三路進兵兜裏以期一鼓成擒現在聯捷尙

未到甘成祿鶴齡兩軍先後抵省 臣面爲商榷  
意見相同已將該二軍暫留會辦 臣再與陶茂  
林熟籌堵剿一俟分布定局再行隨時奏

聞惟成祿等本奉

命西征肅州甘州一帶未便久滯師行仰懇

天恩飭令楊岳斌趕緊督隊來甘俾換成祿等馳援西

路實於全局有裨

恩麟又奏言曹克忠一軍餉項本由陝省供運  
經雷正綰奏明將甘肅秦州釐金一項改歸曹  
克忠暫濟軍餉本年三月開復由臣備帳房一  
百頂火藥五千斤稍資接濟茲據曹克忠呈稱  
陝省解到餉銀每月祇有八千之數所部十九  
營每營僅發銀四百餘兩且不能按月接解秦  
州因各路漸通釐金減色轉瞬新募勁旅到甘

添兵愈多需餉愈鉅帳房軍火亦異常短絀各營士卒譁潰堪虞呈請奏催 臣查係實在情形而甘省奇窘久在

聖鑒之中 臣不敢稍存推諉復極力辦足火藥一千斤帳房一百頂於五月二十九日解赴大營收用至餉需銀兩委實無款可籌卽帳房火藥亦恐不能爲繼仰懇

天恩飭下陝西巡撫劉蓉將曹克忠一軍餉銀並軍火  
帳房等項源源撥解以固士心而利攻勦

恩麟又奏言自回匪占踞肅州後風聞安西州  
玉門敦煌等縣回獵相繼變亂閏五月初七日  
接據署高臺縣知縣常祥稟稱有口外難民由  
北草地逃至高臺縣該縣細詢情形據云二月  
二十四五等日玉門縣屬赤金惠回二堡有青



頭山獵戶突然叛亂赤金堡城失守經玉門文武帶勇堵剿該匪竄入窟窿山餘匪勾結安西州屬布隆吉逆回於三月十一日起事占踞布隆吉堡城戕官劫庫十五十六等日安西州城並所屬瓜州踏實雙塔小宛等堡逆回紛紛蠢動雖經安西文武督派兵團次第撲滅而逃匪在西南北各湖及敦煌地方盤踞以致敦煌各

城鄉回匪又於四月初七八日全行變亂安西  
州營派撥兵勇會同該縣民團協勦將城關各  
逆殲滅惟南門逃出餘匪數百人勾結赤金堡  
敗竄獺戶併入南湖地方肆行焚殺其窟窿山  
逆回仍不時出巢滋擾惠回堡千總張維斗會  
合各路兵勇堵擊該縣復探得嘉峪關城於三  
月十六日經遊擊張耀林督隊攻擊賊勢不支

盡數竄入肅州城內當將嘉峪關收復並據常  
祥聲明肅州境內徧地賊氛遇有探差動輒殺  
害卽設法繞道來往仍多阻滯 臣 查常祥所稟

雖得諸難民供詞而失事地方日期俱能歷歷  
指出其安西州並玉門敦煌兩縣回匪變亂固  
無可疑今事隔多日是否剷除淨盡抑或尙在  
隴張寶難懸揣現在嘉峪關雖已收復而肅州

仍爲匪踞出關之路尙待疏通當再設法差探  
確情并各營汛員弁如何下落另行奏報

陶茂林又奏言四月初一二等日 臣部勇丁因

索發欠餉紛紛潰散接仗失利賊復圍撲安定

臣 憤懣焦急將大概情形咨由督 臣 恩麟奏報

各營前索欠餉當諭以協餉不日卽到如數補  
發旋即少安惟圍隊等營退有後言謂補發不

過藉詞我等從征多年幸免凍餒一到甘省衣食不敷不若回家安業謀生再四拊循亦僅面從四月初一日移營宋家川擬攻大寨子踞賊臣往相度地勢而圍隊右營不至馳歸彈壓則已遁去初二日茂字老中前後左四營並馬隊二起亦逃赴通渭縣地方附從散隊察其行蹤走東南一路軍械旗幟號衣等件均被拐走維

時大寨子賊正猖獗不能親往查拏先後差弁  
堵截而人多日衆撫之不受勦之不能卽飭經  
過各州縣豫集兵役民團密防搶掠格殺勿論  
並飛咨各路軍營鄰近川陝等省一體截拏免  
致聚衆謀亂仍嚴查起意爲首糾衆裹逃之人  
訊明斬梟以儆將來初五日賊集馬步數萬由

大寨子乘虛撲營

臣

督飭各營嚴守壁壘一面

出隊衝殺自辰至申鏖戰五時之久該逆重重  
圍裏我軍面面受敵致先陷前敵茂字副左營  
提選右營其茂字四營前面拒敵營壘又被攻  
陷急令總兵陶世貴副將陳正榮突圍飛調在  
後之提選四營救援臣亦卽由賊隊東北殺出  
統領提選營已到隊伍吶喊而進賊始稍卻救  
出殘兵數百名趕令收隊退守安定是役斃賊

千餘名而營官陶萬成何仕科邵華壁熊東海  
栗有勝陳春庭鄧有富文泰山廖應芳等俱力  
戰遇害陣亡文武員弁多名勇丁長夫二千餘  
名嗣以各營分紮要地均未便遷就撤調當就  
現存安定六營僅辦堵剿商之恩麟飛咨固原  
提督雷正綰迅派勁旅援應此後賊衆晝夜環  
攻勢甚危急幸賴



皇朝通志卷一百三十一  
皇上威福援兵東來兩軍夾擊得解城圍並准陝西巡

撫劉蓉咨業將臣部潰勇擒獲首犯將餘黨分

別遣留其南趨兩當徽縣另股亦經飛飭駐防

鳳縣之雄毅軍嚴加堵截勒繳軍器始准放行

等語臣查潰勇滋擾誠恐蔓延爲害惶悚莫名

幸經陝西巡撫劉蓉會同陝甘總督楊岳斌署

西安將軍德興阿查辦妥速不致貽患將來究

由臣駕馭無術調度無方所致上辜

簡任負咎滋深籲懇

天恩治以應得之罪爲貽誤戎機者戒其陣亡之總兵  
陶萬成等應懇

天恩飭部照例議卹其餘陣亡弁勇另查彙辦抑更有  
請者臣初在江南祇領親兵一營俱係楚省勁  
勇積漸擇尤俾充圍隊隨原任西安將軍多隆

阿援陝進剿西同鳳三府回逆糧餉悉由大營糧臺支發其時卽欠圍隊餉銀一年而打仗奮勇甚爲得力多隆阿於同治二年八月加派六營嗣又續募至二十四營自二年八月至本年三月按楚軍例應支勇餉公費等項銀九十五萬餘兩而供餉之陝省每月祇解八千兩前奉部議准由江海閩海兩關及四川各撥銀五萬

兩均未解到慶陽糧臺亦未供支二年秋至今  
春共計收過陝甘兩省餉銀二十四萬餘兩製  
造帳房歷次招勇經費亦在其中其陣亡賞卹  
等項需銀數萬兩均未能卽時發給夫勇與兵  
異旣無坐糧以贍其室家更乏犒賞以資其衣  
履南人北來水土不服冷暖迴殊出食稻衣錦  
之鄉歷窮邊荒沙之地所習不慣相率思歸執

法太峻則恐激之使逃原情稍寬更恐狎而生

玩羈縻不易馭撫兩難臣一介武夫渥叨

知遇授以專閫重寄俾張撻伐卽甘苦與共鞠躬盡瘁  
皆臣子職分所當爲惟值此時艱幾於智勇俱  
困至所需麩斤恩麟委員四出竭力梭羅於今  
三年兵燹餘生民力告竭甘省地瘠民貧兵單  
餉乏數年來恩麟辦防辦勦維持保護具有苦

心臣識庸才淺遇事咨商每破賊巢與恩麟就地設法然亦僅能隨辦隨用敷衍目前臣知甘省口內外滿綠各營餉項均屬支絀已久不獨臣部一軍是以卽有不敷尙欲極力支撐不欲以窘迫情形上煩

聖慮今除潰陷各營尙存十三營整頓鼓勵猶可爲西陲捍患然一誤不敢再誤仍當懾之以威結之

以恩訓以有勇知方不使相率解體所需餉項  
仰祈

飭下陝西巡撫將按月應需之餉依期解到以供補救  
而資接濟其江海閩海兩關及四川專餉亦請  
旨迅賜催解並懇

諭令總督楊岳斌及早到任俾臣隨時進勦獲聽指揮  
全軍甚幸甘省幸甚均奏入

上命軍機大臣傳諭楊岳斌雷正綰成祿恩麟曰狄河  
回匪前在安定被勦窮蹙自應乘機攻取老巢嘉峪  
關雖經收復而羣賊萃於肅州城內出關之路尙未  
疏通甘省軍務在在均關緊要楊岳斌前已行抵涇  
州著卽督飭所部馳赴蘭州將各路軍情通盤籌畫  
酌派兵勇進攻狄河匪巢迅將州城克復成祿等奉  
旨西征責無旁貸著俟楊岳斌抵省後迅卽督同聯



捷馬隊進取肅州疏通道路乘勝出關如兵力不敷  
著楊岳斌撥兵助剿雷正綰前撥六營尙有四營未  
到仍著該提督速飭譚玉龍管帶四營前赴成祿軍  
營以資進剿川兵幫辦營務處之陳慶有及鶴齡行  
營親兵六十餘人最爲狡猾留於軍營殊屬無益卽  
著成祿將陳慶有等弁兵遣散回川歸伍安西玉門  
敦煌等州縣回匪變亂並民勇收復嘉峪關詳細情

形著楊岳斌確切查明據實具奏陶茂林奏勇丁索  
餉潰散賊匪乘虛撲營自請治罪一摺營勇潰散是  
否因欠餉過多抑或該營弁剋扣侵蝕所致仍著楊  
岳斌恪遵前旨確查具奏俟奏到時再降諭旨

恩麟又奏言前遵

旨籌議派赴新疆各起援師應需糧餉業將甘省倉庫  
空虛地方凋敝亟須鄰省措解以備供支由驛

陳奏蒙

恩允准 臣卽飛咨鄰近各省籌解餉銀迄今尙無一處  
具報起運督 臣楊岳斌一軍現已行抵甘境其  
奉

派出關剿賊之成祿鶴齡各軍現已抵蘭卽須西進鮑  
超所部諒不久亦可西來約計所需爲數甚鉅  
臣前已分飭經過各屬一體豫備供支並酌提

捐輸錢文採買麥麩祇以甘省各州縣多遭蹂躪輸將未能踴躍兼以商販裹足釐金所獲無幾萬難敷十營兵勇逐日供支至各營應需軍餉雖奉

旨撥有專款第萬里長途難保必無遲誤各軍抵甘後偶有缺乏仍不能不量力協濟俾速軍行伏思各省積欠甘餉數至二千數百萬之多此時若

責令同時並解固力有不逮但自甘省軍興以  
來指撥餉銀爲數亦不爲少各省籌解百無二  
三危迫情形實非奏牘所能盡仰懇

天恩飭催各省迅速委解以期無誤軍行奏入

上命軍機大臣傳諭瑞麟劉長佑駱秉章李鴻章閻敬

銘吳昌壽沈桂芬劉蓉馬新貽郭嵩燾孫長紱曰援  
甘並進勦新疆諸軍現已陸續到甘需用甚鉅該省

州縣多遭蹂躪捐輸旣無可勸釐金所收亦屬無幾  
非各省力籌接濟餉需匱乏飢軍譁潰堪虞各該省  
疊奉諭旨先撥急需之款自應趕緊解濟以備供支  
著瑞麟劉長佑駱秉章李鴻章閻敬銘吳昌壽沈桂  
芬劉蓉馬新貽郭嵩燾孫長紱將欠解協甘急餉趕  
緊籌措源源接濟毋再遷延推諉致誤戎機

恩麟又奏言據曹克忠呈報自半角城一帶回

匪勦撫後時派營員於投誠村堡巡防以免生  
事四月十六日探得羅山等處賊匪糾合鹽茶  
廳紅鵝城官橋堡餘孽六七百名潛赴麻圪塔  
等處麕集麻圪塔回族業已投誠當北匪南竄  
未據該處回目稟報顯與逆匪勾通十七日曹  
克忠率馬步各營不動聲色暗抵麻圪塔地方  
布置甫定賊匪放槍擲石併力抗拒我兵四面

分擊齊上堡牆該匪倉皇潰亂當被官軍殲斃  
無遺其附近回民堡寨一律平毀斃賊三千餘  
名奪獲軍械甚多馬羸千餘匹 臣查麻圪塔等  
處回匪旣已畏罪投誠自應革面洗心勉爲良  
善乃收降未久輒敢招聚匪黨抗拒官軍頑梗  
性成終難望其改悔經曹克忠不動聲色立絕  
根株不致貽患且使各處降回知所做畏不敢



復萌反側之心奏入得

旨仍著飭令曹克忠隨時訪察妥爲防範不可稍涉大意

恩麟又奏言臣前據署王子莊州同崔暘稟稱

肅州知州陳墉用安肅道關防具稟止兵經臣

飭將陳墉原稟送省覈辦嗣據送到陳墉兩次

稟函臣當卽拆閱大致以護肅州鎮成桂密商

署安肅道恆齡收養精壯遣犯以資捍衛適有  
素不安分民人何鳳鳴等傳集鄉練入城城內  
遣犯附和喧傳勦滅回民陳墉因肅州回族居  
東關者十有八九當卽出城安撫成桂輕聽謠  
言於二月二十四日遽將各城封閉並將大礮  
軍械排列城門二十五日民勇驟開槍礮城內  
回漢紛紛擾亂自將房屋焚燒死者甚衆被遣

犯殺害者亦多經營弁護衛陳墉馳往彈壓並  
出示曉諭兵民不許妄動漸次解散漢回悅服  
惟各鄉團練仍不時尋釁恐釀大禍請派大員  
招撫旋據署高臺營都司吳澍稟稱四月十九  
日陳墉三子陳銛並各回弁在二十里鋪約會  
該署都司商辦撫局吳澍與陳銛等晤面後即  
進州城據陳墉並卸任安西州知州李灝前任

王子莊州同藍玉章言及肅城之變皆由官民  
激成巨禍目下逆回悔罪投誠惟有乘機緩辦  
吳澍查看城內賊匪西甯河州撤回約一千餘  
人肅城回民約二三千名城之上下各設礮位  
防守甚固吳澍當卽開導回衆聽候查辦不許  
出城滋擾該回匪業已遵允又據署高臺縣知  
縣常祥署鎮夷營遊擊楊天興來稟肅匪仍復

大肆鴟張五月初六日經臣調派代理清水營都司路林統兵團千餘至州城迤南數里該匪出戰傷亡兵勇多名復經署鎮夷營遊擊楊天興帶領番勇於初七八日援剿獲勝先後斃賊百餘奪獲器械多件臣查閱各稟肅州起事果否由官民激成尙難豫定而陳墉所稱回漢悅服地方肅清已不可信其約吳澍入城安撫恐

亦係詭詞希緩兵力自署安肅道恆齡以下文武官員下落各員亦未明白聲敘現在地方糜爛豈容輕率議撫仍飭署甘涼道黎獻趕緊進兵會同各路勇團痛加懲創並查明起事實情設法誘拏陳墉等訊實奏明辦理奏入

上從之

恩麟又奏言前因甘肅各營存儲火藥軍興以

來調用罄盡奏請由部籌撥奉

旨照撥火藥十萬斤由驛運甘旋准工部咨京局存藥

無多酌撥二萬斤解甘應用令距甘較近之山

西河南等省籌備接濟臣遴委員弁馳往東路

迎提閒接提督雷正綰陶茂林咨報進攻喫緊

火藥不敷請再趕爲籌撥隨將京局撥解火藥

二萬斤悉數分給雷正綰陶茂林軍營備用一

面飛咨河南山西二省按照部議籌解火藥十萬斤以顧要需因思甘省向產硫磺足敷採用祇緣所產土硝質粗性劣歷由鄰境購硝製造近來道路多梗各營造藥苦於無硝臣併催河南山西二省代購好硝一二十萬斤源源運甘以資製造價值卽於協甘銀內如數扣收仰懇

聖恩飭部分催河南山西二省迅將奉撥火藥並代購



硝斤星馳解甘俾顧要需雷正綰陶茂林曹克  
忠等各軍均以出征日久軍械帳房率多破損  
兼之移營缺乏馱運紛紛咨調臣業已設措價  
值購覓工料擇要製造並酌雇馱羸陸續解往  
備用矣奏入得

旨該部迅即分催河南山西將撥解甘省火藥硝斤趕  
緊批解以濟要需

成祿又奏言臣前抵靜甯探聞賊匪圍攻安定  
勢甚危急當卽馳抵會甯適雷正綰派提督劉  
正高管帶七營到會臣令卽日前進自督兩營  
繼後鶴齡川兵三營亦卽趕到當卽會合五營  
前進爲劉正高後路接應次四十里堡聞劉正  
高前軍已抵青嵐山賊匪麕集勢甚鴟張十五  
六等日前軍屢次接仗賊衆兵單未能得手嗣

聞賊越王公橋直撲劉正高營盤抵死衝突臣  
恐前軍有失挫我軍威立催五營兼程馳進於  
十七日抵青嵐山指揮各營併力禦敵賊勢稍  
卻臣思賊衆我寡必須出奇制勝隨躡訪路徑  
密派趙德正馬天祥各領本營士卒一由青嵐  
山以北葛家岔進一由山南盤龍灣進多張旗  
幟散布山谷以爲疑兵一面整隊齊進十八日

賊出大股迎敵我軍抗拒不退趙德正等兩營繞出賊後該逆前後有兵不知多少登時散亂臣指麾我兵乘勝追勦賊遂四散奔潰我兵因山路叢雜未便窮追仍分三路直趨安定圍城之賊不意大兵驟至立時震動城上見援兵已到開放槍礮內外夾攻餘匪敗竄城圍立解次日探悉匪蹤已遠因縣城人心未定臣卽入城

督率地方文武妥籌布置本擬稍爲駐紮因聞  
省城北面有大股賊匪竄擾卽囑劉正高暫紮  
安定揆捕潛匪 臣親率所部五營馳赴蘭州與  
護理總督恩麟會商籌辦以顧根本奏入得

旨已據恩麟等將安定解圍情形奏報矣成祿馳抵蘭  
州詳著與恩麟會籌布置以固省防毋得徒託空言  
致負委任

同日聯捷奏言 臣自入陝以來沿途遇有商民  
逐加採訪抵陝後復詢回民起釁之由大率兩  
不持平逞憤尋讎釀成變亂其中委曲情形有  
不可貿然將事者乾隆時新教回匪滋事幾致  
株連老教幸蒙

高宗純皇帝聖明燭照安分良回概免究治回漢相安  
迄今又七八十年惟陝甘回民性剛好鬪漢民



朝廷兵力盡滅回人既快私讎又除後患此愚民之見勢難曲徇誠以各路大兵不過數萬回民難以數計無論主客之形難操全勝良莠之衆未忍駢誅即使戰戰皆捷而回蹤所到大兵隨之轉戰循環四處蹂躪回教滅絕而漢民亦無噍類矣況各省回民散處物傷其類難免不聞而生心萬一紛然騷動恐有非兵力所能制誥



誠所能喻者至於回民始而尋讎洩憤繼而遷  
怒戕官近則占踞城池負嵎自固推原其心雖  
與髮逆之僭號割據擒逆之無端焚掠者有間  
然而叛逆之迹已成疑懼之心滋甚因是屢請  
投誠卒至反覆幸而良莠不齊心志未一有逞  
憤怙亂者有畏罪望赦者欲概臨以兵威勢將  
全者而民逼成死黨臣愚昧之見以爲與其先

勦莠回疑良回之心何如先撫良回孤莠回之  
勢寬其既往咸與維新自拔者卽係善良執迷  
者卽爲頑梗待良回以至誠示莠回以不赦然  
後驅良回以討莠回俾之帶罪立功旣可取信  
於漢民又可示大公於回衆其有降而復叛者  
卽立置重典亦不至負殺降之名總期將上年  
聖諭只分良莠不分漢回八字實力宣布庶可暫息干



涉案件恪遵

諭旨持平辦理儻以後回衆逞強固應殲戮卽漢民尋  
釁亦須翦除務使回漢耦居無猜共享昇平之  
福不然者勦辦已三四年矣將帥不乏良材士  
卒率皆勁旅動用餉糈不知凡幾而迄無成效  
臣 昨抵涇州敬將上年

諭旨多繕臚黃派都司海瑞外委孫永貴回紳守備海

呈旭馬斌先往省東一帶張貼曉諭儻從此得  
有轉機旁無掣肘卽由臣次第辦理庶幾兵不  
血刃甘省回務得以廓清奏入得

旨著卽乘機利導分別勦撫妥爲辦理惟不可一意主  
撫將就了事粉飾養癰致貽後患該大臣仍當迅速  
赴甘合力勦辦不准遲延致負委任

欽定平定陝甘新疆回匪方略卷一百六

乙丑年

六月初六日己亥德勒克多爾濟桂成奏言前因

固原竄匪擾及花馬池定邊一帶邊牆經在防

蒙兵擊退猶在附邊盤踞滋擾邊防遼闊臣等

檄飭防兵晝夜巡防堵剿毋令竄越復據札那

格爾兩次報稱現在花馬池定邊等處踞匪過

多復由靈州竄出數千均在附邊聚集難保不

由內地竄擾榆林或越邊東竄惟花馬池至定  
邊有兵駐守定邊東南卽無防兵各旗添調官  
兵一時未能趕到須撥得力馬隊堵剿並迤東  
空虛地方多撥官兵堵禦臣等因歸綏兩城兵  
力不敷分撥而沿河駐兵千餘除防堵包頭鎮  
衝要外不敷分布雖經伊克昭盟添調官兵但  
皆未經戰陣恐難得力卽咨將軍都興阿穆圖

善酌撥勁旅將分竄花馬池等處回匪截剿復  
飭催伊克昭盟添兵赴防並將駐紮託密諾爾  
之烏蘭察布盟官兵五百名亦飭豫備遷調設  
有緊急卽令渡河援剿但賊氛日熾防兵力單  
而歸綏兩城及沿河駐兵勢難分撥誠恐紛紛  
竄越滋蔓難圖 臣等督飭口外防兵偵探扼守  
遇賊卽擊儻回匪東竄蒙古境地卽由城防官



兵酌撥應援並請

旨飭將軍都興阿穆圖善酌撥勁旅官兵援剿沿邊竄  
匪以靖邊圉奏入

上命軍機大臣傳諭都興阿穆圖善雷正綰德勒克多  
爾濟桂成沈桂芬劉蓉阿克敦布廉至楊能格曰花  
馬池等處界連蒙古邊牆逆匪盤踞爲數過多復由  
靈州竄出數千均在附邊聚集必須趕緊剿除方免

蔓延別境德勒克多爾濟等現調伊克昭盟官兵協防歸綏本境沿河口岸並令駐紮托密諾爾之烏蘭察布盟官兵五百名豫備調遣爲渡河進剿之用惟蒙古官兵未習戰陣本難得力設有緊急該將軍等仍當添調歸綏兩城官兵嚴密防剿毋稍疏懈至歸綏兵力本單陝甘邊外蒙兵亦不足恃設該匪由草地東竄或由陝省邊內向東滋擾恐完善地方又被

蘇曠都興阿統率全軍勦辦甯夏股匪是其專責此  
股逆回本由甯靈敗竄沿邊之花馬池定邊及依勒  
圖呼克依等處盤踞肆擾著卽責成都興阿穆圖善  
將此股賊匪奮力勦洗務期迅速殄盡肅清後路儻  
賊蹤竄入鄰境辦理又形棘手惟都興阿穆圖善是  
問恐該將軍等不能當此重咎也定邊爲陝省衝要  
劉蓉現派段登雲在彼防守仍恐兵力不敷著劉蓉

趕緊添調得力將士馳往防剿其定邊迤東沿邊空  
虛之處亦須添兵防堵勿稍疏忽並著楊能格督飭  
防兵合力夾擊雷正綰勦辦甯靈賊匪自當將該逆  
就地殄盡不得以驅賊他竄了事儻仍縱令靈州賊  
股續竄花馬池等處該提督咎亦難辭懷之慎之綏  
遠城及晉陝沿邊一帶如有應行添兵防堵之處著  
沈桂芬酌量情形辦理並著阿克敦布廉至於察哈

爾沿邊等處派撥官兵豫籌防範

同日駱秉章奏言川北鎮總兵鶴齡奉

旨統帶川兵赴甘援剿經臣屢次札催趨程前進乃據

甘肅秦州直隸州知州張澂暨秦州營遊擊常

泰稟稱鶴齡日前帶兵入境需索供給借端騷

擾並擁進遊擊署中強取火繩營槍衣物等件

毆傷多人種種不法臣接閱之下不勝駭異查

川兵自各省凱撤多屬傷病疲勞其新募補伍者未經訓練總兵鶴齡前在江北軍營尙稱樸實可靠是以挑選川兵一千五百名交其統帶遵

旨赴甘 臣復疊次札飭該鎮嚴明紀律迅速前進乃行抵秦州輒以候餉爲辭耽延多日兵丁需索供給擁入衙署搶物毆人殊屬有負委任應請

旨先將川北鎮總兵鶴齡暫行革職以示懲儆仍留軍營以觀後效奏入

上命軍機大臣傳諭駱秉章曰鶴齡奉調帶兵赴甘自應紀律嚴明迅速前進乃途中竟有逗留騷擾情事實屬未能得力著嚴飭該總兵嗣後務須約束兵丁毋令滋事如再不知愧奮卽著據實嚴叅其縱容兵丁之營弁及滋事兵丁卽飭令查明盡法懲治毋得

稍有徇庇以肅軍律昨據成祿奏察看三營川兵內  
有幫辦營務處陳慶有一員暨現充鶴齡行營總兵  
六十餘人最爲狡猾已令成祿將陳慶有等弁兵遣  
撤回川歸伍仍著駱秉章妥爲鈴束如不安分卽行  
分別叅革

上諭內閣曰四川川北鎮總兵鶴齡統帶川兵赴援甘  
肅行至秦州地方輒以候餉爲辭耽延多日所部兵



丁需索供給並敢擁進衙署搶物毆人鶴齡係統帶之員不能嚴加約束以致兵丁騷擾地方實屬咎有應得四川川北鎮總兵鶴齡著暫行革職留營以示懲儆其縱容兵丁之營弁及滋事之兵丁著駱秉章查明分別叅辦

同日劉蓉奏言接雷正綰函稱北路敗匪有力攻靖遠東竄定邊之謀儻靖遠急不能破卽將

賊眷沈溺黃河止留悍賊竄陝等語臣卽令副將段登雲一軍馳赴定邊擇要駐紮復咨行穆圖善商同都興阿抽撥西側克西克馬隊二百名並侍衛請依楞阿副將趙有勝所帶馬步駐防定邊其花馬池甯條梁亦經前任安徽巡撫翁同書統帶直晉各軍扼守臣仍嚴飭段登雲及延安各府縣會同各路防兵實力堵剿嗣據

稟報該逆大股盤踞靈州屬之大水坑爲巢穴  
時赴界連定邊之紅柳溝等處搶掠四月十二  
日段登雲率隊攻逐王家成灘股匪十七日會  
同營總貴陞副將趙有勝派隊設伏誘擊木瓜  
溝踞逆該逆西奔羊圈山紅柳溝而逸自是以  
後段登雲等屢次出隊少有斬馘該逆等退入  
大水坑老巢時出馬賊到處擄糧五月初七日

馬賊四百餘騎竄踞南山溝草渠地方擄掠段  
登雲貴陞趙有勝於初八日黎明出隊圍剿該  
逆捨命衝突並有另股馬賊抄襲經遊擊段華  
廷都司李楚英奮勇擊退各軍追殺十餘里初  
九日辰刻馬賊一二百名馱糧西走段登雲出  
隊追擊該逆勢蹙拋灑穀糧縱馬而逸我軍追  
殺十餘里初十日該逆大股竄至新安定邊地

方焚殺距靖邊一百五十餘里經靖邊縣知縣  
徐錦江會營撥兵移知甯條梁靖銳營出隊協  
剿又准督辦慶陽防務楊能格咨據參將劉明  
泰探報回逆現踞紅牛溝楊柳溝等處分股由  
新安邊一帶東竄窺伺陝疆距吳慶鎮四十里  
該鎮係安化定邊保安三縣交界之區路徑紛  
歧可通慶陽亦可達陝現在元成赴定邊大路

尙形梗塞糧道阻滯總兵魏添應飭派參將項  
上達率隊馳赴元成會同劉明泰相機前進剋  
日親督各營由王個掌一帶進剿等語 臣卽飛  
飭段登雲約會訥依楞阿趙有勝及駐紮花馬  
池馬步各營前往剿辦惟查該處地勢平衍控  
扼難周該逆蓄意東趨已非一日亟應嚴加剿  
洗以免竄越如果賊勢猖獗應行添兵扼剿之

處再由 臣 酌派數營馳往協助以厚兵力而固藩籬奏入得

旨著嚴飭段登雲等會同各營認真勦洗如果賊勢猖獗卽著派兵協勦毋令闖入陝境

初七日 庚子 成祿恩麟奏言紅圈賊匪知有官兵

前往勾結紅水賊黨共謀拒敵 臣 恩麟恐進勦兵單添派參將胡飛鵬都司鍾在朝所部宣威

果勝等營馬步兵勇五百餘名前往會剿又派  
參將朱綸號召附近民團協助總兵鶴齡等於  
閏五月初八日統兵前行中途已見賊騎初九  
日該鎮由水旱河長川子分隊前進直趨紅圈  
兩面夾攻臣恩麟派出馬隊亦到合力剿殺逆  
勢不支入巢固守我軍收隊紮營初十日黎明  
鶴齡由水旱河整隊進逼賊巢賊衆二千餘人



已占東北山梁紅圈賊巢寂如無人料有埋伏  
當令馬步隊向山梁衝撲一面撥隊防堡內伏  
賊我兵接仗堡內果突出數百人抄我後隊我  
兵兩面迎敵立斃悍匪數名繼復放礮羣賊紛  
紛倒地擊斃受傷者甚夥山下賊匪潰敗先竄  
入巢外匪仍退紮山梁相持不下我軍佯作收  
隊賊一擁衝下鶴齡揮兵奮擊把總趙呈祥從

九品沈發祥帶領馬兵直衝賊隊匪勢窘蹙敗  
潰入巢當卽兩面圍攻該逆堅守不出遂仍分  
隊紮營十一日該匪踞巢堅守探悉附近均有  
賊黨潛匿參將朱綸都司鍾在朝率勇分頭搜  
剿殲斃賊匪五十餘名毀除賊巢十餘處紅圈  
賊勢益孤鶴齡等擬次日合力進攻是夜巡兵  
探報賊巢有人馬聲息似欲奔竄各營立卽出

三國志卷之三十一  
二

隊趕到堡外賊已出巢向東北山徑潰逸我軍直前抄截餘匪翻山越澗四散狂奔留後兵勇進擣賊巢該匪猶抵死抗拒我軍施放火箭火彈燒斃賊匪數百人賊巢卽時蕩平因時值昏夜暫行收隊現仍派兵在附近梭捕以淨根株俟居民復業卽行撤兵回省臣等查紅圈逆黨先與外匪勾結尙無顯迹此次因團練追賊輒

卽恃衆抵抗焚燒殺掠追官兵前往猶不俯首  
服罪復敢勾結逆黨公然抗敵實屬罪大惡極  
今幸將士用命奮勇進剿三日之閒攻毀賊巢  
逆匪就殲餘黨窮蹙喪膽潰竄地方卽時肅清  
省城賴以靜謐實足以彰

天討而快人心頃聞敗匪竄至中衛靖遠交界之石碛  
子鎖罕頭一帶滋擾已飛飭該處文武率勇邀

截並飭鶴齡統馬步各軍督飭署參將朱綸等  
管帶民團作爲嚮導星速跟追前後夾擊務將  
竄出匪類悉數殲除勿任漏網

恩麟又奏言據駐守勝金關署甯夏鎮總兵梁  
生嶽稟稱五月初四日突有馬賊六七千人撲  
近關口梁生嶽督率兵勇奮力扼堵該逆紛紛  
敗退初六日黎明敗匪糾約死黨萬餘分路抄

我營壘梁生嶽派三成隊伍出關迎擊鏖戰多  
時另有馬賊數百騎潛由岔河偷越猛竄入關  
又以千餘騎由北山紅石墩邀截官兵後路我  
軍三面受敵以致失利陣亡營官馮守勳拴林  
馬兆瑞王思明黃登雲徐大功馬忠孝徐福春  
李登雲常壽等十員傷亡兵勇尤多梁生嶽隨  
卽收集三營合爲一營激勵士卒誓以死戰一

面飛調駐防廣武棗圍之遊擊易中魁署都司  
康永壽兩軍星馳援救該逆知我兵力愈單拋  
擲火彈密如雨點然燒營內草營五閒致將行  
營案卷及拔補各弁部劄俱焚燬無存相持兩  
日賊勢稍卻梁生嶽整飭隊伍乘夜由捷徑赴  
石空寺初八日黎明行至大寺灣猝遇馬賊百  
餘我軍迎頭擊斃賊數十名餘悉逃遁是日

辰刻至石空寺易中魁康永壽帶領援軍九百  
餘名先後趕到正擬會合進剿初十日有馬步  
逆三千餘人蜂擁前來當卽率隊攔截該逆始  
由東路狂奔查此股回匪糾黨逾萬其意總在  
襲入中衛縣城我軍祇一千餘名不敷抵制隨  
於十五日密飭各營繞出賊前由宣和等堡節  
節前進於十八日移紮中衛城下與在城文武



商籌守禦之策以保危城臣正在批飭閒又據  
梁生嶽來稟大股賊匪於二十三日由大小壩  
東竄城嚴漸鬆惟該匪有不日復來之語臣查  
此次我兵失利營房被燬雖因賊勢過重兵力  
不支而梁生嶽以帶兵大員未能出奇制勝妥  
籌堵禦咎有難辭相應請

旨將署甯夏鎮總兵梁生嶽摘去翎頂以示懲誠其肅

州鎮署高臺營都司馮守勳等力戰捐軀殊堪  
憫惻懇

恩飭部從優議卹其餘陣亡兵勇另行查明辦理

恩麟又奏言前因河狄回匪滋事省城設立宣  
威營勇作爲親兵兩年以來營總張瑞珍督率  
各員按期操演分段巡查附近有警立即整隊  
往禦隨卽擊退頗振軍威惟隨營各員多係分

發他省自備資斧投效來甘並未支給鹽糧薪  
水閱時已久各員內有當差勤奮始終不懈者  
自未便沒其微勞合無仰懇

天恩將宣威營營總記名知府張瑞珍等分別獎勵出

自

逾格鴻慈

恩麟又奏言上年冬閒陶茂林有率師來省之

信大股賊匪在安定一帶阻截軍行安定城內  
僅有兵三百餘名該匪圍撲縣城勢甚危急其  
時卸署安定縣知縣徐學海因道梗未能晉省  
經臣飭令幫同現署知縣胡國棟妥籌防剿該  
員徐學海頗有膽識素得民心隨時督飭現署  
典史張憲綱前任典史孔憲陸把總馬慥紳士  
候選知縣安鼎等督勇出城相機擊剿以少勝

衆疊有斬擒十月十九日該匪三面攻城徐學  
海在西南城隅親點大礮轟斃騎馬悍逆數名  
張憲綱孔憲陸馬慥安鼎等在東城督勇施放  
連環小槍飛石滾木斃匪尤多該匪始紛紛如  
鳥獸散繼以陶茂林軍威遠震城嚴遂解道路  
疏通本年三月閒陶茂林統兵進剿水家坡大  
寨子一帶臣復棟派前通渭縣知縣余士毅前

往安定會辦城守事宜縣城被圍四十餘日該  
員余士毅督同紳士率團固守隨時出戰先後  
殲斃悍逆多名而相持日久城內兵民未致缺  
食因前署甯遠縣知縣強任捐辦倉糧三千五  
百餘石故接濟雖絕士馬尙覺飽騰各該員弁  
紳士實屬異常出力臣未敢沒其微勞現已解  
圍仰懇

天恩將同知銜前署安定縣知縣補用知縣徐學海等  
分別獎勵出自

逾格鴻慈

恩麟陶茂林奏言米拉溝回匪竄擾平番縣境  
經兵勇疊次擊勦窮蹙歸巢自上年冬月蠢動  
以來或百餘人或數百人時分時合竄突靡常  
所到之處肆行焚殺雖經各鄉團練迎勦總未

大挫狂氛迨後匪黨糾集愈多不惟大路武勝  
伏羌岔口鎮羌等堡徧遭蹂躪且屢撲平番縣  
城勾通南關土著回民作爲內應欲占踞城池  
扼制西路門戶莊浪滿城相離咫尺亦形危急  
經城守尉慶志督率滿營員弁與平番縣勇聯  
絡聲勢極力防守幸保無虞嗣臣恩麟委調署  
甘涼道黎獻督勇勦辦該道出奇制勝親冒矢



石屢戰皆捷先解城圍次將各鄉竄匪分起搜  
捕本年正月十二十七二十五六等日督率各  
營節節追勦由河西之禮拜寺直逼武勝堡密  
調古浪縣民勇由鎮羌岔口等堡跟追所有各  
路賊巢俱已次第平毀當將武勝堡收復驛路  
疏通餘匪敗歸米拉溝老巢平番境內漸形安  
靖臣等仍飭黎獻轉飭各營扼要嚴守以防復

出俟兵力大集再擣其巢此次在事出力弁勇  
自應及時鼓勵以資感奮而勸將來平慶涇道  
調署甘涼道黎獻調度有方親身督戰各將士  
爭先效命實屬異常出力仰懇

天恩將該道交軍機處記名遇有按察使缺出請  
旨簡放其尤爲出力官弁一併懇

恩獎敘此外勞績較輕紳勇兵團由臣恩麟酌量填給

功牌陣亡兵勇另行查明照例辦理均奏入

命軍機大臣傳諭都興阿穆圖善雷正綰楊岳斌恩  
麟曰紅圈賊氛距省甚近經官兵進剿攻毀賊巢敗  
匪竄至中衛靖遠交界之石碛子鎖罕頭一帶中衛  
之匪一日不除於甯夏軍情終形掣肘著雷正綰懍  
遵前旨迅由中衛節節進逼掃蕩逆氛並著都興阿  
穆圖善懍遵疊次寄諭迅將甯夏郡城剋日攻拔轉

戰而前以收兩路夾攻之效恩麟仍一面督飭派出  
之鶴齡等軍將紅圈竄出敗匪悉數殄除毋任一名  
漏網中衛帶兵失利之署甯夏鎮總兵梁生嶽未能  
妥籌守禦雖因賊衆兵單所致究屬咎有應得著摘  
去翎頂以示薄懲該處陣亡之高臺營都司馮守勳  
涼州滿營協領拴林甯夏鎮標前營雲騎尉馬兆瑞  
甘肅提標洪水營千總王思明甘肅提標左營千總

黃登雲涼州鎮標中營經制外委徐大功甘肅提標  
後營經制外委馬忠孝涼州鎮標後營額外外委徐  
福春金塔協營恩騎尉李登雲廣武營經制外委常  
壽力戰捐軀殊堪憫惻均著交部從優議卹楊岳斌  
前已行次涇州著卽懷遵前旨馳赴蘭州將各路軍  
情通盤籌畫妥爲辦理恩麟陶茂林奏請將勦辦平  
番賊匪出力各員獎勵並請將張瑞珍等徐學海等

請

分別獎勵各摺片著楊岳斌確切查明覈實再行奏  
恩麟又奏言據軍需局司道詳稱從前製就一  
切軍械軍火俱經撥盡目下大兵雲集催調紛  
繁而各項價值驟增倍蓰若不豫先籌備誠恐  
貽誤要需惟有權宜辦理先行由省購造仍一  
面偵探程途繞道從遠路採辦以便寬爲籌備

第恐價值懸殊將來有礙報銷必應由部立案  
方免承辦委員賠累臣覆加查覈俱係實在情  
形自應准照所請辦理合無仰懇

天恩飭部立案統俟各項造竣分別例價時值覈實開  
報奏入得

旨允行

恩麟又奏言據梁生嶽稟稱署中衛協副將連

慶當賊匪攻撲勝金關之時閉城固守以致在籍團勇不能出城迨梁生嶽帶兵折回仍復閉城不納經前署甯夏鎮總兵定安護甯夏道朱百川籌辦口金開啟南門兵心始定署中衛知縣張志仁將兵勇鹽糧拖欠月餘勒不發給且以中衛一帶全行肅清等詞稟報都興阿因此數月未撥一旅並據曹克忠呈報據中衛難民



及探弁稟報張志仁遇事畏縮前次賊匪犯境  
難民運米進城張志仁與連慶竟不放入糧米  
盡爲賊有難民亦多遇害嗣中衛鎮道稟請都  
與阿撥兵往援而張志仁圖免供支率以地方  
並無賊蹤阻止大兵自曹克忠駐軍甯安堡屢  
催籌運兵糈張志仁置之不理 臣查梁生嶽一  
軍月需鹽糧均經地方紳民捐辦有數何至拖

欠張志仁身任地方種種顛預置軍食民生於  
不顧殊出情理之外署中衛協副將連慶一聞  
寇警倉惶失措既不督兵出應又不許兵民入  
城尤屬恇怯若不奏請叅革貽誤戎機所關匪  
細查中衛協副將一缺臣已先委肅州城守營  
都司魏榮接護至中衛縣知縣員缺現值軍務  
緊急若另行委員接署不惟道路多梗繞越遲

延轉致誤事且令該員置身事外適以遂其規避之心應請

旨將署中衛協副將候補參將連慶卽行革職聽候查辦署中衛縣知縣正甯縣知縣張志仁革職留任仍責令於防勦軍食等事分別籌辦俟軍務稍鬆臣再將被訐各案查明辦理奏入得

旨連慶著卽行革職聽候查辦張志仁著革職暫留署

任儻敢仍前玩忽卽著從嚴叅辦

同日明緒奏言伊犁地方吏治武備廢弛兇頑  
愍不畏法加以兵民生計窘迫每屆嚴寒盜竊  
之案層見迭出臣思若不安內何以攘外正白  
旗閑散富敏泰吉忠阿二犯乘亂劫財臣訊明  
正法以昭炯戒數旬之間便無竊盜之案又因  
守兵懈惰官弁徇庇相習成風正紅旗馬甲色

本泰將擡礮拋置城外幾資賊用 臣亦卽將該  
犯正法併將該管官驍騎校格勒泰革職枷示  
以警其餘因此守城弁兵羣加振作 臣面諭城  
外紮營領兵之額騰額崇熙勤加操練 臣不時  
出城親教以分陣合陣之法演習槍礮並將庫  
存槍礮修理整齊分給各營以資利用兵勇頗  
知奮勉膽量漸增技藝漸熟該匪屢次大隊撲

城均經擊退因兵單不敢窮追然每次必殲數十人或百餘人不等閒亦奪獲器械牲畜臣暫時存記彙案奏請

恩施除夕輕騎出城赴各營拊循激勸按名犒賞以堅其心所愧皆係印券俟餉到方能支領銀錢卽賞給牛羊已搜括殆盡亦權用票據似此枯窘萬分而兵勇尙能拒敵此皆額騰額崇熙訓練

有方臣又親選馬隊四百名專派協領達春泰  
四出偵探一聞警報臣親督出城接應並招集  
八旗閑散民勇等四五百名派協領達春泰每  
日教演爲守城之用惟巴燕岱與大城唇齒相  
依該回紮營攔截我兵無路繞越該城被圍三  
月之久若不設法救援恐食盡難支臣訓練兵  
勇月餘似可相機進剿於正月初七日諭令額

騰額崇熙統兵出隊直搗賊營又以馬隊四百  
名接應該匪紛紛敗竄值此嚴冬飢寒交迫竟  
能以奇制勝以少勝多實仰叨

皇上威福遠著西陲應俟博勒果素統帶蒙古官兵到  
齊一鼓作氣掃穴擒渠以紓

宵旰之廛惟據博勒果素函稱前派土爾扈特官兵參  
贊大臣錫霖仍令撥回本牧領隊不能自主又



據塔爾巴哈台都司米慶稟稱都司定於十二月十一日同回民掌教石金斗起程乃參贊面諭仍留在塔當差查米慶係回官石金斗係回民掌教回民素所信服是以奏調來伊原欲安撫良回去其羽翼錫霖若留米慶等安輯地方自應將調齊之兵交佐領巴霞帶赴伊犁何以直遣回牧實屬不顧大局

臣

仍咨調博勒果素

帶領官兵迅速來伊卽令額騰額崇熙等分路  
進剿必當計出萬全儻曠日持久誠恐食盡兵  
潰惟有激勵將弁冒險進剿軍營鼓勵自當以  
衝鋒冒鎗爲首功其運糧製械勸捐各事宜功  
亦居次邊陲情形與內地不同似難區別謹將  
防守及獲勝出力弁勇開列籲懇

恩施如蒙

俞允不日進攻金頂寺並救援巴燕岱之時同心戮力  
定當迅奏膚公所有巴燕岱及綏定等西五城  
勦殺竄匪堅守三月領隊大臣穆克登額等守  
禦有方容俟解圍時查明分別請獎以昭激勸  
奏八

上諭內閣曰伊犁地方自回匪變亂後屢次糾集黨與  
攻撲城垣經明緒督兵擊退疊有斬獲正月初七日

明緒飭令額騰額崇熙帶兵出隊進擣賊營我兵馬  
隊衝突槍礮連環轟擊賊衆不支紛紛敗竄殲賊千  
餘奪獲馬匹軍械無算伊犁官兵當逆回猖獗時竟  
能以少擊衆大獲勝仗防勦甚爲出力除佐領額騰  
額昨已有旨賞給副都統銜補放葉爾羌參贊大臣  
同知崇熙已賞給頭等侍衛補放伊犁領隊大臣外  
協領達春泰著賞加副都統銜塔勤布等三員均著

賞換二品頂戴佐領舒昌阿等三員均著賞換三品  
頂戴都司沈玉桂等四員均著賞換花翎防禦穆精  
額著賞換四品頂戴佐領土瓦強阿等二員均著賞  
戴花翎委領催富和善等六員均著賞換五品頂戴  
六品頂戴什亮著賞換五品頂戴並賞戴藍翎已革  
把總李存等四員均著開復原官驍騎校錫拉春等  
五十員均賞戴藍翎

明緒又奏言回匪聚數萬之衆連營攔截不能  
銳意直擣賊營日來正議冒險出隊該回布散  
謠言以關內並無大兵又無餉銀接濟各部落  
何必爲之出力又多方以銀馬賄賂人心搖動  
漢回盡薙辮髮歸附纏頭推阿奇木邁孜木雜  
特爲主併力與官兵爲難是以錫伯營兵臨陣  
退縮總管德格都並不督兵情有可疑察哈爾

弁兵抗調不來該回又以銀馬餽送鐵色克不  
令幫助屢逞鬼蜮伎倆臣脣焦舌敝曉以大義  
羣情渙散孤掌難鳴正月二十日據巴城逃出  
之馬甲額哲亨等稟稱自十三日二鼓時該匪  
分股攻城官兵堵禦該回數萬人大呼但殺官  
員滿城遣勇商賈人等概不加害乘勢撬開南  
門蜂擁而入軍民有投關西出者計自十三日

起官兵與賊互相攻擊婦女自盡者甚多壯丁  
皆隨領隊穆克登額等拚死巷戰該回恐我兵  
往援先以數萬之衆紮營數十里之內接續不  
斷我兵不能前進該城危險已可概見臣卽派  
八旗協領以下等官悉數出城益以馬隊於正  
月二十一日飭額騰額崇熙率領馬隊八百名  
前進榮全帶領馬隊八百名作爲二起臣親督



馬隊五百名前後接應布爾和德帶領步隊兵  
勇一千名離城數里列隊以防抄後領隊大臣  
錫拉那及樂斌陳孚恩在城內稽查防守雪深  
數尺步隊直不能行馬隊勉強前進至大底窩  
鋪迤東距巴城二十里之遙見該回匪分股前  
來相持數時之久斃賊數十名該回復添馬隊  
萬餘臣因天晚雪大我寡彼衆恐有挫失卽令

各隊官兵緩緩撤隊回匪亦因雪大幸未撲壓  
得以收隊回營容俟雪消再當設法相機進剿  
至錫伯營弁兵自將總管德格都解任管押後  
頗覺回心向善頓改舊觀正在提訊之際據報  
該員於正月初九日病故應請結案以免拖累  
奏入得

旨德格都案著卽奏結此摺所奏係巴城未陷以前之

事與現在情形不同一俟兵力漸集該將軍仍當設  
法覓復該城以通糧路

欽定平定陝甘新疆回匪方略卷一百七 乙丑年

六月初九日

壬寅

葉爾羌參贊大臣武隆額奏言

正月初一日塔城漢回蘇玉得等糾約回衆勾結附近哈薩克持械進城搶掠馬匹殺傷官兵搶去庫存槍礮等物當有漢回掌教石金斗回官米慶等商請參贊大臣錫霖領隊大臣博勒果素前赴禮拜寺彈壓該大臣卽帶領糧餉處

章京富勒斐音圖等於初三日出城赴寺正在  
極力開導閒忽聞外匪開礮撲城回衆紛紛搶  
掠領隊博勒果素見逆迹已著亟奪過賊矛將  
米慶札傷並傷賊匪數名寺內衆回一齊開槍  
參贊錫霖領隊博勒果素糧餉章京富勒斐音  
圖年滿糧務廳音登阿並跟隨兵丁同時遇害  
臣查城外回匪約有一千數百名又勾結哈薩

克數千安集延數百人賊衆兵單惟有登陴固  
守以待援兵初五至十五等日該匪晝夜攻撲  
城垣我軍竭力抵禦城兵除陸續陣亡受傷外  
實存守兵只一百六十七名直至三月後積雪  
稍化在圍城中暗挖地道派人夤夜出城繞道  
馳赴土爾扈特察哈爾額魯特各游牧調兵並  
調伊犁換防佐領巴霞趕緊帶兵救援四月初

三國志卷之二十一  
二

二日有城外民人李殿榮願與官兵約期勦回  
初五日寅刻李殿榮同城外商民苗時潤等帶  
領民兵三四百人焚燒禮拜寺臣卽派兵出城  
接應兵民合力殺斃回匪數十名將四城門外  
回逆礮臺焚燒救出商民男婦大小一千六百  
餘人餘匪逃逸隨卽收隊初六等日該匪又在  
城外各處放火臣以兵力過單不敷攻勦又派

兵馳往土爾扈特等處催調蒙兵五月十一日  
辰刻見馬步回衆數千在城東北一帶列隊迎  
敵正在危急適有西甯官都卓諾地方轉世喇  
嘛領蒙古官兵二千餘人來援直撲賊隊臣又  
派兵出城會勦當將回匪擊散復截殺步賊一  
百五十餘名餘匪敗退臣隨與轉世喇嘛固拏  
幹札勒參面晤言及途中遇賊三次均被蒙兵



擊散維時回逆均在禮拜寺並西南北各鄉盤  
踞十五日臣派領隊大臣圖庫爾帶兵出城與  
轉世喇嘛會剿見哈薩克馬隊二千餘人在城  
南一帶往來游弋我兵鼓勇直前該匪潰散轉  
世喇嘛督帶蒙兵追至南湖始行收隊沿途斃  
賊甚多生擒哈薩克三名回匪敗回寺內十七  
日至二十日蒙兵會合城兵奮勇接仗大獲全

勝城圍立解餘匪敗至禮拜寺堅匿不出目下  
惟有督同官弁加意嚴防俟所調土爾扈特等  
處兵到派兵協同轉世喇嘛痛加剿除以期殄  
滅羣醜所有參贊大臣錫霖領隊大臣博勒果  
素糧餉章京富勒斐音圖年滿糧務廳音登阿  
同時遇害情殊可憫請照陣亡例

賜卹以慰忠魂奏入

上命軍機大臣傳諭明緒明誼麟興車林敦多布武隆額廣鳳奎昌曰塔城回匪變亂搶劫庫存軍械戕害參贊等官糾眾圍城勢甚猖獗武隆額甫蒞斯地竟能以數百飢疲之兵登陴固守並調集蒙兵聯絡團眾奮力夾擊立解城圍忠勇可嘉本日已降旨將武隆額調補塔爾巴哈台參贊大臣卽著督飭在城弁勇並調到援軍相機進剿將禮拜寺回匪悉數殲除

以靖疆圉第該匪人數甚衆且恐哈薩克安集延附  
回各匪乘虛襲城武隆額尤當穩慎圖功不可恃勝  
輕進轉世喇嘛固拏幹札勒參率兵援塔轉戰無前  
勇往之忱實堪嘉尙應如何優加獎勵之處著與此  
次在事出力人員一併查明速奏候旨施恩以示賞  
不踰時之意前據廣鳳奎昌奏由綏遠城解到餉銀  
五萬兩因道路梗塞不能運解應俟伊塔兩城派員

迎提又據明誼奏新疆餉銀除陸續解往科城並分撥各城外存銀五萬兩專備伊犁兩城迎提各等語現在伊犁塔爾巴哈台軍情緊急非有鉅款餉項不足以勵衆志而解倒懸著明緒武隆額各派委員帶兵前往科城迎提餉銀廣鳳奎昌酌派兵弁妥爲護送明誼等趕將存銀五萬兩速卽運解赴科交廣鳳奎昌源源分解伊犁兩城以資接濟毋得稍有遲誤

上諭內閣曰塔爾巴哈台回匪蘇玉得等糾衆滋事劫奪庫中軍械屯居城外禮拜寺經參贊大臣錫霖領隊大臣博勒果素赴寺彈壓開導均爲匪衆戕害其隨同前往之糧餉章京富勒斐音圖糧務廳音登阿亦復同時遇害其闖入城中焚擄之回匪經武隆額督兵立時擊退追逐出城歷次擊退撲城賊匪並陸續調派蒙古兵丁會合官兵民團奮力擊殺將城外

禮拜寺並各處礮臺焚燬立解城圍疊獲勝仗並將  
助逆之哈薩克回匪殲斃甚多勦辦尙爲得手著武  
隆額督飭各路官兵乘勝進勦將全股回匪速行殄  
除以靖邊圉錫霖博勒果素被害情形甚爲慘烈均  
著交部照陣亡例賜卹同時遇害之糧餉章京富勒  
斐音圖糧務廳音登阿均著一併交部照陣亡例議  
卹以慰忠魂

十九日壬子恩麟奏言甘省洮岷地方回多漢少

城內聚族而居者亦漢弱回強回族時以漢民

團練藉口尋讎構釁互起殺機臣飭洮州土司

楊元調派番土兵丁協同民團隨時堵擊本年

春閒探聞護洮岷協副將甯夏玉泉營守備回

弁李發珍與居住洮州之河州鎮標右營千總

回弁丁永安狼狽爲奸洮州廳城幾欲據爲己



有臣因兵力無可騰挪惟有將該逆弁先行設  
計誘擒或可解散黨羽查岔口營都司張廷秀  
籍隸鞏昌於洮岷地方情形較熟卽委該員護  
理岷協事務令招集各路鄉團歸併統帶會同  
楊元番丁相機捕拏雖屢次接仗獲勝總未能  
直逼城垣而李發珍丁永安抗拒如故本年閏  
五月二十四日據張廷秀來稟是月初六日午

後忽有外匪千餘突入岷州城內與舊踞洮狄  
河鹽關各匪直撲州署將署知州增啟戕害幕  
友家丁及避難在署漢民共殺傷一百餘人都  
司鄒連登暨其眷屬均被本營把總回弁丁重  
選裏脅初八日該匪二千餘人出城逃竄卽經  
將臺寨民團攔剿斃賊一百餘名又經大溝寨  
民團馳往州城迎擊斃匪二百餘名十一日黎

明該匪將城關廟宇民房放火焚燒半由東南  
路逃逸州城文武衙署未遭焚燬知州增啟屍  
軀尙在隨卽棺厝各官印信均已遺失當將岷  
州城池收復臣查該匪舍岷赴洮屬聚死黨抗  
拒官兵逆謀叵測更難保不回竄岷城臣已飛  
飭張廷秀督帶團練駐紮岷州妥籌堵守惟援  
洮之兵成祿陶茂林劉正高等軍均爲近省一

帶賊匪牽掣未能兼顧查階州現已克復臣咨  
商楊岳斌卽將臬司林之望統帶張華所部黔  
勇會合署鞏昌府知府趙桂芳原帶中義營勇  
丁馳往洮州併力圍剿以冀迅殲醜類並令將  
李發珍丁永安二逆查拏務獲盡法處治進剿  
如何情形並查明岷州文武官紳眷屬被害被  
脅確情另行奏明辦理

恩麟又奏言據護肅州鎮總兵成桂由高臺縣  
來稟五月二十四日寅刻哈密纏回突然叛亂  
焚燒城鄉殺傷人命文武官員不知下落 臣披  
閱之下焦急莫名現在新疆一片逆氛已成不  
可收拾之勢而都興阿穆圖善成祿等軍又爲  
關內賊匪牽掣鞭長莫及跋扈時形當呈明督  
臣楊岳斌飛咨都興阿等設法抽撥勁旅馳往

援剿確查失事詳細情形另行奏報奏入

上命軍機大臣傳諭都興阿穆圖善雷正綰楊岳斌成  
祿聯捷恩麟文麟曰甘肅岷州城垣於閏五月初六  
日突被外來回匪千餘人竄入將署知州增啟戕害  
旋於初八日出城竄往洮州該州回弁李發珍丁永  
安等亦麇聚占踞洮城情形甚爲猖獗亟須撥兵剿  
辦前據楊岳斌奏報於閏五月初一日起程取道涇

州此時何以尙未到省著卽懷遵前旨馳赴蘭州將  
該省應辦軍務地方各事宜妥籌迅辦切勿遷延不  
進貽誤事機洮州回氛甚熾陶茂林等軍俱爲近省  
賊勢牽掣未能調撥著楊岳斌恩麟卽飭張華所部  
階州得勝之師會合趙桂芳勇丁馳往洮州併力圍  
剿迅殲醜類甯夏賊勢已蹙雷正綰軍已逼靈州著  
都興阿穆圖善雷正綰迅將甯靈各城攻拔以孤賊

勢札克當阿文麟等久無奏報現聞哈密已陷逆蹤  
蔓延著成祿聯捷先其所急迅帶所部進剿肅州踞  
匪卽行取道出關蘭州省防及各要隘並著都興阿  
楊岳斌等籌撥弁兵隨時兼顧仍飛飭成祿等軍剋  
期進剿文麟駐紮奇台一帶距哈密較近著卽探明  
匪蹤實力防剿洮州逆弁李發珍丁永安等並著楊  
岳斌督飭各軍嚴密查拏懲辦署知州增啟被戕及



岷州文武官紳眷屬被害被脅各確情著恩麟查明  
彙呈楊岳斌迅速馳奏哈密變亂情形及札克當阿  
等下落並著都興阿楊岳斌文麟等確查迅奏

二十一日 甲寅 都興阿穆圖善奏言據統帶英字

等營總兵胡世英報稱初十日巳刻遙聞甯夏  
城西槍礮聲震隨帶各營於城東列隊以助聲  
威俄見賊紛向西奔勢頗倉皇料是我軍得手

遂督各軍乘勢進取副將萬金榮遊擊周占魁  
守備李大勝等各帶所部奮勇撲進直抵東門  
立克賊圩三處礮卡一處追至東門城邊斃賊  
數百名當將圩卡四處全行平毀十二日進攻  
迤南各圩該處賊圩四面積水徧地瀰漫萬金  
榮袁士林等率領勇丁鳧水而進將圩圍定該  
逆環施槍礮死力拒守悍賊徧立圩牆拋擲甄

石密如雨注我軍於槍礮甄石之中併力環攻  
萬金榮袁士林李大勝李考祥及各營哨官俱  
受重傷人人奮戰斃賊不少該圩距城切近城  
賊亦開放槍礮兩面夾擊袁士林腹中礮子登  
時陣亡勇丁受傷者四百餘名陣亡溺死者數  
十名兵力單薄恐有疏失遂卽撤隊回營休養  
士卒以圖再舉又據翁同書報稱大水坑踞逆

勾結吳中堡回匪二千餘人於初九日竄至東  
南一帶擄掠侍衛壽昌副將趙有勝會同副將  
段登雲各整部伍於二更出隊銜枚疾趨至紅  
莊左近埋伏自初九日起至十二日壽昌等督  
隊包抄該逆首尾受敵紛紛逃竄臣等派陳天  
佑等分紮西門橋等處逐日帶隊四出察看地  
勢賊情臣都興阿令已革參將王泰來等於西

門外渠埂連紮七營 臣 穆圖善令提督劉定邦  
等南北分紮六營嚴防攻撲一面激勵將士迎  
勦援賊已革副將陳東霖已革參將李曙堂奮  
勇前進攻打賊圩四面齊上圩賊潛伏不動我  
軍甫抵壕邊圩內槍礮齊發陳東霖中礮陣亡  
李曙堂身受槍傷五處猶復負痛爭先正在猛  
攻城賊突出馬步數千援應 臣 等以兵力過單

兩面受敵趕緊撤隊迎勦賊見隊伍整齊未敢  
進逼我軍卽於二十二日緊逼賊圩西面槍紮  
兩營以圖攻取並商令暫署副都統常陸挑撥  
兵丁駐紮鎮北堡保護往來商販以濟滿城兵  
食查甯城踞匪經官軍夾擊疊受懲創並失西  
門橋要隘勢已窮蹙僅恃南面一線之路與納  
家關等處聲息相通此時廣集黨羽負隅抗拒

並將進兵各路決水淹斷馬賊時於城北出沒  
窺伺靈州大水坑一帶踞逆時擾定邊阻截糧  
道蕃謀甚狡而官軍糧餉兩缺尤覺可虞 臣等  
現在趕催糧米鎮撫飢軍一面設法宣洩水勢  
稍有進兵之路卽當於南路扼紮數營截斷援  
賊痛加勦洗賊勢旣孤不難攻拔現仍督飭各  
軍併力規取以期迅拔堅城此次陣亡之已革

儘先副將陳東霖儘先遊擊袁士林均奮不顧身歿於王事深堪憫惻懇

恩飭部各照原官陣亡例從優議卹以慰忠魂其餘傷亡弁兵臣等查明再行分別辦理

穆圖善又奏言臣自去歲九月督率馬步十二營援甘曾奉

諭旨著山陝兩省每月各協濟餉銀二萬兩以資攻剿



三國志卷之二十一  
三

嗣由草地渡河節節埽蕩直抵甯城復因兵力  
過單添撥楚勇一千名並派副將陳東霖赴楚  
招募親兵衛隊兩營均先後抵甯每月各需餉  
銀六千餘兩惟添兵必須添餉而兵食尤貴豫  
籌臣前已派員分途採買東則定邊安邊梁鎮  
西則蒙古之三磴口烏拉特達拉特以及包頭  
歸化城等處概在數百里千里之外採辦之難

轉運之苦實從來所未有雖阿拉善王貢桑珠  
爾默特鄂爾多斯貝勒札那吉爾第顧全大局  
閒亦協濟駝隻究竟轉運維艱懸釜待炊嗷嗷  
待哺署提臣陶茂林所帶兵勇因飢潰散其明  
驗也現在米麩價值昂貴兵勇入甘以來衣不  
蔽體困苦難言臣兩次派員赴楚領取荊州任  
內養廉銀兩購買布疋製辦單衣復派員持功

牌在阿拉善地方貿易商民勸捐布疋藉資敷  
衍但邊塞寒苦轉瞬又屆秋冬其棉衣皮衣亦  
須籌款製辦而山西陝西兩省協餉積欠至四  
月之多營中糧餉缺乏兵丁枵腹堪虞若不及  
早圖維勢難持久仰懇

天恩飭下四川督臣駱秉章按月接濟銀一萬兩阿拉

善王貢桑珠爾默特鄂爾多斯貝勒札那吉爾

第各旗備辦駱駝一千隻爲轉運之需並懇

飭催山西撫臣沈桂芬陝西撫臣劉蓉將協濟餉銀源

源撥解以資飽騰至山西前欠餉銀已咨商該

撫在太原省城措辦皮衣寒衣各七千二百件

餘銀派員解赴包頭採買糧石陝西欠餉已咨

商該撫派員在延榆綏鄜一帶會同臣前派委

員及地方官按照時價採買糧石源源轉運

脚一切卽在協餉內劃扣一轉移閒實於軍務  
兵精兩有裨益奏入

上命軍機大臣傳諭都興阿穆圖善雷正綰曰甯城踞  
逆經官軍疊次懲創勢已窮蹙惟南路一面尙未合  
圍難保不由此竄遁都興阿等現擬將賊匪所決之  
水宜洩疏通卽於南路扼紮數營截斷援賊所籌尙  
合機宜卽著該將軍等激勵將士迅速四面合圍將

此股醜類聚而殲旃勿致賊匪鋌而走險又形滋蔓  
靈州大水坑一帶踞逆時擾定邊阻截餉道其謀甚  
狡都興阿等當酌撥勁兵通道運餉毋令後路稍有  
疏虞中衛城圍雖解而匪蹤飄忽仍恐去而復來雷  
正綰當督飭各軍節節進剿與梁生嶽等軍聯絡一  
氣兩面夾擊毋失事機甯夏攻城陣亡之已革儘先  
副將陳東霖儘先遊擊袁士林均著交部各照原官

陣亡例從優議卹穆圖善請飭催四川等省協餉已  
寄諭駱秉章等籌解所請飭阿拉善王貢桑珠爾默  
特鄂爾多斯貝勒札那吉爾第各旗備辦駱駝千隻  
爲運糧之需卽著都興阿傳知該旗王貝勒等如數  
豫備俾資轉運

上又命軍機大臣傳諭駱秉章劉蓉王榕吉曰甯郡地  
處極邊米糧轉運維艱需款甚鉅瞬屆秋冬皮棉衣

亦須籌辦卽使山陝兩省協餉按月解到僅敷採買軍糧之用現在該二省欠餉各積至四月之多兵勇衣食無資若不寬爲籌解必致貽誤事機穆圖善各軍攻勦甯夏正在得手所需餉銀亟應趕緊籌解以濟眉急卽著駱秉章於四川省每月籌撥銀一萬兩按期解交穆圖善軍營毋稍延緩山西省每月協濟餉銀二萬兩楚勇餉銀六千餘兩新募親兵後營衛



隊營餉銀六千餘兩陝西省每月協濟餉銀二萬兩  
卽著劉蓉王榕吉迅速設法籌撥源源解濟以收飽  
騰之效至山西省前欠該營協餉已由穆圖善咨商  
該撫在太原省城措辦皮衣寒衣各七千二百件餘  
銀解赴包頭採買糧石陝西欠餉已咨商該撫派員  
在延榆綏鄭一帶會同該將軍所派委員及地方官  
按照時價運腳一切卽在協餉內劃扣並著劉蓉王

榕吉妥籌辦理



欽定平定陝甘新疆回匪方略卷一百八 乙丑年

六月二十四日 丁巳 穆圖善奏言 臣於本月初三

日接受將軍印信隨即咨會常陞督飭存城官兵慎加防守惟查甯夏滿營積困太深十餘年來餉需不繼郡城失陷以後糧餉兩項更無從關領以致兵丁困苦難堪前任將軍慶昫奏請撥款統計河南山東山西河東四處共銀二十

萬兩迄今一載有餘僅提到七萬兩實屬不敷  
支放現在糧米缺乏價益騰貴官兵日不一飽  
餓斃相仍且又分兵在外疏通糧道添募勇丁  
藉資防守一切費用較前不啻倍蓰現存之款  
僅可支至七月合無仰懇

天恩飭催各該省迅籌撥解以濟急需至於軍務情形  
臣現與都興阿籌商總期迅圖克復以殄賊氛

惟郡城一拔餘匪定必紛竄若帶印往勦又恐  
城中事務乏人坐鎮擬請

旨將將軍印信仍交常陞護理 臣改用甯夏將軍行營  
木質關防得以專心勦賊如此各有責成庶於  
城營兩無貽誤

同日文麟奏言五月十三至十六等日逆回糾  
大股東犯官軍在三台接仗疊有斬擒嗣因賊

衆兵單遂至失利二十二日探聞賊匪已至古城當派防禦達哈蘇等帶勇八百名前往堵剿臣督率文武員弁防守城池次日逆匪五千餘人由西路蜂擁而來達哈蘇等率勇進剿我軍寡不敵衆且戰且退維時官兵營盤已失奇台縣知縣恆頤之勇被賊擊敗縣城失守臣衝出重圍僅以身免退守木壘正在招集餘勇整頓

營伍大股馬賊復來 臣帶勇迎戰因賊衆兵單  
節節退守閏五月初一日至巴里坤當將古城  
等處關防印信均交鎮西廳庫收存伏思 臣抵  
奇台五閱月之久各路援兵不到以致三台官  
軍接仗失利奇台勢孤不守 臣貽誤軍務咎實  
難辭請

旨將 臣  
交部治罪並祈



飭下各路帶兵大員迅速進剿以救黎庶而保邊疆

文麟又奏言奇台失利以後縣丞陶珩署迪化  
州知州孔昭恆不知去向容俟查明再行叅奏  
至奇台縣知縣恆頤籌辦防剿素稱勇往此次  
城池失陷雖因賊衆勇潰情尙可原然有守土  
之責咎實難辭請

旨革職照例治罪典史胡承業把總王淇請一併革職

治罪現在軍情危急差遣乏員恆頤胡承業請  
暫行留營責令戴罪自效

文麟又奏言 臣行抵巴里坤探聞五月二十二

日吐魯番逆回勾結哈密纏頭背叛二十三日

圍困城垣二十七日兵勇出城打仗因賊衆兵  
單遂致失利官軍傷亡過多逆匪乘勢攻撲哈  
密城中火起兵勇潰亂登時失守 臣查哈密爲

口外南北兩路總匯之區一旦被陷則新疆大局益形危急當與巴里坤領隊大臣訥爾濟等  
公同籌議招齊兵勇三千餘人由臣督帶擬設  
法先勦哈密以通糧道並飭代辦鎮西同知錢  
崐舜採買麵斤羊隻以濟兵食惟查巴里坤營  
伍久經廢弛前經札克當阿飛調該營官兵防  
堵哈密乃遷延日久迄未赴援以致該城失陷

貽誤匪輕臣惟有激勵軍心隨時相機策應以  
維大局

文麟又奏言四月初一日臣派勇駐紮木壘以

遏東路竄匪有纏頭回子買賣斯巴海自行投  
入營中聲言伊係陸布沁阿喜爾回目上年庫  
車伊薩克和卓勾結漢回滋事竄至吐魯番將  
陸布沁穆台吉殺害並勒逼衆回抗拒官軍伊

並非甘心從賊現在阿喜爾台吉令伊來營投  
誠等語臣等察其情詞懇切當卽酌加撫恤責  
令殺賊自效嗣復有穆台吉之孫納伊漢並台  
吉愛米雅斯二人帶同回子來營乞撫據稱已  
將吐魯番八臺叛回殲斃數百人並生擒逆回  
二名回婦一名來獻臣等當卽訊明正法並據  
愛米雅斯聲稱吐魯番城內尙有回匪數千伊

等正在竭力攻擊求 臣發兵助剿 臣允以大軍  
一到卽刻派兵往援該台吉等率衆乞降未便  
泯其向化之忱現已准其投誠飭令隨同防剿  
仍當妥爲駕馭不致墮其奸計均奏入

上命軍機大臣傳諭都興阿穆圖善雷正綰楊岳斌成  
祿聯捷恩麟文麟曰逆回糾大股東犯官軍在三台  
接仗先勝後挫旋因衆寡不敵致奇台縣城失守文

麟退紮巴里坤復聞哈密失陷現在招集兵勇約有三千餘衆擬設法先攻哈密以通糧道卽著文麟與訥爾濟會籌進剿奇台哈密並陷文麟一軍孤懸坤城亟須關內重兵馳往助剿成祿聯捷所部均在蘭垣一帶爲近省回勢所牽必須楊岳斌到省布置諸軍始可剋期前行著楊岳斌懍遵前旨星速赴省籌辦卽飛檄成祿聯捷統帶各營進剿肅州踞逆通道

出關卽赴哈密援剿成祿聯捷之軍出關剿賊是其  
專責著於接奉此旨後卽行部署起行毋許稍涉延  
緩都興阿穆圖善雷正綰當懍遵疊諭迅拔甯靈兩  
城卽可酌撥兵勇協同成祿等軍節節掃蕩以壯聲  
援鶴齡等軍現在何處並著都興阿楊岳斌恩麟等  
檄催前進文麟自請治罪之處著加恩寬免縣丞陶  
珙署迪化州知州孔昭恆於奇台失守後不知去向



著文麟嚴密查拏解交刑部治罪奇台縣知縣恆頤  
因賊衆勇潰以致城垣失守著與典史胡承業把總  
王淇均卽行革職恆頤胡承業仍准留營帶罪自效  
陸布沁阿喜爾回目等赴文麟軍營投誠並願幫同  
打仗著文麟妥爲駕馭以堅其向化之忱穆圖善所  
請將甯夏將軍印務交常陞暫行護理卽著照所請  
辦理札克當阿等下落仍著文麟查明具奏

上又命軍機大臣傳諭吳昌壽閩敬銘王榕吉曰甯夏  
滿營餉項久形匱乏若不速籌接濟飢軍譁潰堪虞  
著吳昌壽閩敬銘王榕吉查明欠解甯夏滿營兵餉  
竭力籌措迅速報解並著王榕吉飭令河東道將應  
解該滿營協餉一併趕緊撥解毋令稍有缺乏

二十九日 壬戌 巴里坤領隊大臣訥爾濟甘肅鎮

迪道文麟奏言新疆十六城伊犁爲大其東有

惠甯甯遠熙春三城上年冬閒均被逆回占踞  
惟惠元綏定廣仁塔勒奇瞻德拱宸等六城與  
賊相持自烏魯木齊被陷之後四圍皆賊巴里  
坤勢成孤立亦難久存臣等再四思維若欲剿  
滅回匪收復新疆須數十萬精兵百千萬帑項  
尙需數年征剿數年教養或可安謐一時猶難  
望其日久無事請

旨飭下王公大臣九卿科道等熟思妥議應緩應急之處請

旨示下遵行

訥爾濟又奏言自去歲庫車失守以來烏魯木齊等城連次被陷皆因糧餉缺乏援兵不到之故現在奇台哈密二城亦皆失陷巴里坤滿漢二營兵丁僅有一千餘名雖有鎮迪道文麟招

集民勇爲數無多又乏口糧儻賊匪乘勢夾攻  
巴里坤卽有瓦解之虞 臣與文麟商酌卽就現  
有兵勇先勦哈密俟援兵到日再行進勦西路  
但巴里坤一帶地方遼闊四面受敵此時口內  
大兵尙無消息伊犁相隔甚遠亦無可調之兵  
惟查巴里坤迤北草地直通烏科二城路途較  
近擬調蒙古官兵三千名前來援應 臣已飛咨

烏里雅蘇台將軍明誼等刻卽揀派精壯蒙兵  
攜帶軍火器械兼程赴坤俾資策應仰懇

天恩飭下關內各路大兵迅速來援並請籌撥軍餉先  
由北路草地解運以濟軍需

訥爾濟又奏言奇台失守後哈密旋卽被陷札  
克當阿力戰陣亡巴里坤一片孤城亦難久守  
必須以剿爲防當卽會商代辦總兵何瑄等派

兵前進儻能收復哈密庶可保護坤城滿營城  
大兵單現有之兵僅三百名惟有添募勇丁相  
機攻守以遏寇氛

同日成祿奏言准護理督 臣 恩麟咨稱哈密纏

頭回子突然內變城池業經失守 臣 查哈密爲

新疆咽喉重地一經失陷賊勢愈張必須厚集

兵力籌備糧餉方能迅速進剿 臣 所部太單昨

咨商雷正綰酌撥劉正高七營尙未接准咨覆

現又咨商督

臣

楊岳斌分撥兵餉然度其兵力

僅敷調遣恐難抽撥

臣

本擬添募新勇因慮回

民濫入是以中止月來募充親兵者半係舊時

部曲奮勇可靠之人而爲數無多難成大隊聯

捷所帶馬步數不滿千刻下尙未來甘至都興  
阿穆圖善一軍規復甯郡相持不下豈能分撥



尤可慮者現在餉需支絀臣所帶馬天祥趙德  
正二營勇糧向由雷正綰軍營撥發自歸臣統  
帶後月餉尙無著落前奉

諭旨飭恩麟籌款給發今逾兩月並未支給分釐兵勇  
不無缺望潰散堪虞又況關外用兵糧草爲急  
更宜先事儲備惟有仰懇

天恩飭下楊岳斌雷正綰恩麟通籌大局悉心規畫兵

餉兩端務求有濟於實用尤期可繼於將來庶  
臣得以督率官兵長驅大進以期迅奏膚公

同日札克當阿伯錫爾奏言欽奉

諭旨濟木薩失守都司鍾齡等臨陣脫逃分別正法治

罪等因臣查該員等棄城逃遁法無可遁已於

四月初二日將鍾齡正法至縣丞陶玘署迪化  
州知州孔昭恆於奇台失守後不知去向烏城

失守案內之知縣文光裕厚現在查無下落俟查明再行分別覈辦均奏入

命軍機大臣傳諭都興阿穆圖善雷正綰楊岳斌成祿聯捷訥爾濟恩麟文麟曰奇台哈密失陷賊勢臨張巴里坤滿漢兩營兵丁僅有一千餘名文麟招集民勇亦不足二千之數訥爾濟文麟現擬統帶兵勇進規哈密以勦爲防第兵力太單若非關內大兵剋

日赴援恐情見勢絀巴城亦難保守成祿已抵蘭州  
卽可督兵西進趕緊出關前經諭令雷正綰酌撥劉  
正高七營歸成祿調遣卽著迅速撥往以厚兵力該  
營糧餉並著楊岳斌督同恩麟籌款給發毋令缺乏  
其成祿現帶之馬天祥趙德正二營前曾諭令恩麟  
籌發餉銀何以兩月之久尙未支給分釐著楊岳斌  
恩麟迅籌給發不准再事延誤致有譁潰之虞聯捷

行抵何處未據奏報著剋期前進與成祿合兵一處  
早日出關毋得稍涉遷延都興阿穆圖善雷正綰當  
懍遵疊次諭旨迅拔甯靈兩城卽可酌撥兵勇協同  
成祿等軍節節掃蕩以壯聲援儻該將軍等以出關  
爲畏途致甯夏等城久稽克復必治都興阿穆圖善  
以糜餉老師之罪决不寬貸前據廣鳳等奏蒙古官  
兵未習戰陣又無應手利器勢難再行撥調等語所

奏係屬實在情形請爾濟擬調烏科蒙兵三千之處  
恐亦無濟於事請爾濟文麟惟當就現有兵力相機  
防勦以保危城其札克當阿戰歿情形並著查明迅  
奏前據恩麟奏稱探聞嘉峪關收復餘賊竄歸肅州  
近日黎獻一軍進勦情形若何林之望一軍現抵何  
處著楊岳斌恩麟催令督隊前進會合黎獻所部迅  
將肅州踞匪撲滅以通關內之路現在哈密旣經失

陷賊氛去關甚近若再與關內之匪勾結一氣勦辦更形棘手楊岳斌此時計可抵省著卽將關內關外情形熟籌布置其應如何調撥兵勇之處咨商都興阿穆圖善雷正綰迅速籌辦不得互相推諉致有顧此失彼之虞新疆餉銀疊經戶部奏撥除山西等省之餉均由綏遠城出口解往烏里雅蘇台等城轉運外其四川應解餉銀十六萬兩本令由甘肅解往著

楊岳斌咨催駱秉章迅速撥解卽作出關兵餉之用  
至湖北等省協解甘餉前經奏定數目卽爲有著之  
款並著楊岳斌分別催提以資分撥甯靈一帶賊勢  
甚重且有東竄之意定邊花馬池一帶防務尤爲喫  
重都興阿雷正綰務當先其所急派撥勁旅會合翁  
同書所帶之兵實力截剿不得任其偷竄能將後路  
肅清於進剿甯靈亦可無虞掣肘該將軍等當善體



此意妥籌辦理訥爾濟文麟奏稱若欲剿滅新疆回  
匪必須數十萬精兵百千萬帑項等語新疆回匪變  
亂自應急籌勦辦有何可緩之處訥爾濟等所奏不  
知其是何居心實屬糊塗冒昧此後如不盡心竭力  
勉任其難必重治訥爾濟等以推諉貽誤之罪札克  
當阿四月初二日所發摺內有都司鍾齡業經遵旨  
正法等語所辦甚是至縣丞陶珩署迪化州知州孔

昭恆於奇台失守後不知去向曾諭令文麟嚴密查  
拏解交刑部治罪並著於拏獲後就地正法其烏城  
失守案內之知縣文光裕厚現在有無下落並著查  
拏研訊遵照前旨辦理

訥爾濟又奏言查巴里坤滿營原設官馬八百  
四十八匹歷年以來陸續倒斃兼因餉需支絀  
無款買補僅存馬四十二匹均疲瘦不堪乘騎

刻下軍務緊急需用甚殷擬由綠營撥馬六百  
匹臣已行知代辦總兵何瑄趕緊照數籌撥以  
利軍行奏入報

七月初一日癸亥劉蓉奏言據副將段登雲稟稱

閏五月初一日探聞胡家園地方有賊馬游弋  
隨卽挑派隊伍分路設伏並會商副將趙有勝

等出隊圍剿初二日突有大股逆賊漫山遍野  
而來各路伏兵齊出該逆抵死抗拒趙有勝等  
督軍截殺賊匪奔潰我軍追至紅柳溝等處共  
殄賊三百餘名奪獲驢羸牛馬甚多生擒逆回  
二十餘名據供由靈州竄出圖往南山擄糧當  
卽訊明正法初九至二十二等日段登雲會同  
趙有勝等圍剿胡家園該逆率衆抵拒我軍奮

勇直前斬擒無算旋准雷正綰來咨擒獲奸細  
訊據供稱該逆均係陝回麴聚大水坑一帶如  
官軍逼緊擬回竄定靖保安以入陝疆現派魏  
添應統帶防兵八營分扼各隘惟追剿之師不  
過二三營請卽派兵會剿等因 臣查該逆自固  
原敗竄以來盤踞靈州大水坑等處時赴定邊  
靈州交界之區肆行擄掠屢被防兵截擊殄

多名現經官軍圍逼賊勢窮蹙意圖分竄定靖  
一帶毗連甘肅路徑紛歧亟應添派勁旅實力  
防剿以杜奸謀當卽飭派候選同知鄢太愚督  
帶馬步四營馳赴保安定邊一帶會合段登雲  
扼要堵禦並飭段登雲將奪獲賊馬挑選臚壯  
者百五十匹揀派銳卒練成馬隊以備衝擊之  
用又派記名總兵楊德勝督帶馬步四營進紮

廊延一帶要隘以防該逆由合水各隘偷竄之路庶期稍固邊防

劉蓉又奏言頃據署甘肅涇州直隸州知州林發深稟報陝省回會赫明堂一股雖經固原提督雷正綰招降安置黑城子地方惟該回會陸續招聚回衆八九千之多現在黑城子深藏不測不但漢民不准入城卽本處回民亦不准其

插入一人一騎誠恐黨與日聚復行滋事實爲  
平慶涇心腹之患亦卽邠長乾永眉睫之憂旋  
准督臣楊岳斌函稱此起回衆頗懷反側地與  
秦壤相接竊慮終爲邊患各等因伏查赫明堂  
係屬渭南逆首屠戮陝省人民不可勝計近雖  
勢屈投誠而心懷叵測不可不豫爲之防且現  
據探報雷正綰曹克忠兩軍於六月初七日進



攻金積堡中伏失利控衄頗多尤難保該回會  
不因而生變臣現調記名總兵劉玉興督軍駐  
紮鳳翔並派候補知府黃鼎記名總兵蕭德揚  
各率所部分駐邠長鳳縣等處務使聲勢聯絡  
互相策應一面飛咨漢中鎮總兵蕭慶高分兵  
扼紮略陽留壩一帶以防洮岷鞏昌逆匪蠢動  
臣仍當酌量緩急隨時調度以期慎固邊防惟

各軍欠餉太久猝難開拔已飭糧臺趕緊籌餉  
接濟俾利遄行

劉蓉又奏言接奉

諭旨雷正綰一軍進逼靈州需糧孔亟等因臣遵卽飭

令鄰近慶陽之甘泉等縣湊撥軍糧二萬石並  
飭北山附近州縣會同雷正綰委員勸捐米麥  
以濟目前之急惟運腳一項陝省無款可籌請

旨飭下慶陽糧臺楊能格籌備運腳自行轉解以資軍食而免延誤奏入

上命軍機大臣傳諭楊岳斌劉蓉楊能格曰甘省回匪盤踞靈州大水坑等處時赴定邊交界之區肆行擄掠經該處防兵截擊殲斃多名而定靖一帶毗連甘境路徑紛歧必應添兵防守劉蓉現飭同知鄒太愚督帶四營會合段登雲等扼要堵禦卽著飭令該員

弁等加意嚴防遇賊卽擊其郟延一帶要隘並著督  
飭總兵楊得勝等認真扼剿毋少疏虞楊能格仍遵  
前旨嚴飭魏添應等相機截剿毋爲該逆所乘回首  
赫明堂招集回衆已至八九千人之多萬一日久乏  
食必將肆行搶劫故態復萌楊岳斌旣慮其終爲邊  
患自當豫籌防範隨時咨商雷正綰設法鈐制相機  
解散以期消患未形其邠隴鳳略一帶卽著劉蓉檄

令總兵劉玉興等軍迅速赴防扼要駐紮並令蕭慶  
高分兵嚴防藉資策應劉蓉奏遵籌雷正綰軍食已  
飭甘泉等縣湊撥倉糧二萬石並飭北山附近州縣  
勸捐米糧惟運費無款可籌請飭慶陽糧臺自行籌  
辦等語所奏係屬實在情形卽著楊能格籌備運腳  
自行轉解以裕軍食

劉蓉又奏言雷正綰一軍所需糧石本應遵

旨由陝省採運接濟惟現在庫款奇絀積欠纍纍若再採辦甘省軍糧斷難籌此鉅款轉運之費繁多亦屬難辦查甘省糧食雖艱若有現銀採買尙可源源接濟請

旨飭下山西湖北各省務將應協雷正綰軍餉按月如數解交慶陽糧臺並

飭令楊能格卽將此項餉銀就陝甘交界之產糧州縣

委員採辦不惟可免軍食缺乏之虞抑且可省  
車贏轉運之苦而一石之糧可省數石之費亦  
樽節軍儲之至計也

劉蓉又奏言陝甘壤地毗連誼切唇齒自遘逆  
回之變三秦糜爛厥禍遂延於甘今陝境粗安  
甘患仍熾雖各路大軍雲集而糧餉兩絀日虞  
飢潰萬一不能支持則逆燄仍張其禍又將復

歸於陝是以臣自履任以來日以協濟甘餉爲  
亟計一歲撥解之款約十餘萬金以之分撥甘  
省諸營不過涓滴之潤而陝省物力已屬罄竭  
無餘刻下各屬地方凋敝人民多未復業土地  
荒廢戶鮮蓋藏庫款支絀萬分實難協助鄰省  
臣再四思維惟湖南東征局釐金一項尙可藉  
爲協濟之資查湖南釐金歲收八十餘萬嗣經



兩江督臣曾國藩奏請停止現當軍餉窘乏之時仰懇

天恩飭下湖南撫臣李瀚章仍將此項釐金撥濟甘餉

俟兩三年後隴境肅清再行奏請停止如蒙

俞允臣與楊岳斌卽當函致湖南紳士勸率商民勉以

忠義或別議獎敘之法以彰好義之忱庶幾甘

省餉源不致枯竭實於軍務有裨奏入

上命軍機大臣傳諭官文鄭敦謹李瀚章王榕吉曰雷正綰一軍進攻靈州因甘省向不產糧是以諭令劉蓉督飭藩司將雷正綰軍營糧食寬爲籌備委員轉運以濟要需茲據劉蓉奏庫款竭蹶積欠累累若再採辦甘省軍糧斷難籌此鉅款轉運之費繁多亦屬難辦所奏自係實在情形惟雷正綰攻勦靈州賊匪正當喫緊甘省購糧維艱設因餉糈不繼貽誤戎機

所繫誠非淺鮮著官文鄭敦謹王榕吉各將月撥雷  
正緒協餉按月如數委解慶陽糧臺卽由楊能格將  
此項餉銀採買糧石轉運雷正緒軍營以資兵食毋  
得稍涉延誤陝甘兩省唇齒相依理宜竭力援甘惟  
陝省自遭逆回之變地方凋敝過甚人民多未復業  
土地荒廢下鮮蓋藏以頻年積困之區責令強協鄰  
省深恐力不能支反滋貽誤從前曾國藩奏請裁撤

東征釐局當以所奏係爲體恤商情培養元氣起見  
用特允其所請諭令將東征局卡概行停止仍酌擇  
貨物數種暫留釐金數成作爲協甘之餉如月收較  
旺仍責令李瀚章儘數多解不必拘定月解一萬之  
數原爲甘省賊氛甚熾大兵分路攻剿需餉浩繁必  
須寬爲籌備方可收飽騰之效現在各省指定之款  
旣不能悉數如期解到而陝省又不能就近兼籌短

三國志卷之四十一  
二二二

細情形深爲可慮劉蓉請仍撥湖南釐金暫資接濟  
俟兩三年後隴境肅清再行奏請停止其通盤籌畫  
實爲大局起見著李瀚章斟酌情形實心區畫儘能  
有神國用無損民生卽將東征局釐金照舊抽收接  
濟甘餉俟隴省軍務肅清再行停止於西北大局甚  
有裨益